

ჯანსუღ ნიქაბაძე

# ბიზისბაზის საიღუბლო



„ ნ ა კ ე რ ა ტ ი ა “  
თბილისი \* 1970

Γ 2  
899.962.1-93  
5 734

7-6-3

„ციხისგორას საიდუმლო“ პოეტ ჯანსუღ ნიქაბაძის პირველი პროზაული ნაწარმოებია.

მთხრობის მთავარი გმირები იქვენი თანატოლები არიან. ისინი ცხოვრობენ საქართველოს ერთ-ერთ მაღალმთიან ქალაქში.

მწერალი მსატყრული უშუალოდითა და სიმართლით გვიხატავს ბავშვების საინტერესო და ხიფათით სავსე ცხოვრებას.

მეგობრობა, ერთმანეთის გატანა და დახმარება, — აი, რა ამშვენებს მათ სულიერ სამყაროს.



## ს ა თ ე ვ ზ ა ო ლ

— დათო!

დილაუთენია ჩამესმა ძილში.

„ნეტავი ვინ არის?“

— დათო, დათო!

„გამიწყალეს გული, მეძინება!“

— დათუნაა!

ძახილს ახლა სტვენა მოჰყვა.

ზანტად ვახელ თვალებს, იდაყვით ფანჯრის რაფას ვეყრდნობი. ეზოში, სამტრედესთან, გია და მამუკა დგანან. ჩამოდიო, — ხელით მანიშნებენ. უხმოდ ვიცვამ. ოთახში არავინაა.

ცივა.

სამხარეულოში ნავთქურაზე ჩაიდანი შიშინებს.

კარადასთან ჩემი ძველი ჩანთა გდია. ეყოფა, სამ წელიწადს ვათრიე კლასიდან კლასში. ახლა, ალბათ, ახალს მიყიდიან.

დერეფანში ელექტროზარი აწკრიალდა.. მერძევე თუა. ნამდვილად ის არის. ჩვეულებისამებრ სრუტუნებს. გაცივებულია.

მაგიდიდან რამდენიმე ცალ ნამცხვარს ვიღებ, ჯიბეში ვიტენი და ეზოში ფეხაკრეფით ჩავდივარ.

— სადა ხარ აქამდე? რა ძილქუში დაგეცა? — მეკითხება უკმაყოფილოდ მამუკა.

— რა ვიცი, წუხელ ძილი გამიტყდა და...

— მეც კარგა ხანს ვიტრიალე ლოგინში! — ამბობს-გია.

— ეჰ, ყველაფერს ბედი უნდა, თორემ გუშინდელი თამაში უნდა წაგვეგო? მერედა, როდის... თამაშის დამთავრებას რალაც წუთებილა აკლდა, — სინანულით ამბობს მამუკა.

— ვერა ნახეთ, რა ბურთი გაუშვა ლევანმა? ლობიო!

— არა, შენ ბონდოია უნდა გენახა, ცხენივით რომ ხვიხვინებდა.

— კიდევ კარგად გადაგვირჩითო, მადლობა უნდა გვითხრათო...

გია მტრედებს საკენკს უყრის. მტრედები მხიარულად ღულუნებენ. ნელ-ნელა იღვიძებს ქალაქი. ქუჩებში ძილ-გატეხილი შეეტლევები უხალისოდ მიერეკებინ ჩაგლა-გა ცხენებს. ხანდახან მსუბუქი მანქანა თუ ჩაიქროლებს,



უკან ბოლქვებად ავარდნილი მტერის კორიანტელი მი-  
ყვება კუდივით.

თენდება.

სადღაც, ახლოს, მამალმა იყივლა. უმალ მდინარის  
გალმიდან სხვა მამლებმა უპასუხეს სულწასულ მამლა-  
ყინწას.

— ყიყლიყო!

ეს უკვე ბაბუა ივანეს მამალია, ხმაზე ვცნობ.

— ყვინჩილამ გაიღვიძა! — იცინის მამუკა, — საცაა  
პატრონიც გამოჩნდება.

ასეა ყოველთვის, მისი დაყივლება და ბაბუა ივანეს  
გამოჩენა ერთია ხოლმე, მაგრამ ახლა რატომღაც იგვი-  
ანებს. აკი სათევზაოდ წაყუანას დაგეპირდა.

ერთმანეთს გადავხედეთ.

— მამუკა, მიდი, გაიგე, სად არის.

დასაქმებაზე მუდამ წელათრეული მამუკა უხალი-  
ხოდ მიდის.

ბაბუა ივანე ჩვენი სკოლის დარაჯია. მეზობლად ცხოვ-  
რობს. ამ ბოლო დროს თავს ცოტა შეუძლოდ გრძნობს.  
ზოგჯერ მთელი დღეები ლოგინში წევს მარტოხელა ბე-  
რიკაცი. ერთხელ ჩვენმა რაიკომის მდივანმაც კი მოინა-  
ხულა. მოწაფეობისას თურმე დიდი ეშმაკი და ქვის  
მტეხავი ყოფილა. დღე ერთი იყო და ათას მაკვარან-  
ცხულ რამეს მოიგონებდა. სკოლის ფანჯრებს ხომ სულ  
ლაწა-ლუწი გაუდიოდა, ვერ იქნა, დამნაშავეს ვერ მიაგ-  
ნეს. ერთიც ვნახოთ, დარაჯს ეგ არ დაუჭერია? ამდგარა  
ბაბუა ივანე და სარკმელი უხმოდ ჩაუსვამს, ის კი ლა-

ზათიანად მიუტყეპია. ის იყო და ის... ამის შემდეგ ონავარი ჭკუაში ჩამდგარა.

ბებიაჩემიც ასე ფიქრობს: — დღეში ორ-სამჯერ უნდა გაგასილაქონ, იქნებ კაცი გამოხვიდეთ.

მამუკას შეაგვიანდა. ასეთია, ჯერ წასვლა ეზარება, მერე — მოსვლა.

— ალბათ ჩაწვა საღმე.

— ეპ, მამუკა თუ დაასაქმე, იცოდე, შენც უკან უნდა მიპყვე! — ხელი ჩაიქნია გიამ.

ის იყო ეზოდან გავდიოდით, ალაგესთან აქოშინებული მამუკა შემოგვეჩეხა, მოხუცი უთენია სადღაც წასულაო.

— მერე, ამდენ ხანს რას უცდიდი?

— აქეთობას, ვარდენის ეზოზე რომ გადმოვდიოდი, მისი დაფეხვილი ძაღლი ამეკიდა!..

— რა ვქნათ? — ვთქვი მე. ახლა მამუკასთან წილაღობილას არც ხალისი გვქონდა და არც დრო.

— იქნებ ხვალისათვის გადაგვედო? — წამოიწყო მამუკამ, მაგრამ გიამ უმალ გააწყვეტინა:

— კარგი, გეყოფა ამდენი ორჭოფობა, გვე-ყო-ფა! — უკანასკნელი სიტყვა თითქმის ყურში ჩასძახა უკვე საკმაოდ შემცბარ მეგობარს.

— მე ისე... თუ გინდათ, წავიდეთ! — უკან დაიხია მამუკამ.

— ანკესები მზად არის?

— კი!

— ჭიაყელებიც!

— საუზმის წამოღება ხომ არ დაგვიწყნიათ?

- ყველაფერი რიგზეა!
  - მაშ, წავსულვართ, რაღას ვუცდით?
  - ნატოს რაღა ვუყო? — შეფიქრიანდა მამუკა.
  - ნატო მამუკას პატარა დას ჰქვია.
  - როგორ, საბავშვო ბაღში არ მიდის?
  - წუხელ მთელი ღამე ახველებდა, დედამ დამიბარა, სახლში დარჩესო.
  - აი, ესეც ახალი ამბავი!
  - ბებიაჩემს მივუყვანოთ, — ვთქვი მე.
  - როგორც გინდათ, მე კი ნურაფერში გამრევთ! — განზე გადგა ვია.
  - არც მე მაქვს ცხრა თავი! — ქვა ააგდო მამუკამ.
- მეტი რა ჩარა იყო, ბებიასთან მოლაპარაკება ისევ მე ვითავე. ვიცოდი, უკეთეს შემთხვევაში ცოცხი თუ არა, ჩინებული წყევლა მაინც არ ამცდებოდა, მაგრამ იოლად გადაერჩი. ბებიას ნატოს მიყვანა გაუხარდა. მე კი, ამჯერად, მხოლოდ მამაზეციერთან გამაგზავნა კინჩხის მოსატეხად.



მზეს ჯერ კიდევ მთებს იქით, ოქროს საბუღარში ეძინა, როცა სათევზაოდ წინასწარ შერჩეულ ადგილზე მივედით. ფეხსაცმელები გავიხადეთ, შარვლები მუხლებამდე დავიკარწახეთ და ანკესები წყალში ჩავუშვით.

ცოტა ხნის შემდეგ ვიამ საუზმე ამოალაგა და რიყეზე სახელდახელოდ გაშალა.

— დათო, იცი, ჩვენს უბანს ციხისგორას რატომ ეძა-

ხიან?—მეკითხება მამუკა და პირში ვეება ლუკმას იჩრის.

— ეს ხომ ყველამ იცის,—გაიცინა გიამ,—გამომიჩნდა მეცნიერი! ციხე-სიმაგრე მდგარა და იმიტომ.

— იქნებ, ციხეს რომ საიდუმლო გვირაბი ჰქონდა, ისიც იცი? — იხტიბარს არ იტეხს მამუკა.

— ეგეც ვიცი, გვირაბი ყველა ციხეს ჰქონდა.

— ჰე! — ტუჩს იბზუებს განაწყენებული მამუკა.

გიას მუჯღუგუნი წავკარი, ისიც თითქოს ამას მოელოდაო, რიყეზე გაიშოტა.

— კარგი, აბა, ჩამოკაკლე, რა იცი!

— მე ეს ისე ვთქვი... თუ გინდათ, მოგიყვებით...

— მიდი, მამუკ, გიას ყურს ნუ უგდებ! — ისევ შევამხნგვე მეგობარი. მამუკას მეტის თქმა არ დასკირვებია. კმაყოფილებით ჩაახველა და დაიწყა:

— თურმე ერთხელ, ძველად, ძალიან დიდი ხნის წინათ, საქართველოს მტერი შემოსევია. მაშინ ამ მთაზე ციხე-სიმაგრე მდგარა და უთვალავ განძეულობასაც აქ ინახავდნენ. მტერს ციხისათვის ალყა შემოურტყამს. როცა ეგონათ, ისედაც ერთი მუჰა მეციხოვნეები შიმშილისაგან უკვე დაუძლურებული იქნებიან და უბრალო წინააღმდეგობასაც ვეღარ შესძლებენო, მხიარული ყოინითა და დაფდაფების ცემით შექრილან ციხეში, მაგრამ დახეთ, საოცრებას! თითქოს მიწამ პირი უყოო, ძეხორციელი არ დახვედრიათ. ცხადია, აღარსად იყო განძეულობაც.

გაოცებული გია წამოჯდა.

— ციხიდან როგორღა გასულან. ჰა?

— აჰი ვთქვი, ციხეს საიდუმლო გვირაბი ჰქონდა-მეთქი...

— მერე?.. მერე?..

— გაბრაზებულა ურჯულოთა სარდალი, ოთხივ კუთხით მსტოვრები უფრენია, მაგრამ ამაოდ!.. ბოლოს ჯაერი ციხეზე უყრია, სულ ნაცარტუტად უქცევია.

— ჰაი, დედასა! — გულზე მჯილს იცემს გია.

— ნეტავი ახლაც თუა ის გვირაბი?

— ამაზე არაფერი უთქვამთ, არ ვიცი.

— შენ საიდანღა გაიგე ეს ამბავი?

— ბაბუა ივანე ელაპარაკებოდა ამას წინათ ვილაც უცნობს და ჩვენი სკოლის კედლებს უჩვენებდა, იმ ციხის ლოდებითაა აშენებულიო.

ყველანი გავჩუმდით.

შორს თანდათან განათდა თვალშეუდგამ მთათა დათოვლილი ხორხები. ნელ-ნელა, თითქოს უხილავი ძაფებით ეზიდებიანო; ამოვიდა დიდი, წითელი მზე.

ანაზღად მამუკა აწრიალდა.

— შეხედეთ, შეხედეთ!

წამოვიწიე, გიას ანკესის ტივტივა თვალდათვალ იძირებოდა.

— ამოსწი, რაღას უცდი?!

— სუ, ჩუმად! მინდა კარგად მოეკიდოს!

— ჩქარა, ჩქარა-მეთქი! — არ ისვენებს მამუკა.

გიამ ანკესი სწრაფად აიქნია. პატარა ქორჭილამ ჰაერში შეიფრთხილა, მაგრამ ანკესს უმალ მოსწყდა და ისევ მდინარეში გაუჩინარდა.

— ეჰ! — გულდაწყვეტით თქვა გიამ და მამუკას შეუტია: — სულ შენი ბრალია, ამოსწი, ამოსწიო და... აჰა!

— ერთი ამას დამიხედეთ, კიდევ აქეთ მეღავება! —

წარბი შეიკრა მამუკამ და, თითქოს თანაგრძნობას მოე-  
ლისო, ჩემსკენ გამოიხედა.

მე არაფერი მითქვამს. გიამ ანკესზე ხელახლა ააგო  
ჭიაყელა და ისევ წყალში ჩაუშვა. მერე ჭიბიდან შაქრის  
რამდენიმე ნატეხი ამოიღო, უხმოდ შემოგვეთავაზა, არ  
დაუძალებია, პირში წკლაპუნით ჩაიყარა და აქამდე ქა-  
მარში გაჩრილი წიგნი გადაშალა.

უცებ ძახილი შემოგვესმა.

გაღმა ნაპირზე ილღიაში ტანისამოსამოჩრილი ბიჭი  
იღვა.

— ბონდოია!

— ის არის, ის! — აწრიალდა მამუკა.

ბონდოიას ხსენებაზე ტანში ჟრუანტელმა დამიარა.  
მთელი უბანი აკლებული ჰყავდა ამ ქვატეხია სალახანას.  
დავფაცურდით. ჭერაც არ დაგვევიწყებოდა. ამას წინათ  
როგორ წაგვართვა ანკესები და ერთი-ორი მუჯღუგუნიც  
გვითავაზა, — ასე ცოტა რატომ მოგიტანიათო.

ბაბუა ივანეს ხომ თვალის დასანახავად ეჯავრებოდა  
ბონდო. განსაკუთრებით ერთი ამბის შემდეგ.

მაშინაც სათევზაოდ ვიყავით. შუადღემდე, ვიდრე  
ჩამოცხებოდა, რამდენიმე ქორჭილა დავიჭირეთ. ის იყო  
წამოსვლას ვაპირებდით, გრიალი შემოგვესმა. ვილაც  
მდინარეში „დინამენტებს“ აფეთქებდა.

ო, უნდა გენახათ ბაბუა ივანე, გაბრაზდა და მერე  
როგორ!

ორნი იყვნენ, ბონდოია და მისი ძმაცაცი პატიკო.  
იმათ რომ დღე დაადგა, ჩვენს მტერს! ორივენი სულ პან-  
ტაპუნტით გადაყარა მდინარეში. აი, თქვე ასეთებო

და ისეთებო, უძახა. მერე კი მთელი საღამო წუხდა, ვიცი, დააშავეს, მაგრამ ასე მაინც არ უნდა გამემეტებინაო..

— მეთევზეებს გაუმარჯოს! — დამცინავი ღიმილით მოგვესალმა დაუპატიჟებელი სტუმარი, — დაიჭირეთ რამე?

მალალი, ჩხიკვივით გამხდარი ბონდოია, თითქოს საჩხუბრად გვიწვევსო, ღრმად ჩამჯდარი თხილივით მრგვალი თვალებით მოგვჩერებოდა.

— ახლახან მოვედი! — ძლივს ამოღერლა მამუკამ.

— მერე? — თითქოს ამას ელოდაო, დაიჭექა ბონდოიამ, — დაგავიწყდათ, ამ ადგილებში ჩემი ნებართვის გარეშე თევზაობა რომ აკრძალულია?!

გია უხერხულად შეიშმუშნა.

— მაშ, დაგავიწყდათ, არა? ახლავე გაგახსენებთ! — ნიშნის მოგებით ჩაიცინა ბონდომ, — აბა, ჩამოყაჭეთ ანკესები!

ბონდოია ჩვენზე უფროსი იყო და, ცხადია, ღონიერიც. ვიცოდით, მასთან ჩხუბი კარგს არაფერს მოგვიტანდა, მაგრამ მაინც ჭიუტად ვიდექით. ცოცხალი თავით არ გვინდოდა დაგვეთმო ანკესები.

— აბა, ჩქარა, ჩქარა, ნუ ინაზებით, სანამ მართლა არ გავბრაზებულვარ! — ქირქილებდა ბონდოია.

მამუკა ნელ-ნელა იხევდა უკან, გაქცევას თუ აპირებდა. გიას ფუნჩულა, გამობერილი ლოყები შეფაკვლოდა.

— აჰა, ჩემები აიღე, ამათ კი თავი დაანებე! — წინ გადავუდექი ბონდოს და ჩემი ანკესები გავუწოდე.

— არა, ყველა მომეცით! — გაჭიუტდა ბონდო.

მაგრამ არც ბიჭები აპირებდნენ დათმობას.

ვხედავდი, ბონდოიას როგორ ნელ-ნელა მისდიოდა ფერიფური.

ყველაფერი თვალის დახამხამებაში მოხდა.

არ მახსოვს, სიბრაზისაგან სუნთქვაშეკრული გია როგორ ეცა მოძალადეს, როგორ დაატაკა კოტორა თავი მუცელში და როგორ დაბარბაცდა ტკივილისაგან სახედამანჭული ბონდოია. სანამ მოულოდნელი დარტყმით საქციელწამხდარი ბონდო გონს მოეგებოდა, ჩვენ უკვე სამშვიდობოს ვიყავით.

## მამა და დაუკაბიჯებელი სტუმარი

ეზოში შესვლისთანავე დედაჩემის ხმა მომესმა.

— აა, მობრძანდი, ვაჟბატონო? მოგშივდა, არა? ახლავე ზევით ამოდი! მამა ჩამოვიდა!

სიხარულისაგან გული შემიქანდა. დიდი ხანია მამა არ მენახა. მამაჩემი ინჟინერ-გეოლოგია, ზაფხულობით სულ მთებშია, ექსპედიციაში.

— უი, დამიდგეს თვალეები! სად იყავი, ბიჭო? — შემომიტია ბებია, როცა მამას მზით გარუჯულ კისერზე ჩამოვეკიდე, — ერთი შეხვით, რას უგავს ამ დილით ჩაცმული ხალათი?

ახლად შევამჩნიე იდაყვთან წითელი ლაქა. „ალბათ მაშინ თუ გადამეჭლიშა...“ — გამიელვა თავში და დამნაშავესავით გავინაბე. მეორე ოთახში შევიპარე, ნიშნების ფურცელი გამოვიტანე და მამას უხმოდ გავუწოდე.

— ქართული წერა და ზეპირი — 5, არითმეტიკა —



5, რუსული წერა და ზეპირი—5...—ჩამარცვლით კითხულობდა მამა, თან სუფრასთან მოფუსფუსე დედას დროდროდო ღიმილით გახედავდა, — 5, 5, 5... ყოფაქცევა — 5!

ბებიამ მოაყურადა:

— იმდენი მაგას რა ვუთხრა? ნეტავ რაში უწერენ ხუთს? ალბათ ცულლუტობაში. აბა, სხვა რა უნდა იფიქროს ადამიანმა?

— გადაყვანილია მეშვიდე კლასში. ყოჩაღ, შვილო! — მომიალერსა მამამ, — სიტყვის პატრონი ყოფილხარ, არც მე გადავალ ჩემს პირობას, უსათუოდ გიყიდი ველოსიპედს.

— არ გაბედო! — ხელები გაასავსავა ბებიამ.

— ეგლა აკლია ახლა! — მხარი აუბა დედაჩემმა.

მამა მხიარულად იცინის.

ანაზღად ეზოდან სტვენა მოისმა. ისევ მამუკა იყო.

— მე თქვენ გიჩვენებთ, როგორ უნდა შეეტლესავით ყოველ წუთს სტვენა, — გაწიწმატდა ბებია და მერე მამას მიუბრუნდა მუდარით: — უთხარი, შვილო, რამე, მთელი დღე ყაჩაღივითაა გავარდნილი, სახლში ბაწრით ვერ შემოათრევს კაცი.

მამა წამოდგა და ბებოს მოეხვია.

— დამშვიდდი, დედი! ამ დღეებში ისევ მოვბრუნდებ და ჩემთან წავიყვან მთებში!

ბედნიერებისაგან ლამის ცაში ავფრენილიყავი. თვალწინ დამიდგა მაღალი, თეთრნაბადა მთები, წკრი-ალა ჩანჩქერები, ქამანდივით დახვეული ბილიკები, ტყისპირად გაშლილი გეოლოგთა კარვები, კარვებთან უწესრი-

გოდ დაყრილი საძილე ტომრები, ზურგჩანთები, წერაყინები... და დიდი, უზარმაზარი, წითელი მზე...

ფანჯრიდან ეზოში გადავიხედე, არავინ ჩანდა. შეშის ფარდულის კედელზე ვილაყას ნახშირით დიდთავა, თმააბურძგნული ტიკინა დაეხატა, რუმბივით გაბერილ მუცელზე „მამუკა“ ეწერა. გამეცინა. საწყალი ბიჭი! ღართლაც, რამდენს აწვალებდა აჯაგრულ თმას. წამდაუწუმ წყლით ისველებდა, მაგრამ, ამოდ. ოდნავ შეაშრებოდა თუ არა, ისევ ზღარბის ეკლებივით აეშლებოდა.

დერეფანში ელექტროზარი აწკრიალდა.

„ერთი, ორი, სამი!.. ე. ი. ჩვენთან არიან. ნეტა, ვინ უნდა იყოს?“

— დათო! — მომესმა დედაჩემის ხმა, — შენთან სტუმარია!

ყარებში ვეება თაიგულით ეკა იდგა. ეკამ ყვავილები დედაჩემს მიაწოდა, ხმადაბლა რალაც თქვა და მერე თვალეებით მე მომძებნა, გამილიჟა. დედამ თაიგული სასოეებით ჩაჟოართვა და მამას გადახედა.

იმ წუთს მიწა რომ გამხეტქოდა, ის მერჩივნა. ფეხები ძლივს ავითრიე. დაუპატიჟებელ სტუმარს სყამი შევთავაზე.

უნებურად მის მზერას გავაყოლე თვალი, დალაქავებულ სახელოზე მიყურებდა.

— მაშინ მოგივიდა?

— ჰო!..

— რას იზამ, ასეთი ავია ჩვენი ბროლია.

— ფეხი რომ არ დამცდენოდა...

— გაასწრებდი, არა?

„ეჰ, რატომ ფეხი არ მომტყდა მაშინ!“

— ვერ დამეწეოდა!

ეკას გაელიმა, მივხვდი, ჩემი არ სჯეროდა.

„მეტაჩხარა! მოვიდა, რომ დამცინოს! მაინც რა ჯანდაბამ შემიყვანა იქ? რა მინდოდა, ახია ჩემზე! არა, მაინც ვინ მეხვეწებოდა?“

ყველაფერი ჩემდაუნებურად მოხდა. სირბილისაგან აქლოშინებული ბიჭები სულის მოსაბრუნებლად ბაბუა ივანეს ჭიშკართან შეეჩერდით. სკოლისაკენ მიმავალს, ვინ იცის, რამდენჯერ ჩამივლია ამ გზაზე და ერთხელაც არ მინახავს ფანჯრები დარაბებით არ ყოფილიყო დაკეტილი. ახლა კი, რატომღაც, გაეღოთ.

ბიჭებს გავძახე: ბაბუა ივანეს ამბავს გავიგებ და დაგეწევი-მეთქი. ანჯამებმორყეული ჭიშკარი შევადე და ეზოს ბილიკს გაუბედავად ჩავყევი. არაერ ჩანდა. კიბესთან ჩაცუცქულ ბროლიას მოვკარი თვალი, მაგრამ გვიანდა იყო. ეტყობა, მან უფრო ადრე დამინახა და ჩემსკენ შურდულივით გამოექანა. ვიცოდი, რა უმადურიც იყო, მაგრამ თუ ასე შეირცხვენდა თავს, ამას კი არ მოველოდი. შეშინებულმა, მოსაშველებლად ბაბუას მოვუხმე და გავიქეცი, ჭიშკართან მისულს ფეხი დამიცდა და... გათამამებული ბროლია, ალბათ, გამარჯვებას იზეიმებდა, ვილაცის ძახილს რომ არ დაეფრთხო.

სახეზე აფარებულ თითებს შუა გავიხედე.

თავზე წითელქუდა, ქერათმიანი გოგონა მადგა.

— გიკბინა?

— არა! — უკმეხად მივუგე ჩემი უილაჯობით გაბრაზებულმა და წამოვდექი. გოგონამ ცნობისმოყვარეო-

ბით შემათვალე რა, თითქოს ჩემი პასუხის სიმართ-  
ლეში უნდა დარწმუნდესო.

უხმოდ შევეტრიალდი.

— დაიცა, სად მიდიხარ? ბაბუას დავუძახებ!

— არა, არ არის საჭირო!

— რატომ?

— მე... მერე მოვალ... ყვაველები მინდოდა, დღე!  
დედაჩემის დაბადების დღეა!

— თაიგულის შეკონვას რა უნდა, ისეთ ყვაველებზე  
შეგირჩევ, რომ...

— არა, მერე იყოს!

გოგონამ ხელი მომკიდა.

— მოდი, ნუ გეშინია, ახლა არ გიკბენს!

— მე არ მეშინია.

— მაშ, წამოდი, რაღას უცდი?

— არ მინდა!

— ნამდვილად გეშინია?

— ვის? მე?

— შენ!

გამეცინა.

— რა გაცინებს?

— მეცინება და რა ვქნა!

— ახლავე შემოგიქსევ და მაშინ ნახე..

— აბა, სცადე, ზულს გავაცხებინებ...

გოგონა წამით შეყოყმანდა.

— კარგი, შევრიგდეთ!

— მე არ გეჩხუბებდი...

— რა გქვია?

— დათო.

ახლა გოგონას გაეცინა.

— რატომ იციანი?

— ისე!

— მაინც?

— ვიცოდი, ასე გერქმეოდა.

— ვითომ რატომ?

— ყველა შენსავით ბუთბუზა ბიჭს დათუნას ეძახიან.

— ნეტავ, შენ რალა გქვია? — გაბრაზებული მივახალე, სხვა რომ ვერაფერი მოვიფიქრე.

— მე? — რატომღაც უკმაყოფილოდ შემომხედა წითელქუღამ, თითქოს გაუკვირდა, ჩემი სახელი როგორ არ იციო, — ეკატერინე! შეგიძლია, უბრალოდ ეკა დამიძახო. სად ცხოვრობ?

„ო, ეს კი მეტიხმეტია, მეჩავრება ენაჭარტალა გოგოები!“

თავს ძალა მაინც დავატანე.

— აი, იქ! მივუთითე ჩემი სახლისაკენ, რომელიც ახალი სახლების ფონზე შავ ლაქასავით ჩანდა.

— ყვავილები გიყვარს?

— ჰო, ისე...

ჭიშკარი გამოვალე, ბიჭები მეძახდნენ.

— ვინ არიან?

— ბიჭებია, ჩემი ამხანაგები!

— მიდიხარ?

— ჰო!

— ყვავილები რომ დაგავიწყდა? — აწრიალდა გოგონა, მაგრამ მე უკვე უკანმოუხედავად მივქროდი თავდაღმართზე.

— არ მელოდი? — ეშმაკურად გაეღიმა ეკას, როცა მშობლები მეორე ოთახში გავიდნენ.

„მოდი და ელაპარაკე ახლა ამას? რა ვუთხრა?“

— ჩემი მოსვლა ხომ არ გეწყინა?

— აბა რა სათქმელია! — უხერხულად შევიშმუშნე მე, — პირიქით...

სავარძელში მთვლემარე ბეზიას გამოეღვიძა. შუბლზე წამოსკუპებული სათვალე თავის ერთი ჩაქნევით ისევ ცხვირზე მოირგო და ეკას დააცქერდა. ბებია ჩემს ამხანაგებს ყველას იცნობდა.

— ვისი ხარ, შეილო?

— ზურაბ კორინთელისა! — სხარტად მიუგო ეკამ.

ბებია წამით ჩაფიქრდა, მერე უცებ შეიცხადა:

— ჩვენი ივანეს შვილიშვილი?

ეკამ დაიმორცხვა.

— უი, შენ გაგახარა ღმერთმა! დედა როგორ არის? მამა?

— გმადლობთ, ყველანი კარგად არიან!

— ბაბუას სანახავად ჩამოხვედი, არა?

— მამა აქ გადმოიყვანეს სამუშაოდ.

— მაშ, გაგიხარებიათ ბაბუაშენის გული და ეგ არის, ყველანი აქა ხართ?

— ჯერ მარტო მე ჩამოვედი, მალე ჩვენებიც ჩამოვლენ.

„აი, თურმე სად ყოფილა ამ დილით ბაბუა ივანე. ეკას დასახვედრად წასულა!“

ბებია გავიდა. სამზარეულოდან ჩაიდნის გულისგამა-

წვრილებელ სტვენასთან ერთად, ფლოსტების ფლასტა-  
ფლუსტი ისმოდა. მერე დერეფნის კარები ხმაურით გაი-  
ლო და ბებია გიასა და მამუკას შემოუძღვა ოთახში.

— აბა, ფეხები კარგად გაიწმინდეთ!

გაოცებული ბიჭები მონდომებით უსვამდნენ ფეხებს  
ფლასზე. მეც არანაკლებ გაოცებული ვიყავი. ბებია  
არცთუ ისე კარგი თვალით უყურებდა ბიჭებს.

— აი, ამხანაგებიც მოგიყვანე, ახლა არ მოგწყინდე-  
ბათ!

მალე სახელდახელოდ გაშლილ. სუფრას შემოვუს-  
ხედით. მურაბიანი ჩაი და ნამცხვარი გვეგემრიელა, მაგ-  
რამ უხერხული ღუმელი ვერ იქნა და ვერ დაირღვა.

— გაღმაუბნელები იყვნენ, — წამოიწყო გიამ.

მადლობის თვალით გადავხედე მეგობარს. სალაპარა-  
კო თემა უკვე გვქონდა.

— რაო, რა გვინდაო?

— ისე, ხასიათზე როგორ ხართ, გვითხარით, ნუ  
გრცხვენიათო...

— მერე, მერე?

— რას ვეტყვოდი, ვითომ არ იცით იმათი უცხვირპი-  
რო თავის ამბავი.

— გაღმაუბნელები ტყუილად არ მოვიდოდნენ...

აქამდე ჭამაში გართულმა მამუკამ აღმაცერად ამო-  
მხედა.

— ეგ მე მკითხეთ, მე ვიცი იმათი კუჭის ტკივილის  
წამალი. თამაში უნდათ!

— მერედა უარს ვინ ეუბნებათ, ჰა, ბურთი და ჰა,  
მოედანი.

აქამდე ჩემად მჭდარი ეკა წამოდგა.

— უკვე მიდიხარ? — შეეწუხდი მე. თუნდაც ზრდილობისათვის რაიმე ხომ უნდა მეთქვა.

— ჰო, ჩემი წასვლის დროა, ისედაც შემაგვიანდა! — მოიბოდრიშა ეკამ.

ძალა არ დამიტანებია. წამოვიშალენით. მოსახვევამდე ბიჭები გამოგვეყვნენ. მოულოდნელი სტუმარი თითქმის სახლამდე მივაცილე. გზაში კარინტიც არ დამიძრავს. რატომღაც სინდისი მქენჯნიდა. ისიც, თითქოს ჩემი უგუნებობის მიზეზს მიმიხვდაო, შეკითხვებით არ მაწუხებდა.

გულმა მაინც არ მომითმინა.

— დღეს მე... არავითარი...

— ვიცი! — გამაწყვეტინა ეკამ, — ყველაფერს მაშინვე მივხვდი, როგორც კი შემოგხედე. ისე დაიბენი, ისე, რომ... პირდაპირ შემეცოდე.

შევცები.

— ბოდიში... მე ისე...

— ბოდიში მე კი არა, დედაშენს უნდა მოუხადო, მატყუარავ! — ეკამ თვალეზი ეშმაკურად დაახამხამა, მერე ჩიკორივით დატრიალდა და გაიქცა.

## ბ რ ნ დ რ

წუხელ მთელი ღამე კოკისპირულად წვიმდა, გამთენიისას გადაიკარა. ეზოში აქა-იქ გუბურები გაჩნდა, ატალახდა. ბურთის თამაშზე ფიქრიც ზედმეტი იყო.



ერთხანს ქაღრაკით გავერთეთ, მაგრამ მალე ესეც მოგ-  
ვწყინდა, სალაპარაკოც გამოგველია.

ნელა, ზოზონით გადიოდა დრო. მთქნარებისაგან ყბე-  
ზი გვეტკიოდა.

გზის პირას ყორეზე ვისხედით.

— ბიჭებო, — წამოიწყო მამუქამ, — გაიგეთ, ჩვენი  
სკოლის დანგრევას რომ აპირებენ?

— რაო? — პირი დააღო გიამ, — ერთი ამ ჭკუის კო-  
ლოფს დამიხედეთ!

— ეგ საიდან მოიტანე, ბიჭო!

მამუქამ წარბი შეიკრა.

— კარგი, ამოშაქრე, რა იცი! — ვთქვი მე.

— გუშინ ვილაც უცნობი კაცები ამოვიღნენ, იმათ სა-  
უბარს მოვკარი ყური. დედას ვფიცავ, თუ ვტყუოდე!

— ვინ იყვნენ?

— მგონი, ინჟინრები.

— მერე?

— მერე, რალაც მიზომ-მოზომეს და წავიღნენ.

— ჩვენი სკოლა ერთ საუკუნეს კიდევ გასძლებს! —  
ნაძალადევად ჩაიცინა გიამ, — ასე შარშანაც კი იყვნენ...

მამუქამ არაფერი უპასუხა.

მეც დუმილი ვარჩიე. ხასიათზე ისედაც არ ვიყავით,  
ახლა კი სულ ერთიანად მოვიშხამეთ.

— რა ვქნათ? — ცოტაოღენი სიჩუმის შემდეგ იკი-  
თხა გიამ.

-- რას იზამ! თავს ზევით ძალა არაა!

— მაინც?

— წადი და იხტუნე აგურებზე!

— კარგი, გეყოფა ხუმრობა! — გაბრაზდა გია. —  
შენ მაინც გვირჩიე რამე, ჭკუის კოლოფო! — ახლა მა-  
მუკას მიუბრუნდა.

„ჭკუის კოლოფმა“ ჯერ შუბლი შეიკრა, მერე თითქოს  
რალაც მოაგონდაო, წარბები გახსნა.

— იმ ინჟინრებიდან ერთი, ჩვენს პარალელურში  
რომ ბოკერიაა, ბიჭები „გუდუას“ რომ ეძახდნენ, მგო-  
ნი, იმისი მამა იყო.

გია მ უიმედოდ ჩაიქნია ხელი.

— მივიდეთ, სიმართლეს მაინც გვეტყვის!

— შენ მართლაც ჭკუის კოლოფი ხარ! — სიხარუ-  
ლისაგან შევხტი. — სად ცხოვრობს?

— ჩვენს ზემოთ, ჰესთან! წელს მესამე მეოთხედში  
პიონერხელმძღვანელმა დედაპისტან წერილი გამატანა.

— მაშ, წავიდეთ, რაღას ვუცდით?

— სახლში რომ არ დაგვიხვდეს?

— გუდუას მაინც ვნახავთ, იქნებ იმან იცოდეს რამე!  
ყორედან პირდაპირ ქუჩაში გადავცვივდით. მოსა-  
ხვევთან მამუკამ რატომღაც ნაბიჯს უკლო.

— მე არ წამოვალ!

— ვითომ რატომო? — აენტო გია.

— არ წამოვალ, მორჩა და გათავდა! ბონდოია გახ-  
სოვთ? იქნებ დაგავიწყდათ?

— ჯანდაბას შინა თავი, ხელსაც ვერ გვახლებს!

— ჰოდა, შენ წადი მაშინ!

• როგორც იქნა, მოვრიგდით. შორიდან შუკა-შუკა ვარ-  
ჩიეთ შემოვლა, მაგრამ ბაბუა ივანეს ჭიშკართან, თით-  
ქოს მიწიდან ამოძვრაო, ჩვენს წინ ახმახი ბონდოია აი-

სვეტა. ეტყობა, ეს დღეები უქმად არ დაეკარგა. ხელსაყრელ შემთხვევას ეძებდა.

გაქცევა გვიანდა იყო. მისი სირბილის ამბავი მთელმა უბანმა იცოდა, გაკანჭულ ფეხებს თითქმის ორ მეტრზე ადგამდა. ერთადერთ თავშესაფრად ბაბუა ივანეს ეზო გვეგულებოდა, მაგრამ იქაც არანაკლები საშიშროება გველოდა — ბროლია.

— ხომ ჩამივარდით ხელში, თქვე კატის კნუტებო? ახლა სად წამიხვალთ? მგონი, სადღაც მიგეჩქარებოდათ? არა უშავს, სხვა ღროისათვის გადადეთ. ჯერჯერობით კი თქვენი პატივცემული ცხვირები უნდა „შევალამაზო“! — ძალდატანებული სიცილისაგან მუცელზე ხელს იჭერდა ბონდოია, — მერე რომ იცოდეთ, როგორ შექავება ხელისგულები!

ყველაზე წინ მე ვიდექი. ვგრძნობდი, სიბრაზისაგან როგორ მეკვრებოდა სუნთქვა.

ფეხებგაჩაჩხული ბონდოია კი სიცილით იქაჭებოდა.

— შენ კაი დიდყურა ყოფილხარ! — მეუბნება მე და თითქოს პირველად დამინახაო, კარგი მუშტარივით მათგალიერებს, — მაგ ყურებს ჩამოგახევ, მაინც არაფერი შედის შენს თავში...

— აბა, გაბედე თუ ბაჭი ხარ! — გრამ ქვას წამოავლო ხელი.

— ეეე, ეგეთები არ იყოს! — შეფუცხუნდა ბონდოია, — ახლავე გადააგდე ქვა, თორემ... — ხელი შემართა, მაგრამ, არა მგონია, დასაბრტყმელად.

— რას სჩადიხარ! — უცებ მოისმა ვილაცის წკრიალა, მბრძანებლური ხმა.

ჭიშკართან სახეაგზნებული ეკა იდგა, თოკით ბროლია ეჭირა.

— ეს ვინლაა?

— არ გაბედო! — გაუმეორა ეკამ, — თორემ ხომ ხედავ? — ბროლიაზე ანიშნა.

ბონდოს საჩხუბრად დაძაგრულ სახეზე ნაძალადევ-შა ღიმილმა გადაურბინა.

— აგრე იყოს! ამ თხუნელებს, როცა იქნება... — მაგრამ სათქმელი არ დაამთავრა, ხელები ჯიბეებში ჩაიწყო, შხრები აიწურა და ნელა, სტვენით ჩაჰყვა ქუჩას.

— ყურებზე ხახვი არ დაგვაჭრა! — ახითხითდა გია.

— წადი, წადი, ტოლი ნახე! — ცეცხლი შეუნთო მა-მუკამ.

— მაგრად არ შეაშინა! — აკისკისდა ეკა.

— ახია მაგაზე, ერთი გემოზე რომ ეკბინა, უკეთესი იქნებოდა.

— ჰაი, დედასა! რამდენს ვიცინებდით. შეხედეთ, როგორ დამდულრულივით მოუსვა!

გიამ ძალისაყენ გაიწია.

— ხომ არ შიკბენს? — შეეკითხა ეკას.

— თუ არ გააჯავრებ, არა!

— ჭკვიანი ყოფილა, შაქარს ჭამს?

— არ ვიცი!

— ახლავე ვნახავთ! — გია ბროლიას მახლობლად ჩა-ცუცქდა და ჯიბიდან შაქრის ნაფხვენების ამოფერთხვას შეუდგა.

მე და მამუკას არ გაგვევირვებია გიას საქციელი. ვინ იცის, რამდენჯერ დაუჭერია უპატრონო ძალღი და სახლ-

ში მიუყვანია. რომ იტყვიან, თავზე გადაგებია, ჩიტის რძეც არ მოუკლია მისთვის, მაგრამ შემთხვევით ნაპოვნი ძაღლები ორიოდ დღის შემდეგ ასევე შემთხვევით იკარგებოდნენ ხოლმე. მთელმა უბანმა იცოდა, გიას შაქარი რომ უყვარდა. ჯიბე ყოველთვის სავსე ჰქონდა შაქრის ნატეხებით.

— ხედავთ, ჭამს! — გაიხარა გიამ, — პირის გემო ჰქონია.

აქამდე ჩუმად მდგარი მამუკა აბურტყუნდა:

— რა ექნათ, არ წავიდეთ?

ეკამ, თითქოს რალაც იწყინაო, განზე გადგა.

— ძალიან გეჩქარებათ?

— არც ისე! — შეყოყმანდა მამუკა.

— მაშ, იცით რა? მოღით, ბროლიას სახლი გავუკეთოთ!

— სახლი? — თვალები დააჭყიტა გიამ, — მერე, იცი, ამას რა სჭირდება?

— ვიცი!

— მარტო ცოდნით შორს ვერ წახვალ, ფიცრები გაქვს? — არ ეშვებოდა გია.

ეკა ჩაფიქრდა.

— რამეს გავახერხებთ, ვიშოვნით!

— ხელეჩო, ჩაქუჩი, ხერხი, ლურსმნები...

— ყველაფერი იქნება!..

ბიჭებმა ერთმანეთს გადავხედეთ, არაფერი გვეთქმოდა.

ვიცოდით, სიკეთეს სიკეთით იხდიან.

ეზოში, ვეებ: ცაცხვის ჩრდილში, ძველებურ, წნელით დაწულ სავარძელში ბაბუა ივანე თელემდა. საკმაოდ ცხელოდა, მაგრამ მუხლისთავეებზე მაინც თბილი შალი ეფარა.

ფეხაკრეფით შევედით ეზოში.

სახლის კედლებს აქა-იქ ბათქაში ჩამოსცვენოდა. წვიმასა თუ ნიაღვარს ოდესღაც თეთრად შეფეთქილი კედლები წითლად შეეფერა.

ეკამ ლათაროში დაგვტოვა, ახლავე მოვალო, თქვა და კარებში მიიმალა. ცოტა ხნის შემდეგ ძველი, ჟანგიანი ცულითა და ბირდაბირით დაბრუნდა.

მამუკამ უნდილად ჩამოართვა.

— სულ ეს არის?

— დაიცა, დანარჩენებსაც ვიპოვი! დათო, — ახლა შე მომიბრუნდა ეკა, — აბა, ერთი, სახლის ქვეშ შეიხედე, იქნებ რამეს მოკრა თვალი, — და ოთახში შებრუნდა.

— ეჰ!.. — ხელი ჩაიქნია გიამ და ხის ძირას დაჭდა.

— ამით აპირებთ რაიმეს გაკეთებას? — მამუკამ ნაჯახი და ბირდაბირი მიწაზე დაყარა და გიას გვერდით მიუჭდა, — წავიდეთ?

— დაიცა, ვნახოთ, რას იზამენ!

ასე იყვნენ ყოველთვის, საქმის დაწყებამდე ერთი სული ჰქონდათ, მაგრამ თუ ოდნავ რაიმე არ მოეწონებოდათ, უმალვე გულს აიყრიდნენ.

სახლის ქვეშ, სიბნელეში, კაცი ვერაფერს გაარჩევდა. ათასნაირი ხარახურა ეყარა.

— ერთბაშად არაფერი იპოვო! — ნიშნისმოგებით

შემომძახა გიამ, — ფრთხილად, ვირთხებმა არ დაგკბინონ...

— კატა მოიყვანე, ბიჭო, კატა მიაე, მიაე! — ახითხით-და მამუკა.

მეტი ველარ მოვითმინე.

— ეი, თქვენ! — შეეუძახე აბეზარებს, — იცით, რას გეტყვით? თუ მოხმარება არ გინდათ, შეგიძლიათ მიბრძანდეთ!

— ეგრე ხომ? — იწყინა გიამ, — კარგი, მაშ, წავედი! მამუკა მოდიხარ?

მამუკა უხპოდ აღგა და გიას აედევნა.

— ბიჭებო, ბიჭებო! — უცებ გაისმა ეკას შეწუხებულ ხმა, — მოდით, მომეშველეთ!

ბაჭები, თითქოს დანაშაულზე წაასწრესო, ადგილზე გაშემდნენ.

— მოდით, რაღას უცდით! ეს სკივრი გამომატანიენტ! მამუკამ თვალები დააჭყიტა.

— ეს რაღა ბედენაა?

— დაიცათ, სულწასულები ნუ ხართ, მალე ყველაფერს გაიგებთ!

გია და მამუკა უხალისოდ, წელათრევეთ გამობრუნდნენ. დიდი ჯახირის შემდეგ კარებში უხერხულად გასიროული სკივრი, როგორც იქნა, გამოვათრიეთ ეზოში.

— ახლაც ვერ მიხვდით? — გაეცინა ეკას.

ყველას გიამ დაგვასწრო:

— სკივრს კარს გამოვჭრით და... ესეც შენი ბროლის სახლი!

მამუკამ სკივრს სახურავი ახადა:

— უჰ, რა ძველია! ეს რაღაა, შიგ რომ ყრია?

— ძველმანები იქნება!

— ბიჭებო, ხმალი!

— ხმალი? — წაეტანა გია.

— მაცალე, მე თვითონ! — მამუკამ ხმლის ქარქაში-დან ამოღება სცადა, მაგრამ ამოდ. ახლა ხმალს მე და გია დავეჭიდეთ, მაინც არაფერი გამოვიდა.

— აღმათ ჩაუანგებულია!

— დაანებეთ თავი, მოიტათ, შევინახო!

— რას ამბობ? — შეუბღვირა მასპინძელს მამუკამ, — შენ ის გირჩევნია, წახვიდე და ნავთი მოიტანო!

— ნავთი? — გაიოცა ეკამ.

— ჰო, ნავთი, ცოტას დავასხამთ და ამოვა ქარქაში-დან!

მაგრამ არც ნავთმა უშველა. ოფლში გავიხვითქეთ. ბოლოს, როგორც იქნა, ქარქაშში რაღაცამ ჭახანი გაიღო. ხმალი ახალივით ბრწყინავდა, მხოლოდ ვადასთან მოჭკიდებოდა ქანგი ოღნავ.

— ჰაუ, რა ხმალია!

— ნახეთ, ზედ რაღაც აწერია!

გიამ ჩამარცვლით ამოიკითხა: „მამაცობისათვის ი. ნ. კორინთელს. ბუდიონი. 1919 წ.“

— ივანე ნიკოლოზის ძე კორინთელი ხომ ბაბუაჩე-შია! — გაიკვირვა ეკამ, — ეს კი აღარ ვიცოდი!

— ნეტავი ჩემი იყოს! — ინატრა მამუკამ.

— რას იზამდი?

— არაფერს, ისე!



— არაფრისათვის ხმალი ვის რად უნდა, შე ჰკუთის კოლოფო!

— კარგი, გეყოფათ! საქმეს მივხედოთ! — მოგვაგონა მასპინძელმა, მაგრამ ჩვენ ახლა ხმლის მეტი არაფერი გვაინტერესებდა, თვალებადქცეულნი ხმალს ფხას ვუსინჯავდით, პრიალა ქარქაშზე ხელს ვუსვამდით.

— მომეცით, უნდა შევიინახო! — გაიმეორა ეკამ.

გიამ ხმალი ქარქაშში ჩააგო, აცრემლებას ცოტალა უკლდა.

უცებ რაღაცამ გაიზუზუნა და სახლის კედელს მიენარცხა. მეორედ სკივრს მოხვდა. ვიღაცა მესერს გადაღმა დამალულიყო და მკვახე ვაშლებს გვესროდა.

— ვინ არის?

— ბონდოია იქნება!

— თუ ლაჩარი არა ხარ, რას იმალები?

— ხა, ხა, ხა! — გაისმა ხარხარი.

მართლა ბონდო იყო.

— ბროლია, აბა, ერთი, ეცი ამ არამზადას! — წააქეზა ეკამ ძალღი.

ბროლია ყეფით მიაწყდა მესერს.

ხმაურზე ბაბუა ივანეს გამოლოვიძებოდა და ახლა ცნობისმოყვარეობით გვათვალეირებდა.

— რა ამბავია, ეკა, რა ხმაურია?

— არაფერი, ბაბუა, ვიღაც ბიჭი მკვახე ვაშლებს გვესროდა.

— ეს რაღაა, გოგო? — ბაბუა ივანემ ახლა დაინახა თავანდელი სკივრი.

— ბროლიას სახლი უნდა გავუკეთოთ!

— რაო?! ახლავე უკან შეიტანეთ! ბროლიას სახლიო? რას არ მოიგონებს ეს გოგო? ღმერთო, ღმერთო!

ბროლიამ ყელა შეწყვიტა და მოხუცის წინ, ფეხებთან ჩაცუცქდა, ბამბურა კუდის ფათქუნი დაიწყო, თითქოს ეუბნებოდა, შემომხედე, რა ყოჩალი ვარო.

— მე კი მეგონა... — ეწყინა ეკას.

— :რავითარი მეგონა! — ხმას აუწია ბაბუამ, — ახლავე სადაც იყო, იქ დადგით!

ჩემს ზურგს ამოფარებული გია ჩუმად იცინოდა.

— აბა, სწრაფად! ეგ ხმალი აქ მომეციო! — ერთხელ კიდევ დაგვიტატანა ბერიკაცმა და კიბეზე წელა, წელათრევით ავიდა.

სხვა გზა არ იყო, სკივრი ძლივსძლივობით შევიტანეთ სახლში.

— ახია ჩვენზე, სულელები ვართ, ნამდვილი სულელები! — ბურტყუნებდა მამუკა, როცა ეზოდან გამოვდიოდით.

— ვიცოდი, ასეც იქნებოდა, მაგრამ დათოს რამეში დაარწმუნებ?

— არა, ძმაო, მე იქ ფეხის ღამდგმელი არა ვარ, შორჩა და გათავდა!

— მეც ხელი დამიბანია!

— მე კი წავალ! — ვთქვი მე.

ბიჭებმა გაოცებით შემომხედეს.

— ბროლიასაც სადგომს გავუკეთებ!  
ამას კი ნამდვილად არ მოელოდნენ.

— ასე ხომ?

— ასე გახლავთ!

## ისტორიის მასწავლებელი

ახალი სკოლის მშენებლობა უფრო ადრე დაიწყო, ვიდრე მოველოდით.

უკვე ამოდ იხევს ყანყრატოს ბაბუა ივანეს ყვინჩილა. უთენია ბულდოზერებისა და მანქანების გუგუნზე გვე-ღვიძეა. ძველებურად შარა-შარა მტერის სახვეტად რო-დი ვიცლით. აქ რომ მანქანიდან აგურის ჩამოცლაში ვეხმარებით, იქ ქვა-ლორლს ვცრით. ვეზიდებით მორებს, ვენაცვლებით მხერხავენს. მოკლედ, საქმე თავზე საყრე-ლადაა.

გვაქებენ მუშები, გვიწონებენ ნახელავს. ჰოდა, მეტი ჩვენ რა გვინდა.

მშენებლობაზე თითქმის ყოველდღე მოდის ჩვენი ის-ტორიის მასწავლებელი.

პატარა, ჩია ტანის, თითქოს ძვალტყავადქცეული ბე-რიკაცი ერთი კუთხიდან მეორე კუთხეში დაცუხცუხებს. ალაგ-ალაგ უწესრიგოდ დაყრილ ქვებსა და ლოდებს, თით-ქოს სიმაგრეს უმოწმებსო, თავის განუყრელ ჯოხს უკა-კუნებს. ხანდახან სანთელივით ყვითელ თითებს ნაყარ მიწაში ურევს. ასეა ყოველთვის, მოვა, ივლის, ივლის და წავა.

მახსოვს, ორშაბათობით, არითმეტიკის შემდეგ ყო-ველთვის მისი გაკვეთილი გვქონდა. ზარის დარეკვა და მისი გამიჩენა ერთი იყო. უკვე კარებიდან იძახდა.

— მორიგე, გაწმინდე დაფა!

მაგრამ იმ დღეს... კლასში შემოვიდა თუ არა, ეურნა-ლი მაგიდაზე დადო და ფანჯარასთან მივიდა. ისედაც გაც-

რეცილ სახეზე ფერი სულ დაჰკარგვოდა... თურმე ეს მისი უკანასკნელი გაკვეთილი იყო, ღელავდა მოხუცი. იმ დღიდან პენსიაზე გადიოდა.

ბატონი პლატონი მშენებლობაზე დღესაც ჩვეულებრივზე ადრე მოვიდა. ერთხანს მშენებლობის უფროსს ესაუბრა, რალაცას უმტკიცებდა, მერე ჩვენ მოგვიხმო.

— ბავშვებო, თქვენ უკვე პატარები აღარ ხართ! — პირდაპირ დაიწყო მასწავლებელმა. — ხომ იცით, აქ ნაპოვნ ყოველ ნივთს ისტორიული მნიშვნელობა აქვს?

— ვიცით! — ყველას მაგიერ მივუგე მე.

ესიამოვნა.

— ჰოდა, ძალიან კარგი! თუ რაიმე იპოვოთ, უსათუოდ შემატყობინეთ, სხვებიც გავაფრთხილე.

— მაინც რა უნდა ვიპოვოთ? — ნაძალადევი ღიმილით ჩაეკითხა მამუკა.

მასწავლებელი ვერ მიუხვდა ეშმაკობას.

— როგორ თუ რა? უძველესი ფულები, ბალთები, სამაჯურები, ათასგვარი ჭურჭელი, ჩუქურთმიანი ფილები...

— ჰოო! — გაიკვირვა გიამ, — ოქრო?

— შესაძლოა, ოქროც!

— ვერცხლი?

— ვერცხლიც!

— აი, ქვის კავი ან ჟანგიანი ხანჯალი რომ იყოს?

— რაო, რამე ხომ არ გიპოვნიათ? — გამოცოცხლდა მოხუცი.

— არა, არაფერი...

მასწავლებელს გული დასწყდა.

— არა უშავს, დღეიდან უფრო ყურადღებით იყავით, ბავშვებო!

## ბურთი დანიკარბა

სათამაშო მოედანი, როგორც იქნა, შევარჩიეთ. იქვე, ჩვენი სკოლის მახლობლად, გზის პირად, ოღრო-ჩოღრო მინდვრის ორთავე ბოლოში სახელდახელოდ გადავზომეთ შვიდ-შვიდი მოზრდილი ნაბიჯი და აქეთ-იქით სარები დავარქვეთ.

ფეხბურთის კარები მზად იყო.

მზე გადაიხარა. ნელ-ნელა მიწყდა ექსკავატორების მონოტონური თუხთუხი. მუშები წავიდ-წამოვიდნენ. თითო-ოროლა მაინც დარჩა, ჩვენი მეზობლები ხომ იყვნენ და იყვნენ.

მალე გაღმუბნელებიც გამოჩნდნენ. გაგვიკვირდა, მათ შორის ბონდოიასაც რომ მოვკარით თვალი. წელზე დონიჭშემორტყმული შორიშორ გვივლიდა.

— შენ რას იწელები თუ იცი? — შეუტია მამუკამ.

— აბა, აბა, ცოტა ზრდილობიანად! — გაიკრიჭა ბონდოია, — თვალში ხომ არ გეპატარაებები?

— წადი, წადი, კოჭი გააგორე! — სხვა რომ ვერაფერი მოიფიქრა, ესლა მიაძახა უკვე მიმავალ ბონდოს მამუკამ.

— კარგი, სირცხვილია, ბიჭო! — შეწუხდა გია.

— ჰი, სირცხვილი! — ჩაიფრუტუნა მამუკამ. — წუხელ ვაშლის ხე რომ გამიკრიფა, ის არ იყო სირცხვილი?

— რალა დროს ეგ არის ახლა? გაჩუმდი!

მამუკამ არაფერი უპასუხა. ამისი დროც მოვაო, თუ იფიქრა. ერთი შეხედვით, თითქოს ყველაფერი რიგზე იყო, მხოლოდ ეკამ ამოგვართვა სული: გეყოფათ ამდენი ცდა, რაღას ელოდებითო.

ვხედავდით, მაყურებლებსაც თანდათან მოთმინება ელეოდათ. აქა-იქ უკმაყოფილო ფრუტუნნი გაისმა. რა გვექნა, ერთი მოთამაშე გვაკლდა. მოედანზე მაინც გავედით.

თამაში დაიწყო.

ფიცხლად შევუტით მოწინააღმდეგეს. გია პირველსავე წუთზე შესანიშნავი ფინტით გაუსხლტა მეტოქეთა ორ მცველს და ბურთი კარის გასწვრივ ჩამოაწოდა.

ატყდა ჟრიამული.

ბურთზე მოგვიანებით გასულ მამუკას პატიკომ დაასწრო.

გუჯუს ვერ იქნა და ვერაფერი მოვუხერხეთ. ამ დაბალსა და ჭირკივით ბიჭს ბურთი თითქოს ფეხებზე გამოვბოძა.

შემოგვიტყეს და მერე როგორ! წინ მხოლოდ მე და გია დავრჩით. თუნდაც უმნიშვნელო შეცდომას ყოველ წუთს შეიძლებოდა საბედისწერო შედეგი მოჰყოლოდა.

გავიდა თხუთმეტი წუთი...

ბრაზობდნენ გაღმაუბნელები. ვღელავდით ჩვენც.

ბონდოია ხომ სულ გადაიჩრია, ცოფს ყრიდა. ბურთს კი არა, ჩვენ დაგვდეგდა. ფეხის ყოველ გადადგმაზე სარმას გვიდებდა, ცდილობდა, როგორმე წავექციეთ, მაგრამ ნურას უკაცრავად, მე ყოველთვის აღრე ვუგებდი მზაკვრობას. ამან უფრო გაახელა, რომ იტყვიან, სინდისის

ძარღვი გაუწყვიტა. საწყალი გია ლამის ხელში შეიკლა, ერთი-ორჯერ ისე ძლიერ დასცა, არ მეგონა, თუ წამოდგებოდა.

აღშფოთდნენ მაყურებლები. ბაბუა ივანე დაემუქრა კიდევ, მანდ არ გამომიყვანოო. ეკას ხომ ძლივს აკავებდნენ. საცაა მოედანზე გამოიჭრებოდა.

ვინ იცის, შეხვედრის ბედი როგორ გადაწყდებოდა, ერთ უცნაურ შემთხვევას რომ არ ჩაეშალა.

ყველაფერი თვალის დახამხამებაში მოხდა.

გალმაუბნელთა კარებთან ზედახორისას ვილაცის ძლიერად დარტყმული ბურთი ვეება ორმოში ზუზუნით ჩაეშვა. მიჰყვნენ ბიჭებიც, მაგრამ გაგიგონიათ?! სადაა? ბურთი თვალსა და ხელს შუა გაქრა.

• •

გაოფლიანებული და სახედაძმარებული ბიჭები უზარმაზარი ზრმოს პირას ვდგავართ მიწაყრილზე და დანა პირს არ გვიხსნის.

გალმაუბნელები კარგა ხანია წავიდნენ. დანარჩენებიც მიმოიფანტნენ. დავრჩით: მე, გია, მამუკა და ეკა.

ჩამობნელდა.

— ჩავალ და ხელახლა მოვძებნი! — ამბობს გია.

— მაინც ვერაფერს ნახავ, ხვალამდე დავიცადლოთ! — ჩუმად, თითქმის თავისთვის ჩაილაპარაკა მამუკამ.

— არა! — გაჭიუტდა გია.

— მეც მოვდივარ! — მხარი ავუბი ამხანაგს.

მამუკა შეეყოყმანდა. ეკამ რალაცის თქმა დააპირა, მაგრამ, ეტყობა, გადაიფიქრა.

მე და გია ორმოში ფრთხილად ვეშვებით. კოლბოხებზე ფეხი გვისხლტება. ერთმანეთს ვაწყდებით, უხმოდ, ჩელისცეცებით დავბობლავთ სიბნელეში. ჩვენი ღუმლით შეფიქრიანებული მამუკა მოუთმენლად ცმუკავს.

— ჰა, რას შერებით? ჩამოვიდე?

— უკვე ამოვდივართ! — როგორც იქნა, გაეხმიანა გია. — მაინც სად დაიკარგა ბურთი! — ახლა მე მომიბრუნდა, — მიწამ ხომ არ ჩაყლაპა!

— იქნება, აქ სულაც არ ჩავარდნილა?

— რას ამბობ, ჩემი თვალით დავინახე, დაცემის ხმაც კი გავიგონე.

— ასეთ ამბავზე ბებიაჩემი იტყვის ხოლმე: ეშნაკი ხომ არ დააჯდაო.

— რა ვქნათ, ავიდეთ?

-- რა გაეწყობა, უნდა ავიდეთ! — უგუნებოდ ვეთანხმები მე.

— დათო! — ორმოდან თავი ამოვყავი თუ არა, გიას ხმა შემომესმა. — მოდი, მომეშველე!

მუხლებამდე მიწაში ჩაფლული გია ამაოდ ცდილობდა ამოძრომას. თავქვე სრიალით დავეშვი.

— რა იყო, რა მოხდა?

— აბა, რა ვიცი ამოვდიოდი და უცებ! — გიამ ხელები ჩამჭიდა.

საკვირველია, ავდენი ხნის შემდეგ, მხოლოდ ახლა შევამჩნიეთ ორმოს კედელზე სოროსმაგვარი ხვრელი.

— რა არის?

— არ ვიცი, მაგრამ ნამდვილად მჯერა, რომ ჩვენი ბურთი მანდ შეგორდა...



რატომღაც შევცბუნდი.

— ვითომ?

— წყალი არ გაუვა, ნამდვილად!

— მერედა, აქამდე რატომ არ შევამჩნიეთ!

-- ვიდრე ფეხი ჩამიცურდებოდა, პატარა იყო და ყურადღება არ მიმიქცევია.

ნათქვამი მენიშნა, ზვრელთან ჩავცუცქდი. საშინელი სუსხი და შმორის სუნი მეცა.

— გია, დათო! — ეს მერამდენედ შემოგვესმა ეკასა და მამუკას შეშფოთებული ძახილი.

— მოვდივართ, მოვდივართ! — ნაძალადევი სიმხნევით ავძახეთ მეგობრებს.

— ნეტავ, ღრმა თუა?

— დაიცა, ახლავე გავიგებთ! — ქვა მოვძებნე და ზვრელში ვისროლე: თხოპ! გაისმა სიღრმეში.

— არა, ღრმა არ უნდა იყოს, ვინ იცის, იქნებ...

— სუ, ჩუმად! — უმალ მიმიხვდა გია, რისი თქმაც შინდოდა, — მეც ასე ვფიქრობ.

— მერე?

— რა მერე! ჩუმად, ეკამ არ გაიგოს, ხომ იცი ენაჭარტალა გოგონების ამბავი. პირში არაფერი გაუჩერდებათ.

— მამუკას არ ვუთხრათ?

— მე ვეტყვი!

— გვირაბში აპირებ ჩასვლას?

— წამოხვალ?

შევყოყმანდი, არ ვიცოდი, რა მეთქვა. გიამ ღუმილი თანხმობად მიიღო და მკლავზე ღონივრად დამქაჩა.

## ზვირაგში

ყველაფერს ბედი უნდაო, ტყუილი როდია.

რალა სწორედ ამ ღამით ამოვარდა ეს ქარი! ჯერ ოდნავ წამოუქროლა, მთებზე ალაგ-ალაგ მიმოფანტულ პატარ-პატარა ღრუბლის ფთილებს წაეტანა, ერთმანეთში აურ-დაურია და იქუხა, იქუხა და მერე როგორ? საცოდავად აჭრიალდა ჩვენი ძველი სახლის კედლები. აზრიალდა სათოფურებივით ვიწრო სარკმლის მინები.

გაწვიმდა.

იატაკზე აქა-იქ მხიარულად აწკაპუნდა მსხვილ-მსხვილი წვეთები.

ჩვენებს რა ხანია სძინავთ.

სამზარეულოში კედლის საათმა ცხრაჯერ დარეკა.

„ნეტავ სად არიან ბიჭები? შეეშინდათ? მართლაც, ასეთ თავსხმაში ვინ სულელი გამოვა გარეთ? ეჰ!“ — ვფიქრობ მე.

ვგრძნობ. თანდათან მიმძიმდება ქუთუთოები, რალაც ურუანტელისმაგვარი სითბო მეღვრება მთელ ტანში.

„მოვლენ — არ მოვლენ?“

„მოვლენ — არ მოვლენ?“

კიდევ რამდენიმე წუთიც და, ალბათ, ჩამეძინება.

ანაზღად, ქარის შხუილში სტვენა ჩამესმა. გავინაბე. სტვენა განმეორდა, ახლა უფრო გარკვევით. ეჭვი არ იყო — ბიჭები იყვნენ.

საწოლიდან თითქმის წამოვფრინდი, ფაცა-ფუცით ჩავიცვი, მხარზე საწვიმარი მოვიგდე და ხელში მამისეული ფარნით კიბეზე ფეხაკრეფით დავეშვი.

გარეთ საშინლად ბნელოდა. თვალებთან თითს ვერ მიიტანდი. მხოლოდ აქა-იქ ჭიატებდნენ ციციანათელებივით ძილგამკრთალი ნათურები.

წვიმს, წვიმს გადაუღებლივ.

— რა ტიალი ქარ-წვიმაა! — უკმაყოფილოდ ბურტყუნებს მამუკა.

— ცოტა ხნით მაინც გადაიღოს!

— არა, ძმაო, ამის იმედი ნუ გექნება!

— მაშ, რა ვქნათ?

— ხვალისთვის რომ გადაგვედო?

მამუკა კიბის საფეხურზე ჩამოჯდა.

— ხვალისთვის? რას ამბობ, არაფრის გულისათვის!

— მართალია! — ვეთანხმები ამხანაგს, — შეძლება ზვალ გვიან იყოს!

— მაგრამ... ამ თავსხმაში...

— კარგი, გეყოფა! ტვინი ნუ წაიღე! თუ მოდიხარ, წამოდი, თუ არადა...

მამუკა წამით შეყოვნდა.

— ჰო, თქვი, ბარემ... — გაბრაზდა გია.

— რა დროს კინკლაობაა?! — ახლა მე შევეუტიე ორთავეს, — შენ ეს მითხარი, მოდიხარ თუ არა? — ვეკითხები მამუკას.

— აბა, როდის მითქვამს უარი?

— აი, ეს მესმის! კაცური სიტყვაა!

მამუკა წამოღგა.

— უნდა ვიჩქაროთ! ყველაფერი მზადაა?

— წერაქვები და ბარები აღრევე გამოვიტანე ფარდულიდან, ორმოში ყრია.

— სუ! — ფრთხილობს მამუკა, — ცოტა ხმადაბლა ილაპარაკე, ხომ იცი, კედელსაც ყურები აქვს.

— ერთი შენც! ასეთ ავდარში ძაღლსაც არ გამოაგდებენ გარეთ.

— სიფრთხილეს თავი მაინც არ სტკივა!

ანაზღად სადარბაზოს კარის ანჯამები საიდუმლოებით მოცული ხმით აქრიალდა.

კედლებს ავეყარით.

კარებში, ელვის შუქზე, ეკას გაფითრებული სახე გამოჩნდა.

— ეკა! შენ... შენ... აქ საიდან?! — სიბრაზისაგან ენა დაება მამუკას.

გოგონა დუმდა.

— თქვი, ენა ხომ არ გადაგიყლაპავს?!

სიცივისაგან აძაგძაგებულ ეკას პაჭუა ცხვირი ბეწვის პალტოს საყელოში ჩაურგავს. დუმს. ეტყობა, შეშინებულია.

— თავი დაანებე! ვერა ხედავ, რა დღეშია?! — გამოექომბა გია.

— ეკა! — ახლა მე მივუბრუნდი კუთხეში საცოდავად მიყუჟულ გოგონას, — აქ რამ მოგიყვანა? ვინ გითხრა?

— არავის არაფერი არ უთქვამს! — ძლივს ამოილუღლულა ეკამ.

გია და მამუკა რატომღაც ორჭოფულად დუმდნენ, აშკარაა, ჩემზე ეჭვიანობდნენ.

— თქვი, ნუ გეშინია!

— აბა, ვის რა უნდა ეთქვა, მე თვითონ გავიგონე  
ხველაფერი, ჩემი ყურით!

ბიჭებმა ერთმანეთს გადახედეს.

— ალბათ მთელ ქვეყანას მოსდომ! — ხელი ჩაიქნია  
მამუკამ.

საუბარში გია ჩაერია.

— მართლა, ვინმესთვის ხომ არ გითქვამს?!

— არა!

— იქნებ ბაბუა ივანეს უთხარი!

— სიტყვა არავისთვის არ მითქვამს! — ლამის ატირ-  
და ეკა.

გია მოლბა.

— დიდი ხანია იცდი?

— არა!

— მერედა, მარტოკას არ შეგეშინდა?

— ცოტა! — გულახდილად ეღიმება გოგონას, — თუმ-  
ცა რისი უნდა მშინებოდა, თქვენ ხომ აქ მეგულეობდით!

უნებურმა ქებამ წამალივით იმოქმედა ბიჭებზე.

— მართლაცდა, რატომ არ უნდა წამოვიდეს! — გაი-  
ოცა მამუკამ.

— სწორია! — დაემოწმა გია.

ეკამ ისედაც წვრილი კისერი წაიგრძელა და მხია-  
რულად აჭიკჭიკდა:

— იცნა რა, ბიჭებო? ყოველი შემთხვევისათვის, ბამ-  
ბა და იოდი წამოვიდე.

— ჩვენ კი არ მოგვგონებია!

— ყოჩაღ, ეკა!

ქუჩაში ზარის გაბმული რეკვით სახანძრო მანქანამ ჩაიქროლა.

— ასეთ კოკისპირულ წვიმაში ხანძარი? — გაიკვირვა ეკამ.

— ალბათ ნამუხარადან მოდიან ისევ!

— მერედა, ამ დროს იქ რას აკეთებდნენ?

— მაშინაც ასე არ იყო, დათიკო მეეტლის თავლას ცეცხლი რომ წაეკიდა, ესენი ნამუხარაზე იყვნენ წასულები, თუმცა შენ ეს საიდან გეცოდინება.

— მიუსწრეს?

— კი! მთელ ქალაქს კარგა ხანს იქიდან მიჰქონდა უთოს გასახურებლად ნახშირი!

ეკას გაეცინა. გამხიარულდნენ ბიჭებიც. გიამ კარი გამოაღო.

— ეჰ, ბაბუა ივანეს ხმალიც რომ გვექონდეს! — ინატრა ვილაცამ.

ვიცანი. მამუკა იყო.

\* \*

წვიმს, წვიმს...

ისევ მძვინვარებს ქარაშოტი.

გულსაკლავად ჭრიალებენ ხეები, ტოტებით ერთმანეთს აწყდებიან.

ჭახანით ცვივა კრამიტები.

ეზოში ნამდვილი ნიაღვარია.

გზას ელვის შუქზე მივიკვლევთ.

წინ გია მიდის, მერე — მამუკა და ეკა, ბოლოს — მეორე მხრის მხარეზე. ფარნები ავანთებთ და ჩასასვლელად მოვემზადებთ.

ახლა ჩვენი როლები შეიცვალა. მეწინავე უკვე მე ვარ. საწვიმრის კალთებზე გია ჩამფრენია, არ ჩაეარდესო, გიას მამუკა მოყვება, მამუკას — ეკა.

გვირაბში შესასვლელი, რატომღაც, ახლა უფრო ფართო მეჩვენა. ამხანაგებს გადავხედე. ფარნის მკრთალ შუქზე ფერწასულნი ჩანან, მხოლოდ თვალები გაფართოებულიათ. ფარანი ახლა შესასვლელს მივანჯქე. შმორისა და სიღამპლის სუნმა ლამის დამარეტიანოს.

— ჩანს რაიმე? — მეკითხება აკანკალებული გია.

პირველი, რაც დავინახე, ვეება ლოდზე ამოკვეთილი საფეხურები იყო, რომელიც ქვემოთ, სიღრმეში ეშვებოდა.

— მგონი, ჩასასვლელი უნდა იყოს!

— აბა, ცოტა იქით მიიწი! — ახლა გია ჩააშტერდა სიბნელეს.

ეკა და მამუკა მოუთმენლად ცმუკავენ.

— ნამდვილად საფეხურებია!

— რა ვქნათ?

— განა ამას კითხვა უნდა?

ცოცხალი გამოტეხილი ჯობია, შევცბი. წვიმის წვეთებით ისედაც დასველებულ შუბლზე ჭირის ოფლმა დამასხა. ჩემი შეკრთომა ამხანაგებს არ გამოპარვიათ.

— შეგეშინდა? — ნიშნისმოგებით შემომაცქერდა გია, — მაშინ, წინ მე გამიშვი.

ამას კი არ მოველოდი.

— არა, მივდივარ!

— დაიცა, წელზე თოკი მაინც გამოიბი! — ჩაერია „წინდახედული“ მამუკა.

ვეება ლოდი თუ კლდე, რომელზედაც საფეხურები იყო ამოკვეთილი, შლამსა და რაღაც წებოვან, ტალახისფერ სითხეს დაეფარა.

ფეხი წამდაუწუმ მისხლტებოდა, ექვსი-შვიდი საფეხურის ჩავლის შემდეგ ფილაქანივით მაგარ ნიადაგზე აღმოვჩნდი.

მიმოვიხედე. ჭერის სიმაღლე ალბათ მეტრ-ნახევარს არ აღემატებოდა. როცა ფარანი ჩემს წინ ფარდასავით დაშვებულ სიბნელეს მივაშუქე, სინათლის ჭავლი დაუსრულებელმა წყვდიადმა შთანთქა.

— ჩახვედი? — მომესმა გიას ხმა.

კი-მეთქი, ავძახე.

— ხედავ რამეს?

— საშიში არაფერია, მხოლოდ კედლებია და მეტი არაფერი! სათითაოდ ჩამოდით!

ჭერ მამუკა და ეკა ჩამოჰყვნენ თოკს, ბოლოს გიაც ჩამოვიდა. ერთხანს ასე ვიდრეკით, ხელიხელჩაკიდებულნი და გულის ფანცქალით ვუგდებდით ყურს ირგვლივ ჩამოწოლილ სიჩუმეს.

ზემოთ კი ისევ წვიმდა. წვიმდა კოკისპირულად.

სიჩუმე გიამ დაარღვია:

— რაღას ველოდებით?

— წავიდეთ! — ვთქვი მე.

მამუკამ თოკი დაახვია და მხარზე გადაიკიდა.

საუკუნეების წყვდიადსა თუ დავიწყების ბურუსში



ჩაკარგული გვირაბი გამოცოცხლდა. ნესტიან კედლებზე: ჩვენი ლანდები ათამაშდნენ.

ოდროოდრო, მოლიპულ ფილაქანზე სიარული გვიჭირს. ნაბიჯ-ნაბიჯ მივიწვეთ წინ.

შიშმა თანდათან გაგვიარა. მალე სიბნელესაც შევეჩვიეთ. გვირაბი ოდნავ შესამჩნევად თავქვე მიემართება. კედლები მეტწილად რიყის ქვითაა ამოშენებული. ალაგ-ალაგ ძველებური ოთხკუთხა აგურებისაგან შეკრული ნიშებიცა, ალბათ სანათურების დასადგმელად.

მივდივართ უხმოდ, კოჭებამდე ტალახში. სინესტისა და სილამპლის საშინელი სუნი ყელში გვიჭერს.

— გახსოვთ, შარშან არქეოლოგები რომ იყვნენ! — ვამბობ მე, — ალბათ ამ გვირაბს ეძებდნენ.

— იმათ ვერ მიაგნეს და აი, ჩვენ კი აღმოვაჩინეთ!

— ჰო, ჰო! — გულზე მჯილს იცემს გია, — რა ამბავი იქნება, როცა გაიგებენ! შეიძლება გაზეთშიაც გაგვეწერონ.

— ვაითუ გაგვიცხონ, უჩვენოდ გვირაბში მარტოდ-მარტო შესვლა როგორ გაბედეთო.

— მგონი, თავზე ხელს არ გადაგვისვამენ!

— ვნახოთ! — იხტიბარს არ იტეხს მამუკა.

შევჩერდი. უცებ ჩემი ფარნის შუქი, თითქოს მოსცე-ლესო, მარცხნივ კედელში გაუჩინარდა.

— რა მოხდა? — შეკრთა ეკა.

— აუ, რამოდენა დარბაზია!

— განძის შესანახი თუ იყო.

დარბაზში პირველი ეკა შეხტა.

— შეხეთ, აქ როგორი სიმშრალეა! — უკვირს გიას, —  
მოდით, ცოტა შევისვენოთ!

ეკა უკვე ჩამოსკუპდა კუთხეში მიგდებულ ლოდზე  
და ახლა სიცივისაგან გათოშილ თითებს სანთლის ალზე  
ითბობს.

— რა დროს დასვენებაა! — მხრები აიწურა მამუკამ, —  
მოდით, გადავთხაროთ აქაურობა, იქნებ, რამეს წავაწყ-  
დეთ!

— მაინც? — ეშმაკურად ეღიმება გიას.

— უძველესი ფულები, ბალთები, სამაჯურები, ათას-  
გვარი ქურჭელი, ჩუქურთმიანი ფილები.

— ოქრო?

— შესაძლოა, ოქროც! — მშრალად ახველებს მა-  
მუკა.

— ვერცხლი?

— ვერცხლიც!

— აი, ქვის კავი და ან ქანგიანი ხანჯალი რომ იყოს?

— რაო, რამე ხომ არ გიპოვიათ?!

— არა, არაფერი!..

— ოჰ! — ოხრავს მამუკა, — არა უშავს, დღეიდან  
უფრო ყურადღებით იყავით, ბავშვებო!

— ჩვენს ისტორიის მასწავლებელს არა ჰგავს? —  
ეკისკისებს ეკა.

— კარგი, გეყოფათ ხუმრობა! — გამბობ მე, —  
მამუკა, გია, მოკიდეთ წერაქვებს ხელი!

მიწისქვეშა ქვებზე ნაპერწკლების ფრქვევით ხრჭია-  
ლებენ, სხლტებიან წერაქვები.

— ერთი, ორი, სამი!

— ერთი, ორი, სამი! — წერაქვების ყოველ შემოქნე-  
ვაზე ითვლის ეკა, — აბა, მარჯვედ! მამუკა, ნუ ზარ-  
მაცობ.

თითქმის მთელი დარბაზი გადავთხარეთ.

— ეჰ, არაფერიც არ არის! — მამუკა წერაქვს მიწა-  
ზე ანარცხებს და ეკას გვერდით ჯდება.

— აბა, აბა, ასე როგორ შეიძლება! — უტევს ეკა, —  
მიდი ჩქარა!

მაგრამ მამუკას ადგილიდან დაძვრა არც ისე ადვილია.  
განძის პოვნის იმედი მეც გადამეწურა. უხალისოდ  
ეჩიჩქნილი მიწას.

გია სახელოთი ოფლს იწმენდს სახეზე.

— რა კენათ? წავიდეთ? — მეკითხება.

— წავიდეთ!

— ალბათ უკვე თენდება!

— არა, ჯერ აღრეა!

— მაინც უნდა ვიჩქაროთ!

— გათენებამდე უნდა გავიდეთ აქედან!

— არა მგონია, დიდი გზა იყოს დარჩენილი!

მისიმედ, წელათრევით წამოვიშალენით. მოსახვევთან  
ეკას ფეხი დაუცდა ეტყობა, უხერხულად დაეცა. ახლა  
კოჭლობით მოგვეყვება, სიცივისაგან კბილსკბილზე აცე-  
მინებს.

— ხომ არ დავბრუნდეთ, ჰა? — ეს მერამდენედ გვე-  
კითხება ხმადაბლა მამუკა.

გიას დაბრუნებაზე სიტყვის გაგონებაც არ უნდა,  
მაგრამ მამუკაც თავისას არ იშლის.

— მაშინ მე ეკას წავიყვან და ისევ დავბრუნდები!

აქამდე ეკა ჩუმად გვისმენდა, მაგრამ როცა საქმე მის დაბრუნებაზე მიდგა, რომ იტყვიან, ქვა ააგდო და თავი შეუშვირა.

ისევ გზას ვაგრძელებთ. ეკა ცდილობს, არ ჩამოგვრჩეს. მამუკა სულ მთლად მოიკუნტა, წამდაუწუმ წუწუნებს, მეტი აღარ შემიძლიაო.

ჯერ იყო და, ჩემი ფარანი ჩაქრა. ვატყობ, არც დანარჩენებს მოელით კარგი დღე.

უკვე ეკაც იცრემლება ჩუმ-ჩუმად.

— ბიჭებო, თქვენი ჭირიშე, დავბრუნდეთ, თორემ მერე გვიან იქნება, სიბნელეში დავრჩებით!

— ცოტაც კიდევ და გავალთ!

— გია! — გავძახე წინ წასულ მეგობარს.

გია შედგა. სევდიანი თვალებით შემომხედა, ვინ იცის, გულის რომელიდაც კუნჭულში შიშმა თუ გაიღვიძა.

— რა იყო, დავბრუნდეთ?

— დავბრუნდეთ, გია, ხომ ხედავ, რა დღეში ვართ!

— როგორც გინდათ, მე კი მჯერა, რომ აქვე, სადღაც მახლობლად, გასასვლელია... ცოტა კიდევ გვევლო მაინც!

მაგრამ თითქოს გიას უკანასკნელი სიტყვები არც გაუგონიათო, ეკა და მამუკა გასასვლელისაკენ შებრუნდნენ.

გია ერთხანს გაქვავებულივით იდგა, ეტყობა, ყოყმანობდა, ბოლოს ისიც ჩვენ გამოგვყვა.

მალე მისი ჯიბის ფარანიც ჩაქრა. დავრჩით ორიოდღე

სანთლის ანაბარად. ერთადერთ ფარანს ხანგამოშვებით  
ვანთებთ. ეკას უკვე სიარული უჭირს.

მივდივართ უხმოდ, უგუნებოდ.

ანაზლად გიას მხიარული შეძახილი შემოგვესმა:

— ბიჭებო, ჩვენი ბურთი!

ბურთის პოვნამ ყველანი გაგვახარა.

— ხომ ვამბობდი, ბურთი აქ არის-მეთქი! — გაპყვიროდა აღტაცებული გია და ბურთს ხელში ათამაშებდა.

— აბა, მიჩვენე! — წაეტანა მამუკა.

— დაჩუტულა!

გიამ მამუკას ხელახლა ჩამოართვა ბურთი. საპირეზე მოჭერილი კანაფი გახსნა. დაჩუტული ბურთი კინკრიხოზე ნაბდის ქუდივით მოირგო და გაბრწყინებული თვალე-ბით შემოგვხედა.

## ოშია ოში ღაიფყო

უთენია აირბინა ციხისგორაზე ბონდომ.

არაფრით არ სკეროდა ბურთის ისე უცნაურად დაკარგვის ამბავი. მისთვის რომ გეკითხათ, ეს საქმე წინასწარ იყო მოფიქრებული, წაგების შეეშინდათო.

ახლა კი ერთი სული ჰქონდა, როდის ნახავდა იმ სამშაქრისჭამია ბიჭს და ბოლოს და ბოლოს სინამდვილეს ფარდას ახდიდა. მათი ასავეალ-დასავეალი ხომ ხუთი თითივით იცოდა. ჰოდა, პირდაპირ მშენებლობისაკენ გასწია. მაგრამ უნდა გენახათ მისი გაოცება, როცა ვერც ერთს ვერ მოჰკრა თვალი.

ერთხანს გარე-გარე იარა, იტრიალა, ჯერ კიდევ ადრეა და მალე გამოჩნდებიანო. მაგრამ ამოდ, მათი ჩრდილიც არ დაულანდავს.

ბონდო შეფიქრიანდა, მერე უცებ შუბლზე შემოირტყა ხელი. თავის თავზე მოუვიდა ბრაზი. რატომ ადრე არ მოვიფიქრე, ალბათ სათევზაოდ წავიდოდნენო.

სულ ნაბიჯ-ნაბიჯ შემოიარა მუხნარი, ჰესზეც ავიდა, იქაურობა მთლიანად გადაჩხრიკა, მაგრამ გავიგონიათ, ვინ დაგიკარგავს, ვის ეძებ.

სიბრაზისაგან ლამის თავგზა აერია. ასე არასდროს უღალატნია მისთვის გუმანს. მან ხომ ყველაფერი იცოდა. იცოდა, სად, რომელ ხეზე, რომელ ჩიტს ბუდეში რამდენი კვერცხი ედო; ვის სად ედგა მსხლისა თუ ვაშლის ხე, ალბათ, იმასაც გეტყვოდათ, რამდენი ცალი ნაყოფი ესხა.

„ეს შაქრიჭამიები, მაშ, ვერ უნდა ვიპოვნო...“ — ბოლმა ახრჩობდა ბონდოს.

ისევ მშენებლობაზე დაბრუნება არჩია.

ახლა აღარ ჩქარობდა. სირბილისა და ეკალ-ბარდებში ტორღილისაგან არაქათი გამოლეოდა.

მოსახვევთან ბაბუა ივანე წამოეწია. აიწურა.

იმ დღის შემდეგ ბერიკაცთან პირისპირ შეხვედრას ჯაურბოდა.

ახლაც თვალი მოარჩიდა.

— ბონდო არა ხარ, ბიჭო, შენ? — შეაჩერა მოხუცმა.

— ჰო, ბონდო ვარ, ბაბუა!

— ამ უთენია აქეთ სად ყოფილხარ?

— მუხნარში ანკესები მქონდა ჩაყრილი და... —  
იჯრუა ბონდომ.

— ბიჭები ხომ არ გინახავს?

— ვინ, ბაბუა? — თითქოს ვერ მიუხვდა ბონდო.

იწყინა მოხუცმა.

— როგორ? იქნებ ისიც თქვა, გიას, დათოს და მამუ-  
კას არ ვიცნობო.

— არა, არ შემხვედრიან!

— არც ის იცი, ამ დროს სად არიან ხოლმე?

— აბა, მე საიდან უნდა ვიცოდე?

— მაშ, არავენ არ გინახავს, არა?

ბონდო შეყოყმანდა. ხომ არ ეთქვა, მეც იმათ დავე-  
ძებო, მაგრამ ღუმილი არჩია.

ბაბუა ივანე პასუხს არ დალოდებია, ისევ გზას გაუდ-  
გა. ბონდოს არ გაჰკვირვებია მოხუცის ასე დილა-  
ადრიან გამოჩენა. ბაბუა ივანეს ადრე ადგომას ხომ ჩი-  
ტიც ვერ დაასწრებდა. შვილიშვილის ჩამოსვლამ კი  
მთლად ფრთები შეასხა ბერიკაცს.

ასე იყო ამ დღითაც.

უთენია შვილიშვილის დასახედად წამომდგარმა  
თვალეbs არ დაუჯერა, საწოლი ცარიელი რომ დახვდა.

ჯერ იფიქრა, სადმე აქვე იქნებო. დაელოდა. მერე  
ბალში გამოვიდა, დაუძახა კიდეც, მაგრამ თქვენც არ მო-  
ძიკვდეთ, არსაიდან პასუხი არ იყო. გამოდი, გოგო,  
ნუ მემალეები, გეყოფა ამდენი ხუმრობაო. ხეწნა-მუდა-  
რამ რომ არ გასჭრა, გაბრაზდა: კაი, აბა, იყავი  
მანდ, ვნახოთ, სანამდე იქნები! როცა მუქარამ, და-  
ვიჭერ და ჰინჭრით აგიჭრელებ მაგ წვივებსო, — არ

უშველა, შიშისაგან გულამობრუნებულმა მოხუცმა მთელი სახლი ყირაზე დააყენა.

„ალბათ, იმ ბიჭებს გაჰყვა სათევზაოდ“. ამ ფიქრმა ოდნავ დაამშვიდა. „აქაოდა, ვაითუ ბაბუამ არ გამიშვასო, და გამეპარა. ეთქვა მაინც, იქნებ მეც წავსულიყავი. ჰო, ამას წინათ, კუდამოძუებულნი რომ ვიფრინე ყველა, სამაგიეროს მიხდიან... დამიბრიყვეთ ბერიკაცი, არა? კარგი!“

ნაბიჯს აუჩქარა.

„აბა, დამიხვდით, თუ ბიჭები ხართ!“

მიდის ბაბუა ივანე და ატყობს, რომ გული თანდათან ულბება.

„იმ ბიჭებს რომ ვემღური, იქნებ სათევზაოდ სულაც არ წასულან და აქვე, სკოლის მშენებლობაზე ტრიალებენ. ჰოდა, ის ჩემი მატრაკვეცა გოგოც ალბათ იქაა!“

ეს აზრი ჭკუასთან უფრო ახლოს იყო. გაუხარდა. იმედი მიეცა ბერიკაცს.

გაოცებულმა ბონდომ კარგა ხანს უყურა აჩქარებით მიმავალ მოხუცს. ვერა და ვერ მიმხვდაროყო, ამ უთენია დილით ასე გამწარებით რად დაეძებდა ბიჭებს ბაბუა ივანე.

სკოლის მშენებლობაზე მისულმა ბერიკაცმა გაოცებისაგან კინალამ ჩაიკეცა. ეზოში მუშების ჭაჭანება არ იყო. დუმდნენ ბელტიყლაპია ექსკავატორები, ბულდოზერები.

ახლა კი მართლა შეეშინდა ბაბუა ივანეს. თვალებს უმწეოდ აცეცებდა აქეთ-იქით.

ანაზღად მოსახვევიდან ეტლი გამოჩნდა, წელში ოდნავ მოხრილი მეეტლე თავდაუზოგავად მიერეკებოდა ისედაც ოფლში გახვითქულ ცხენებს.



— რა იყო, რა მოგივიდა? — შესძახა მოხუცმა თავ-  
ზეხელაღებულ მეეტლეს.

— ომია, ომი დაიწყო! — ცხენების ფლოქვების აქა-  
რა-თქურსა და ეყვნების ჟრიალში ძლივს გაიგონა ბერი-  
კაცმა მეეტლე ბიკიას ხრინწიანი ხმა. ვიდრე გონს მოვი-  
დოდა, ეტლი შუკაში მიიმალა.

„ომი, ომი? — თავისთვის იმეორებდა მოხუცი, — რა  
ომი? რისი ომი? ვისთან? რატომ? ალბათ მთვრალია ეგ  
ოხერი!.. ის გოგო მაინც სად დაიკარგა? ღმერთო, ღმერ-  
თო!“ — უკვე აღარ იცოდა, საით წასულიყო. ცრემლჩამ-  
დგარი თვალებით გასცქეროდა უკაცრიელ ქუჩას, დილის  
გამქვირვალე ბურუსში ჩაძირულ ციხისგორას ფერდო-  
ბებს, სახლებს..

ირგვლივ სიჩუმე გამეფებულიყო, განუმეორებელი  
სიჩუმე, რომლის მხოლოდ მოხუცებს ესმით.

ახლა, თითქოს ერთი დაქუხება იყო საჭირო, რომ  
უკაბადონო ცის ვეება ლაყვარდი ბროლის პატარ-პატა-  
რა ნამსხვრევებად წამოსულიყო ციდან.

## ცოცხლად დამარხულები

უბედურებაო, რომ იტყვიან, სწორედ ამას ჰქვია. გა-  
დაუღებელ კოკისპირულ წვიმას თავისი გაეტანა. მიწა ჩა-  
მოქცეულიყო და გვირაბის გასასვლელი ამოექოლა. გა-  
რედან ჩამი-ჩუმი რა არის, ისიც არ ისმოდა.

ერთხანს ყველანი გაქვავებულნი ვიდექით. გვინდო-  
და, გვეყვირა, მაგრამ ხმას ველარ ვიღებდით. თავზარდა-

ცემულნი მიეჩერებოდით გვირაბის ჩახერგილ გასასვლელს.

ვიდექით ასე ენაჩავარდნილები, მოწყვეტილები ყველასა და ყველაფერს.

სიჩუმეში გარკვევით ისმოდა ჰერიდან ჩამონადენი წყლის წვეთების წკაპუნი.

— ერთი, ორი, სამი, — გაოგნებული ვითვლიდი — ოთხი, ხუთი... არა, ეს ზღაპარია, სიზმარია... ექვსი... შვიდი... ეს ხომ წარმოუდგენელია, არა, ასე არ შეიძლება...

სწორედ შვიდი საფეხური აქვს გვირაბის კიბეს...

წამიც და ჩვენმა სასოწარკვეთილმა ყვირილმა აახშიანა მთელი მიწისქვეშეთი. ვყვიროდით რაც ძალი და ღონე შეგვწევდა.

სადღაც, გულის სიღრმეში, ჯერ კიდევ ბუტავდა იმედის ნაპერწკალი. ვფიქრობდით, ვინმეს ხმას მივაწვდენდით, მაგრამ ამაოდ.

წყლის წვეთები კი ისევ წკაპუნებდნენ ფილაქანზე. ისევ ერთმანეთს ჩავჭიდეთ ხელი, ახლა ჩვენი თავის ერთადერთი მხსნელი ისევ ჩვენ ვიყავით.

— გეყოფათ, ბიჭებო! — რაღაცნაირი შეცვლილი ხმით თქვა გიამ, როცა ცოტა გონს მოვეგეთ. — გასასვლელი უნდა გავწმინდოთ!

მიწა ბარსა და წერაქვს ადვილად მოჰყვებოდა. ვმუშაობდით რიგ-რიგობით, დაღლამდე. ეკამაც გამოიღო ხელი.

ალბათ გარეთ უკვე დიდი ხანია გათენდა. ვინ იცის, იქნებ წვიმამაც გადაიღო და ზაფხულის ცხრათვალა, კაშ-

კაშა მზე სხივებად იღვრება. ქივივიებენ ჩიტუნები. ჩვენი ახალი სკოლის მშენებლებიც რა ხანია მოვიდნენ სამუშაოზე. ბატონი პლატონიც იქ იქნება. იქნებ ბონდოიამაც გამოიარა. ჰაი, ჰაი, როგორ ამაყად აივლჩაივლის, ესაო და... ეჰ! ჩვენ კი? ჩვენ რომ არ ვიქნებით? ვინ იცის, იქნებ მთელ ქალაქში გვეძებენ... დაგვეძებენ მშობლები, ნათესავეები, მეგობრები. გვეძებს მილიცია... ჩვენი კვალი კი არსად ჩანს. ვის მოუვა აზრად, რომ აქვე, მიწისქვეშა გვირაბში ვართ ცოცხლად დამარხულები.

ნელ-ნელა მივიწვეთ წინ, ზევით, სიცოცხლისაკენ. უკვე კლდეში ნაკვეთი საფეხურებიც გამოჩნდა. თითქოს ექსკავატორის გუგუნიც შემოგვესმა. ყველანი გავინაბეთ.

— გესმით?

— ნამდვილი ექსკავატორია!

— იქნებ ჩვენს აქედან გასვლამდე გამოარღვიონ გასასვლელი!

ეკას უკვე ცრემლები გაშრობოდა, ხმა ჩახლეჩოდა. ერთადერთი სანთელილა ციმციმებდა საცოდავად. ჯიბის ფარნები დიდი ხანია ჩაგვიქრა. შიმშილისაგან კუჭი გვეწვის. წყურვილს როგორღაც თიხის ძველისძველი წყალსადენიდან გამონაჟური წყლით ვიკლავთ, გვირაბის მთელ სიგრძეზე რომ მიჰყვება. ალბათ ამ წყაროს წყალს სვამდნენ ალყაშემორტყმული მეციხოვნენი.

— მეტი აღარ შემიძლია, ლამისა, გული შემიღონდეს! — წუწუნებს მამუკა.

გია ხმას არ იღებს. ვდუმვარ მეც. აბა, რას მოგვიტანს სიმწრით თითების მტვრევა.

— აჰა, გამომართვით! — ამბობს გია და შაქრის ორ მოზრდილ ნატებს გვაწვდის.

ეკა და მამუკა თავთავიანთ წილს წუწნიან, მე და გია კი ისევ ჭიბეში ვინახავთ. ვინ იცის, რა მოგველის.

მუშაობას თავს არ ვანებებთ, მაგრამ ვგრძნობთ, რომ თანდათან არაქათი გვეცლება. სიცვივისაგან ვკანკალებთ. ხელებს მალიმალ ვიორთქლავთ.

ერთი ფიქრი არ გვცილდება გონებიდან: გავალთ კი აქედან! უცებ მიწის ზევაი ხელახლა ჩამოწვა და გია ლამის ქვეშ დაიტანა.

გაწყდა ერთადერთი იმედის ძაფიც.

ისევ დარბაზს შევაფარეთ თავი.

ცოტა ხნის შემდეგ გია და მამუკა გვირაბიდან მეორე ჯასავლელის საძებნელად წავიდნენ. დავრჩით მე და ეკა.

ის უკვე არ ტირის. ზის თავისთვის კუთხეში და ხმას არ იღებს. მე დარბაზის კედლებს ვათვალიერებ. ერთგან ჭერი ჩამონგრეულა და იატაკზე ქვა-ლორდი ყრია.

— ნეტავ აქამდე სად არიან ბიჭები? — მეკითხება ეკა.

— მოვლენ, ნუ გეშინია!

ეკამ მკლავები მუხლზე შემოიჭლო, ერთხანს გაირინდა.

— დათო, როგორ ფიქრობ, გავალთ აქედან?

— რა თქმა უნდა, უსათუოდ გავალთ!

ეკამ თავი ჩაღუნა.

— მე შენ სხვანაირი მეგონე, ეკა!

— უფრო გამბედავი, უშიშარი... არა? მერე, მე ხომ არ ვტირი? არც ვწუწუნებ! — გოგონას ხმა აუკანკალდა.

— დამშვიდდი, ყველაფერი კარგად იქნება, ნუ დე-  
ლავ, აი, დაბრუნდებიან ბიჭები და წავალთ!

ეკა გაჩუმდა. რატომღაც სული მეხუთება. შარვლის  
ჭიბეში გადანახული შაქრის ნატეხი კანს მიწვეავს.

ანაზღად ხმაური შემოგვესმა. სმენად ვიქეციით.

— ალბათ ბიჭები ბრუნდებიან.

— არა, უფრო რაღაცის დაცემის ხმას ჰგავდა!

— ვაიმე, ბიჭები?

— წავალ, ვნახავ!

ეკა მკლავებში ჩამაფრინდა.

— არა, არ გაგიშვებ!

ხმაური ისევ განმეორდა, მაგრამ ახლა უფრო ყრუდ.

— ეტყობა, სადღაც მიწა ჩამოინგრა! — ვთქვი მე.

ეკა მთელი ტანით ცახცახებს. გია და მამუკა არც ისე  
დიდი ხნის წასულები იყვნენ, მაგრამ სიფრთხილეს თავი  
მაინც არ სტკიოდა. ყოველნაირად ვცდილობ, ჩემი მღელ-  
ვარება როგორმე დაფთარო. ერთხანს ეკას გართობა ვცა-  
დე. ათასგვარ ამბებს ვუყვებოდი, მაგრამ მას თითქოს  
არაფერი ესმისო, კრიჭა შეეკვროდა. ასანთი აევანთე. დარ-  
ბაზის ერთ კუთხეში რაღაც უცნაურ ბარელიფს მოვკა-  
რი თვალი. ყალყზე შემდგარი ქორბუდა ირემი ჩლი-  
ქებით სივრცეს ტორავდა. უკან მშვილდ-ისარმომარჯვე-  
ბული მხედარი მისდევდა ფეხდაფეხ.

— ეკა, მოდი, რა გაჩვენო!

ეკა უხალისოდ მომიახლოვდა.

ასანთი ხელახლა გავკარი.

— შეხედე!

გოგონამ შუბლზე ჩამოშლილი ქერა კულულები ხელის ერთი აქნევით უკან გადაიყარა, იქვე კედელთან მიდგმულ მრგვალ ქვაზე შედგა და ბარელიეფს დააკვირდა. უცებ ქვა შეტორტმანდა, გოგონას ფეხი აუსხლტა. ალბათ წაიქცეოდა, დროზე ხელი რომ არ მიეშველებინა. ქვა, რა თქმა უნდა, გადაბრუნდა, ხოლო კედელში ბარელიეფის ადგილას რაღაცამ ყრუ ჭახანი გაიღო. ვიფიქრე, თავზე ქერი ხომ არ გვენგრევა-მეთქი.

შიშისაგან ორივე ადგილზე გავშეშდით. ასე ვიდრე ერთხანს.

— დათო! — ბოლოს, როგორც იქნა, ხმა ამოიღო ეკამ, მაგრამ სათქმელი ველარ დაამთავრა, სიტყვა ჩაუწყდა. როცა ისევ ამოიღო ხმა, იფიქრებდით, მის მაგივრად უკვე ვიღაც სხვა ლაპარაკობსო. — რა მოხდა? რა ამბავია ჩვენს თავს?

მე უხმოდ, ხელის კანკალით მოვიძიე ჭიბეში ასანთის კოლოფი და ავანთე.

ჩვენს წინ, ერთი მეტრის სიმაღლეზე კედელი გახსნილიყო და თვალებში შავი სიცარიელე გვიძზერდა.

— საიდუმლო სეიფი თუ არის! — ცოტაოდენი დუმბილის შემდეგ ვთქვი მე და ასანთი ხელახლა ავანთე. „სეიფში“ პაპიროსი „კაზბეკის“ ნახევრად დაცლილი კოლოფი და ასანთის მეტი არაფერი აღმოჩნდა.

— ამას აქ რა უნდა? — გაიოცა ეკამ, — ნუთუ მაშინაც ეწეოდნენ პაპიროსს?

— არა, ეკა! მგონი, სხვაგვარადაა საქმე! ეტყობა, გვირაბში ჩვენამდე ვილაცები ყოფილან.

— მაშ, გვირაბს გასასვლელი ჰქონია!

— მართალია! — უმალ დავეთანხმე მე. — აი, შეხედე! — ახლა მეც დავინახე იქვე, ფილაქანზე დაგდებული პაპიროსის ნამწვავი.

— რა ვქნათ? — მეკითხება შეეჭვიანებული ეკა.

— ჯერჯერობით არაფერი, ბიჭებს უნდა დაველოდოთ!

ეკა უხმოდ დამეთანხმა და ისევ ძველ ადგილს დაუბრუნდა დარბაზის კუთხეში.

მაინც როგორ მძიმედ გადის ლოდინის წუთები... თითქოს მთელი საუკუნე გავიდა მას შემდეგ, რაც ბიჭები წავიღნენ... მწარე ფიქრები გულს მიღრღნის. არ ვიცი, როგორ მოვიქცე. ეკას მართო დატოვებაც რომ არ შეიძლება? საბრალო გოგო, როგორ შეიცვალა! არა, რაღაც უნდა ვიღონო!

— ეკა, ადექი, წავიღეთ!

— მერე ბიჭები? — გაოცებით შემომხედა ეკამ.

— ბიჭები ალბათ შემოგვხვდებიან, ვინ იცის, იქნებ უჭირთ რამე. ლოდინს ისევ წასვლა სჯობია...

ჩვენი დარბაზიდან გამოსვლა და ბიჭების გამოჩენა ერთი იყო.

— რა იყო, რატომ შეგაგვიანდათ?

— სანთელი ჩაგვიქრა, მთელი გზა სიბნელეში მოვდიოდით!

— არის გასასვლელი?

— არ ვიცი, ბოლომდე არ გავსულვართ!

— ეს ტიალი გვირაბი იმოღენაა, დასასრული არ უჩანს! — ხელი ჩაიქნია მამუკამ.

გიამ სანთელი აანთო და უცებ უკან მიდგა, ახლა შენიშნა გამორღვეული კედელი.

— აი, ეს ვიპოვეთ შიგ, — ვთქვი მე და პაპიროსის კოლოფი გავუწოდე.

მამუკა ხმას არ იღებს, ისედაც დიდი თვალეზი გაცეზისაგან კიდევ უფრო გაფართოებია.

— ეგ ხომ საიდუმლო სეიფია! როგორ მიაგენით! — იკითხა გიამ.

ყველაფერი დაწვრილებით მოვუყევი.

გია ჩაფიქრდა.

— გვირაბს მეორე შესასვლელი რომ აქვს, ამას თქმა არ უნდა, მაგრამ საინტერესოა, ვინ იყვნენ ისინი, ჩვენამდე აქ რომ შემოვიღნენ...

— იქნება იმათ გაძარცვეს აქაურობა და პაპიროსი და ასანთი შემთხვევით დარჩათ...

— შესაძლებელია! — დაეთანხმა მამუკას გია.

— რა ვქნათ? — ხელმეორედ იკითხა ეკამ.

— დროა, წავიდეთ! — აფუცხუნდა მამუკა.

— დაიცათ! — წინდახედული გია კვლავ ჩაფიქრდა, — აი, რა: ეს პაპიროსის კოლოფი და ასანთი ისევ თავის ადგილას უნდა დავდეთ!

მე უმალ მივუხვდი ამხანაგს.

— ქვას ისევ გადავაბრუნებთ და კედელიც დაიხურება.

ასეც მოვიქეცი. სეიფში პაპიროსის კოლოფი და ასანთი ისევ იმ ადგილას დავდეთ. გიამ კედელთან მიდგ-



მული ქვა ფრთხილად გადააბრუნა. კედელი ჩაიკეტა.  
ყველამ შვებით ამოვისუნთქეთ.

-- უნდა წავიდეთ, — თქვა გიამ.

ჩიბეში გადანახული შაქრის უკანასკნელი ნატეხები  
უხმოდ გავიყავით და გიას მივყევით.

უკვე აღარაფერი დაგვრჩენოდა იმედის გარდა, რო-  
მელიც ჩვენი ერთადერთი სანთელივით ბუუტავდა.

— შეუძლებელია გასასვლელი არ იყოს! — დაბე-  
ჭითებით ვთქვი მე.

— ალბათ, იქ, ზევით, დიდი ხანია გათენდა...

— ვინ იცის, იქნებ დალამდა კიდეც...

— ნეტავი თუ დაგვეძებენ?

— საბრალო დედიკო! — ამოიოხრა გიამ.

— ეჰ, ვინმესთვის მაინც გვეთქვა!

— აბა, რას ვიფიქრებდით!

კოტა ხანს შევისვენეთ.

— ხომ არ ჯობდა, გვირაბის შემოსასვლელი ხელახ-  
ლა გვენახა, ვინ იცის, იქნებ...

— ამას მერეც მოვესწრებით! — მოკლედ მომიჭრა  
გიამ.

დახუთული, მძიმე ჰაერი თითქოს თანდათან მსუბუქ-  
დებოდა.

აგრილდა კიდეც. გამოვცოცხლდით, უძილობისაგან  
დამძიმებული ქუთუთოები თავისთავად გაგვეხსნა.

— ჰა, როგორ არის საქმე? — დროდადრო უკანმოუ-  
ხედავად გვეკითხება მამუკა.

— მიდი, მიდი, ნუ ჩერდები! — ვეხმიანებით მეწინა-  
ვეს.

სანთელი კი ღნება და ღნება.

— შევისვენოთ?

— არა, იარე!

— დავიდალე, აღარ შემიძლია!

— ახლა უკვე ბაღე გავალთ, ცოტა კიდევ მოითმინეთ! — ეცდილობ ამხანაგების გამხსნევებას.

ანაზღად საიდანღაც ნიაგმა დაქროლა. საცოდავად აპარპალდა სანთლის ალი.

— ბიჭებო! — იყვირა მამუკამ, — გასასვლელი!

ყველანი ადგილზე გავშეშდით.

ჩვენს წინ სარკმელივით პატარა ხვრელიდან თვალის-მომჭრელმა სინათლემ იფეთქა.

— ვაშა! — აღრიალდა გახარებული გია და მოულოდნელობისაგან გაოგნებული ეკა გასასვლელისაკენ გაიტაცა.

ვიღას ახსოვდა დაღლილობა, შიმშილი, უძილობა, სიცოცხლე...

— ეს რაღაა? ნამუხარას ხიდთან გამოვსულვართ! — აქეთ-იქით იხედება მამუკა.

— ბიჭებო, ბიჭებო! — იცინის ეკა, — გახედეთ, მეხანძრეები მოდიან!

მართლაც, შორიდან ჯერ ზარის გაბმული რეკვა მოისმა, მერე კი სახანძრო მანქანაც გამოჩნდა.

— ალბათ დღეს ქალაქში დიდი სიცხე იქნება!

— ეეჰე! — გასძახიან მამუკა და გია.

— ეეჰე! — იმეორებენ რიყრაყისფერი მთები, ბანს აძლევენ ხუჭუჭა ჭალაკები და ტყეები. ასე გვგონია,

უფრო მხიარულად ქლურტულებს ჩვენი საყვარელი, პატარა მდინარე.

...მოწმენდილ ცაზე კოცონივით გიზგიზა, დიდი, წითელი მზე ამოდის.

გამარჯობა, ჩვენო მშობლიურო ქალაქო!



## კ უ ნ ტ ა

პატარა, პროვინციული ქალაქი ის-ის იყო იღვიძებდა, ვარსკვლავებით მოკენჭილ ცაზე მთვარის შუქი ფოფონებდა.

თენდებოდა.

მოდითოდა ნამდვილი კოლხური დილა, ისეთი, როგორიც მხოლოდ შავი ზღვის პირას, დასავლეთ საქართველოში იცის.

ოღროხოღრო ქუჩაზე ძველმა, დანჯღრეულმა ეტლმა ხრიგინით ჩაიქროლა. მალე მოსახვევს მიეთარა, სადგურისაკენ გასწია.

— ბიკიამ ჩაიარა! — თქვა გიამ და ბიჭებს მიუბრუნდა: — უნაბის ხე სად დგას ხომ იცით? იმ ადგილას მესერს გამოსწევთ და გადაძვრებით. ძაღლისა ნუ გეშინიათ, გუშინ დილას წაიყვანა საშიკო ტყირპიანმა, ჩემი თვალით ვნახე. ვარდენას ღობისკენ რომაა, იმ ტოტზე არ გახვიდეთ, ქათმებია. იმ ბრუტიან მამალს კი, უდროოდ როს რომ ყივის, თუ ვარ ბიჭი, მალე მეორე თვალსაც დავუვსებ!

მამუკას ხმა არ ამოუღია. სიმინდებში ჩაცუცქული ბალახებს წიწკნიდა, ეტყობა, შიშს აეტანა.

მეც უხმოდ ვუსმენდი, ისე კი, კაცმა რომ თქვას, ახლა ძილი ყველაფერს მერჩია.

— აბა, წადით! — თქვა გიამ, — მე აქედან გითვალთვალე. თუ საჭირო იქნება, დაგისტვენთ.

მამუკა ფორთხვით გაძვრა სიმინდებში. ყანის ბოლოს რომ მივიდა, გამომხედა.

— რაღას უცდი? ცოტა ჩქარა წამოდი!

ლეღვის ხის გასაკრეფად მივეშურებოდით. ხე ჩვენი მეზობლის, ფარნა ნადარეიშვილისა იყო. ფარნას შინაურობაში კუნტას ეძახდნენ (კუნტა მეგრულად მოკლეს ნიშნავს, მაგრამ საოცარი ის არის, ამ სახელის პატრონი ორი მეტრი სიმაღლისა მაინც იქნებოდა). ახლო მეზობლობაში რომ გეკითხათ, კუნტა როგორი კაციაო, ზოგი რას გეტყვოდათ და ზოგი — რას. ერთნი ამტკიცებდნენ: ჭკუასთან მწყრალად არისო, მეორენი, პირიქით, — თავის

თავისთვის ჭკუა არ აკლიაო. იმასაც ამბობდნენ, თავის დროზე კაი გვარიანი ვაჟკაცი იყო, მაგრამ ოცდაოთხში, არეულობის დროს, „ბუნტოვნიკებს“ აპყვა, დაიჭირეს, გალახეს და მას მერე ასე გამოლენჩებული დადისო. არ ვიცი, ეს ამბავი მართალია თუ არა, მაგრამ ერთ რამეს, ცხრა ხატზე რომ დამაფიცონ, მაინც ვერ გადამათქმევენებთ: კუნტა პატიოსანი და უწყინარი კაცია. სამი შვილი ჰყავს: ორი ვაჟი და ერთი გოგო. ყველაზე უმცროსი, ვახო, წლისა თუ იქნება. მთელ ახლომახლო მეზობლობაში, მგონი, ეს ერთადერთი ბავშვი იყო, რომელიც ამ განანია ოპის დროს დაიბადა.

კუნტა სახლში არაფერს აკეთებდა. ერთი ბეწო ეზოს მისი ტარანივით გამხმარი ცოლი ამუშავებდა. თვითონ კი დილიდან გვიან სალამომდე აივანზე იჯდა და მეზობლის ბიჭს ნარდს ეთამაშებოდა. ზოგჯერ მისი მოგვარე, პიონერთა პარკის ფოტოგრაფი უწევდა პარტნიორობას.

კუნტას ხანდახან სადგურში, მატარებელზე უყვარდა დახვედრა. ბარგის წაღება-წამოღებაში ეხმარებოდა მგზავრებს. ტარიფი ერთი ჰქონდა — ათი მანეთი. ზოგჯერ მგზავრები ატყუებდნენ. ორ ბარგს ერთმანეთს გადააბამდნენ და ფარნასაც მიჰქონდა ხმის ამოუღებლად.

კუნტა ღვინოს არ სვამდა. მაგრამ ერთხელ თურმე ვილაცამ დაათრო და ნამღვილ გიჟს დაემსგავსა. გადაი-რია, აიწყვიტა. ხმალამოწვდილი გამოენტო ეზოში. მეუღლის სიმწრით მოწეული სიმინდები მოსცელა ერთიან. აბა ვინ გადაუდგებოდა წინ? ვისაც ჯანი ერჩოდა, ყველა ჯარში იყო. რას შვრები, რას შვრებიო, ერთი-ორჯერ

კი შეუძახა დიანოზა მკედელმა, მაგრამ საქმე შემოგლავია? ვინ შეუშვა ყურში.

ვის ებრძოდა მაშინ? ვინ ეგონა სიმინდები, ასე დაუნდობლად რომ ცელავდა? გერმანელები? თუ თავისი უმადური ცხოვრების ტევრს მიაჩრევდა. იქნებ, მაშინ სადღაც, გულის სიღრმეში, მიძინებულმა ნაპერწკალმა აანთო, ააფორიაქა, ცეცხლი შეუთო სულს, შემოუტრიალა გადაბრუნებული გონება და ცხოვრების უკუღმართობის წინააღმდეგ აამხედრა. ვითომ? არ ვიცი, არაფერი არ ვიცი? მხოლოდ ეს კი ვიცი, რომ იმ დღიდან კუნტა საოცრად შეიცვალა. ოღესღაც სევდიანი მზერა გაუშკაცრდა. ზეზეულად ჩამოხმა, ღვინის სმასაც მოუხშირა, მაგრამ ასეთი რამ აღარ გაუმეორებია...

...მე უკვე ხეზე ვიყავი. რაღაც იღუმალად შრიალებდნენ ფოთლები. უცებ მჭახე ტკაცანის ხმა გაისმა. ქვეშოთ, სიმინდებში განაბული მამუკა დაფრთხა.

— რა მოხდა? — ასძახა მცირეოდენი ღუმილის შემდეგ ამხანაგს.

— არაფერია, პატარა ტოტი მომიტყდა!

— ფრთხილად, არ ჩამოვარდე!

— ნუ გეშინია!

— ხედავ რაშეს?

— უპ, სავსეა. შენც ამოდი!

— ხომ იცი, ფეხი მტკივა! — იცრუა მამუკამ.

მე არაფერი მიპასუხნია, ერთხანს სიჩუმე ჩამოვარდა.

— ამდენ ხანს რას შვრები? ჭაამ?

არც ახლა ვაღივრებ პასუხი.

— გეყოფა, ჩამოდი!

— ჰო, ჩუმად, ჩამოვდივარ!

ანაზღად სიბნელეში რაღაცამ გაიშლივინა. მამუკა მოულოდნელობისაგან მიწას გაეკრა, მერე უცებ წამოხტა და ლობეს კისრისტეხით გადაევლო.

— რომელი ხარ მანდ? — მეხის გრგეინვასავით გაისმა კუნტას ხმა.

სუნთქვაშეკრული ხის ტანს ავეკარი.

— რომელი ხარ-მეთქი? — გაიმეორა კუნტამ.

მე ვღუმიდი. იქნებ ვერ მხედავს-მეთქი, მაგრამ კუნტა თითქოს მიმიხვდაო, არ მეშვებოდა.

— მაშ, კარგი! — თქვა ბოლოს. — მე თვითონ აშოვალ მანდ და ამ ხმლით დაგაჭრი მაგ ყურებს!

ხეზე ტოტი შეირხა.

— ბიძია ფარნა!

— არ იტყვი, რომელი ხარ?

— მე ვარ, ბიძია ფარნა, დათო! მაპატიე, მეორედ არ ვიზამ! — ხმა აშიკანკალდა.

— რომელი დათო?

— ქეთეს შვილიშვილი. მაპატიეთ, ბიძია ფარნა!

— ჩამოდი!

— ხომ არ მცემ?

— გეუბნები, ჩამოდი-მეთქი!

— მითხარი, ხომ არ მცემ?

— ჩამოდი, შე მამაძაღლო!

— აბა, არ ჩამოვალ!

— კარგი, იჯექი მანდ, ერთი ვნახავ, სანამდე იქნები! — თქვა და ლელვის ძირას ჩამოჯდა:

— ბიძია ფარნა!



ფარნა ხმას არ იღებს.

— ბიძია ფარნა!

ფარნა ისევ დუმს.

„რაც მომივა, მომივა... ჩაველ!“—როგორც იქნა, გადავწყვიტე და ხილან ჩამოვეცოცდი.

მიწაზე ცალი ფეხის დადგმა და ყურში ხელის წაღება ერთი იყო.

— რა გიქნა ახლა მე შენ?

— ვაი, ყური, ყური! — საცოდავად დავიკენესე.

— არა, უნდა აგახიო!

— მაპატიე, ბიძია ფარნა!. ვაი, დედა, ყური!

— ეგ რაა? — გამობერილ უბეზე - თითი მატაკა კუნტამ. — ლელვია?!

— ჰო!

— აბა, ჩამოყარე, ჩქარა!

ქამრიდან ხალათის კალთები ამოვწიე. მწითლე, დაჭყლეტილი ლელვები მსუბუქად, ბაყა-ბუყით ჩაცვივდა ბალახებში.

— ახლა დაჯექი და ჭამე! — მიბრძანა ფარნამ, ისე რომ, ყურზე ხელი არ შეუშვია, — სულ უნდა შეჭამო!

— ამდენს რა შემაჭმევს?

— ეს არ ვიცი მე!

— ნახევარი იყოს! — შევევაჭრე.

— არა, სუყველა! — ქვა ააგდო ფარნამ.

— მაშ, კარგი! — ყასიდად დავყაბულდი. — მხოლოდ ყურზე ხელი გამიშვი, მტკივა!

— იცოდე, ვერ გამეჭტევი!

— აბა, მე რომელი გამეჭტევი ვარ, ბიძია?

— კარგად გიცნობ, რა ნაჭედი ხატისა ხარ. შენ არ გამიკრიფე საადრეო ვაშლის ხე?

— მე?

— ჰო, შენ! აბა, სხვა ვინ იქნებოდა? შენ და იმ ბონდოია კისერმოსატეხმა. შენ გგონია, ვერ ვიცანი შენთან მეორე ვინ იყო?

— არავინაც არ ყოფილა!

— უყურე ამას?! ტყუილის თქმასაც რომ ბედავს! თქვი, ვინ იყო! ბონდო იყო, ხომ? მითხარი და გაგიშვებ... ო, ბონდო, ბონდო! დამაცადოს! თუ კიდევ დავინახე ჩემს ეზოში, ჩემს ხეზე, მამაჩემსა აქვს ცხონება, ჟაკანით ჩამოვიღებ ხიდან სკვინჩასავით.

— ბიძია ფარნა! — უკანასკნელად შევეცადე ჩემი მტანჯველის გულის მოღობობას, — თუ გინდა, ხვალ დილას მოროდში მოგეხმარები.

— ასე გუშინაც მითხარი, თუთის არაყს მოგიტანო.

— არა, ახლა არ მოგატყუებ, არაყსაც მოგიტან და მოგეხმარები კიდევ.

— ვითომ? — შეყოყმანდა კუნტა.

— მამას გეფიცები, ბიძია ფარნა!

ახლა კი მოტყდა ფარნა, ახლომახლო მეზობლებში: ყველაზე მეტ პატივს მამაჩემს სცემდა, ნასწავლი კაციაო. თურმე, ერთხელ მამა სოფლიდან მომავალ ფარნას შეხვედრია, ჩაუსვამს „ემადინში“ და სულ ხრიალ-ხრიალით ჩამოუყვანია ქალაქში. მამაჩემი ახლა ჯარშია, მეორე მობილიზაციით წავიდა.

— რას შვრება, წერილს თუ იწერება?

მივუხვდი, მამაჩემზე შეკითხებოდა.

— გუშინ მივიღეთ წერილი, მგონი, ფრონტზე მივ-  
დივართო...

ფარნას არაფერი უთქვამს. თავისთვის რაღაც ჩაი-  
ბურტყუნა და ხმალი სიმინდებში მოისროლა.

## შავი ქალაქი

ჩვენს სახლს სკოლის ეზოსაგან ერთი ხის მესერი  
ყოფს, უფრო სწორად, ყოფდა, რადგან ეს მესერი გასულ  
ზამთარს, თებერვლის შუა რიცხვებამდე ძლივს მოგვყვა.  
სკოლაში ახლა მეზღვაურთა სამხედრო ჰოსპიტალია. კა-  
რებთან მაღალი, დაბღვერილი მეზღვაური დგას ავტომა-  
ტით ხელში. ჩვენ საბავშვო ბაღის შენობაში დავდივართ  
სამეცადინოდ. ელექტრონი კვირაში ორ-სამ დღეს თუ  
ჩაგვიკრავს თვალს. გაკვეთილებიც მაშინ გვიმთავრდება,  
როცა ლამპაში ნავთის უკანასკნელი წვეთი ამოშრება.

დილიდან საღამომდე სულ მეზღვაურებში ვტრია-  
ლებ, რომლებიც ბებერი წაბლის ხის ძირას დომინოს  
ქვებს თავგამოდებით უხატქუნებენ ხის გაუჩორკნავ მა-  
გიდებს. თუ რამეზე დამასაქმებენ, უარს არ ვამბობ,  
დავრბივარ კოჩია „მეტაქის“ ჭახრაკივით; ვყიდულობ  
ყველაფერს, ცხაღია, რისი შოვნაც შეიძლება.

ჩვენს სასტუმრო ოთახში მეზღვაურთა ექიმი ადა-  
მოვსკი ცხოვრობს ცხრამეტი წლის შვილთან, იგორთან  
ერთად. მეუღლე და ქალიშვილი ადამოვსკის არმავირში  
დარჩენია. ახლა იქ გერმანელები არიან. თვითონ, ჯარში  
გაუწვევიათ თუ არა, უმცროსი ვაჟიშვილი თან წამოუყ-  
ვანია.

იგორი მთელი დღეები სახლში ზის, ქალაქში გასვლას ერიდება. უწყინარი ბიჭია. არც მამამისს დაემდურება კაცი, სულ არყის სუნად რომ არ ყარდეს.

ერთი ბებიაჩემისა და მისი საუბარი უნდა მოისმინოთ:

— კეტევან გიორგიევნა, ტი მათა მამა!

— ჩტო? — ეკითხება ბებია.

— მა-მა! — გულზე ხელს იდებს ადამოვსკი.

— რა მამა აუტყდა, ბიჭო, ამ ყაზანს? — უკვირს ბებიაჩემს.

— ჩემი დედა ხარო, გეუბნება! — ვუხსნი მე.

— მერე მამა აქ რა შუაშია? — მეკითხება ბებია.

— მამა რუსულად დედანს ნიშნავს.

— კაი ბიჭო, გეყოფა ციგნობა!

— მართალს გეუბნები!

ბებიას ჩემი მაინც არ სჯერა.

— მამა ნეტ, დე-და!

— ააა, — იცინის ადამოვსკი, — დე-და! ჭარაშო!

ბებია აღფრთოვანებულია, გამომწვევად მიყურებს, არც ისეა საქმე, შენ რომ გგონიაო.

სახლის წინ, კოინდარზე ვწევარ, თითქმის მიწამდე გადაცელილი ბალახი ტიტველ ტანზე მჩხვლეტს: გუშინ ბებიამ ერთი იჯრა მუხუდოს ფქვილში გადააძოვინა ნიკანდრო მეეტლის ცხენს.

— დათო, დათო! — მომესმა უცებ ვილაცის ბოხი ხმა.

ვიცანი. ჩვენი ჰოსპიტლის მზარეულია, მიკოლა.

სკოლის კარებთან საბარგო მანქანა თუხთუხნებს. მან-

ქანაში რამდენიმე მეზღვაური და მედიცინის დები დგანან. ყველას ვიცნობ.

— საბანაოდ არ წამოხვალ? — მეკითხება მიკოლა.

„აბა, ამას კითხვა უნდა, ამ პაპანაქება სიცხეში მდინარეში ჭყუმპალაობას რა სჯობია!“

მე უკვე ძარაზე ვარ.

— ყველანი ვართ? — კითხულობს მიკოლა.

— ყველანი! — კარკაცებენ გოგონები.

— წავედით! პოლნი ხოდ, ვპერიოდ! — მხიარულად გასცა ბრძანება მიკოლამ და კაბინაში ჩაჯდა. დავიძარით. მანქანაზე სიმღერა წამოიწყეს:

„მშვიდობით, ჩვენო ქალაქო,  
ხვალე გავდივართ ზღვაში...“

ყველაზე ხმამაღლა მედიცინის და პაშკა გაჰკივის. ყველას უყვარს ეს მხიარული და მუდამ ხითხითა გოგონა. პაშკა კვირაში სამჯერ ჰოსპიტლის ეზოში კინოფილმებს უჩვენებს. თურმე ომის დაწყებამდე უკრაინის რომელიღაც ქალაქში კინომექანიკოსად მუშაობდა. ფილმზე დასწრება, რა თქმა უნდა, უფასოა. ჰოდა, ჩვენც, მთელი უბნის ბიჭები სულმოუთქმელად მოველით ამ დღეებს. კინოს სანახავად ახლო სოფლებიდანაც მოდიან, მაგრამ ყველას არ უშვებენ, არ შეიძლება, აკრძალულიაო. ეს ისე, კინოს დაწყებამდე, მერე, მოგეცათ ლხენა, ნელ-ნელა, თითო-თითოდ, ორ-ორად მოძვრებიან და მოძვრებიან სიბნელეში.

— მალე დავბრუნდებით? — ვეკითხები იაშა კასტიზელოვს, რომელიც თითქმის მისწებებია პაშკას, და სახე-

ლოზე ვქაჩავ. იაშა უკვე გაეწერა ჰოსპიტლიდან და ხვალ ბრუნდება გემზე.

— შენ რა, გაგიჟდი?—გაოცებული მიყურებს იაშა,— ჯერ არ მივსულვართ და უკან როდის დავბრუნდებითო; მეკითხები?

— რაო, დათო, ეჭვიანობ? — კისკისებს სანიტარი დორა.

— ჯერ მიწას არ ასცილებია და უკვე შეყვარებულია! — ნაძალადევად როხროხებს იაშა. — არა, ძმაო, ამისთანა მეზღვაურთან მართლაც ღირს ქიშპობა!

— მაგრად დადექ, არ შეშინდე, ჩაძირული გემის კაპიტანო! — მამხნევებს ვილაცა.

— აბა, თავს ნუ იგდებთ! — გაწიწმატდა პაშკა, — დათო, მოდი აქ, ჩემთან! შენ კი, — ახლა იაშას მიუბრუნდა, — ხანდახან კომპასს დახედე, გზა ხომ არ გეშლება!

პაშა მართლაც კარგი თვალით მიყურებს. იქ, უკრაინაში, შენი ტოლი ლამაზი დაიკო მყავს, სიძედ უნდა წაგიყვანო.

მე მხოლოდ ახლა, მანქანაში მომაგონდა, ერთ ნათესავ ქალს ეწერში გადასაცვლელზე წაყოლას რომ დავპირდი.

მანქანამ მკვეთრად მოუხვია.

მალე ნოდელაც გამოჩნდა. წყალი შესამჩნევად დაკლებულიყო.

ხიდქვეშ ბონდოია და მისი ამხანაგები გაშოტილიყვნენ. ბონდომ დამინახა თუ არა, წამოიწია.

— აა, მოვიდა მშვიდობის მაძიებელი!

— ვინ თქვა, არ მოვაო?

— მოდი, ბიჭო, შენ აქ! — წამოდგა აკანკული პატიკო.

— რა გინდა! — აგდებულად გავეპასუხე მე, თუმცა ძალიან კარგად ვიცოდი, რაც უნდოდა ჩემგან. ამასწინათ კედლის გაზეთში მასზე იუმორისტული ლექსი დავწერე და ახლა სამაგიეროს გადახდას მიპირებდა.

— კიდევ არ დაანებებ თავს გიჟპოეტობას?

— მიდი, ერთი, ამოარტყი ჭიტლაყი და გააგდე აქედან! — შეაქეზა გუჯუმ, ისე რომ, თავი არ წამოუწევია.

— ცოდოა, იტირებს!

— რა გინდათ ამ ბიჭისაგან? — უეცრად თავზე წამოდგა ბიჭებს პაშა.

— ეგ ვინდაა? — გადაფიჩინდნენ ბიჭები.

— აბა მოუსვით აქედან, თორემ... — გაბრაზდა პაშკა.

— ბიჭებო! — ანაზღად ვილაცამ გადმოგვცახა ხილიდან, — დათო ხომ არ არის მანდ?

ჩემი დეიდაშვილი მკითხულობდა.

— რა იყო, ვაჟა? — ავძახე მე.

— ბებია გეძახის, ჩქარა მოვიდესო.

— არ მეტყვი, რა მოხდა?

— ბიძიას შავი ქალაღლი მოვიდა!

მოულოდნელობისაგან გავქვეყდი. თვალები ცრემლით ამევსო.

— რა მოხდა? — შეწუხდა ჩემი ასე უეცარი ცვლილებით პაშა.

მაგრამ მე თითქოს ყელში რაღაც ბურთივით ჩამჩარესო, ხმა ვეღარ ამოვიღე.

— დიადია პოგობ! — წამოილულულა პატიკომ.

ხილზე მდგარმა ქალაქისაკენ გავიხედე. ცას ერთი შავი ღრუბელი ეკიდა. თითქოს, პირდაპირ ჩვენი სახლის თავზე.

### სიმიინდის სატახად

ოქტომბერში ისევ ახალი მობილიზაცია დაიწყო. ახლა მეეტლეებთან ერთად ცხენებიც წაიყვანეს, მაგრამ ჩემი მოსისხლე მტერი, მეეტლე ბიკია ისევ დააჯლიგინებს თეთრქაჩაჩიან ცხენებს. კოჩია „მეტაქკეს“ კი ჯერ ჩამოართვეს მისი ჯაგლაგი, მერე უკანვე დაუბრუნეს: მაგისი არც ხორცი ვარგა და არც ტყავი, ადგილზე მისვლამდე სადმე ფეხებს გაფშეკსო.

ქალაქში მხოლოდ სამხედროებს თუ ნახავ. ბაზარში წიწაკიანი არყით გამოობრუებული მეზღვაურები დაშლიგინებენ.

საწყალი ლისა ბებიას მესამე ვაჟის — დათიკოს დალუპვის ამბავი მოვიდა. ერთხელ კიდევ აწრიალდა ჩვენი პატარა ქუჩა, კიდევ ერთი ახალგაზრდა ქალი დაქვრივდა, კიდევ ერთ ეტლს შემოავლეს კოფოზე შავი არშია, კიდევ ერთ ცხენს ჩაუწნეს ფაფარში შავი ლენტე.

მტერი კავკასიონის კარებთან იდგა. ქალაქიდან სვანეთისაკენ მწკრივ-მწკრივად დაიძრა ტყვია-წამლითა და მარილით სავსე ურმები. გაცოცხლდა ძველი კოლხური სიმღერა მეურმეზე. გაუსაპნავი ღერძების ყურისწამდე პრიალს შეუერთდა სიმღერის ნალვლიანი მოტივი:

გლეხიკაცი ურემზე ზის,  
ხელთ უპირავს წკნელი გრძელი,  
ჩიდის, მისთვის მიიმღერის,  
გულს ულადრავს პანგი მწველი...



ჩვენი სკოლიდან კიდევ სამი მეათეკლასელი წავიდა. დანარჩენები, მესამე კლასის ზემოთ, დროებით დაგვიტოვეს და ახლა, ყოველ დღით, უთენია, სიმინდის სატეხად დავდივართ.

გამთენიისას ყოველთვის ბებია მალეძებს.

— ადექი, შვილო, უკვე დროა, ივანეს მამალმა ლამის ყანყრატო ამოიხიოს.

ან კიდევ:

— რა ძილქუში დაგეცა თავზე?! რა ამბავია ამდენი ძილი?!

ზოგჯერ სულაც არ მძინავს. ვწეჯარ თვალეზღახუქული და საბრძოლო ნიშანივით ველოდები ბებიაჩემის ხმას.

— დათო! — ანაზღად მომესმა ვიღაცის ძახილი, — ქეთე ბებია, დათო სახლშია?

— კი, შვილო, აბა სად უნდა იყოს? — უკვირს ბებიაჩემს.

საწოლიდან უხმოდ ვდგები და კარისკენ მივდივარ. ესტატე ბიძიას ეზოში ბონდოს უფროსი და დგას.

— დათო, ბონდო არ გინახავს? — მეკითხება ნამტი-რალევი ხმით.

მე გაოცებული, ნამძინარევი თვალეზღახუქული მზიას. ღმერთო ჩემო, სად უნდა მენახა ბონდო ამ დილა-უთენია? არა, არ მინახავს-მეთქი.

-- რა ვქნა, წუხელ სახლში არ ყოფილა. სად იქნება, ეს მაინც არ იცი?

— გუშინ კი დავინახე, შუადღისას....

— სად იყო?

— ის, პატიკო და მეეტლე ბიკიას ბიჭი, გუჯუია, მატარებელს გაჰყვნენ სადღაც.

მზია წავიდა.

იხლახლა ლოგინში ჩაწოლა სისულელე იქნებოდა. ფეხშიშველი ჩავდივარ ეზოში. ჭასთან ხელ-პირს ვიბან. ჰოსპიტლის ეზოში ნაცნობი მეზღვაური შეშას აპობს. ჩაჯახის ყოველ შემოქნევაზე ხვნეშის, მერე წელში იმართება, სახელოთი სახიდან ოფლს იწმენდს. უკოკარდო მეზღვაურის ქუდი ხორა-ხორად დაყრილ შეშაზე მიუგდია.

— ჰეი, გამარჯობა, მეზღვაურო! — მეძახის მხიარულად. — როგორაა საქმე?

— გუშინდელზე უკეთ!

— მოდი, შეშა არ გინდა?

— არა, გმადლობთ!

შეშა, მართლაც, არ გვინდა. სიცივით ჯერ არ ცივა.

— მოდი, ნუ ინაზები, კაპიტანო, თორემ უფროსები მოვლენ და მერე გვიან იქნება.

— არ მინდა, სხვა დროს იყოს!

— ჰო, მართლა, სიძე-პატარძალი თავს როგორ გრძნობენ? — ამას პაშა და იაშა კასტიბელოვზე მეკითხება. საბანაოდ წასვლის მეორე დღეს ხელი მოაწერეს. იაშას ამის გამო ორი კვირით გაუგრძელეს შვებულება და ბებიას თანხმობით ჩვენს სახლში ატარებენ თათლობის თვეს. მე და ბებიას ახლა სამზარეულოში გვძინავს.

მეზღვაური როხროხებს. სიცილის დროს მთელი ტანი უთახთახებს, ბაგირივით დაგრეხილი კუნთები უთამაშებს.

— მათ ბრწყინვალეობას გადაეცი, პროხორიჩმა უმდაბლესი სალამი გადმოგცათ-თქო. უთხარი, პატივი დამდონ და ღღეს ჩაიზე მეწვიონ.

— .ძია იაშა, მგონი, ღღეს აპირებს წასვლას.

— ვიცი, ერთად მივდივართ. მომწყინდა მიწაზე ღოღილი, ეჰ, — ფიქრს მიეცა პროხორიჩი, — რა სჯობია ზღვას! აი, წევხარ შენთვის გულაღმა გემბანზე და შესცქერი ვარსკვლავებით მოჭედილ ცას... სახეზე ზღვაური გელამუნება, შრიალებენ ტალღები, ყიპყიპებენ თოლიები... შენ გინახავს ზღვა?

— კი, ბავშვობაში ქობულეთში ვყოფილვარ...

— ზღვის წყალი თუ დაგიღვევია?

უნებურად მეცინება. იმ წელს მამამ ზღვაზე წაგვიყვანა. ჩვენს პატარა მდინარეში ასე თუ ისე მხრებგაწაფულს მეგონა, ცურვა ვიცოდო. მაგრამ ზღვაში შესვლა და ტალღის დარტყმა ერთი იყო. ფეხქვეშ უმაღლ გამომეცალა მიწა და ჩავყვინთე, კიდევ კარგი, ნაპირთან ახლოს ვიყავი და დროზე შემამჩნია მამაჩემმა. ზღვის წყალი, რა თქმა უნდა, კარგა გვარიანად გეახელით...

— რა გაცილებს? — განაწყენდა მეზღვაური.

— ზღვის წყალი როგორ არ დამიღვევია? მგონი, იმდენი დედის რძეც არ შემისვამს.

— აი, ეს მესმის, ჩვენებურია, მეზღვაურული! — პროხორიჩი ფართოდ გაღეღილ მკერდზე უროსავით მჯიღის იბაგუნებს, — გამოდგები, კაპიტანო!

ნამუხარამდე, სადაც ჩენი სკოლისათვის სამუშაოდ განკუთვნილი ყანებია, ასე, ხუთიოდე კილომეტრი თუ იქნება. უთენია გასულები მზის ამოსვლამდე იქა ვართ. ჩვეულებრივ გზას ერთი საათი უნდა. მაგრამ ერთხელ...

ის იყო შუკას მოკლეზე ავეყვით, კოჩიას ორთვალა წამოგვეწია. წინათ ბევრჯერ წავუყვან-წამოვუყვანივართ გადასახვევამდე. არც ჩვენ ვრჩებოდით ვალში, გამომარგლული სიმინდის კონებს ვაძლევდით ხოლმე. ახლა, რატომღაც, ზედაც არ შემოგვხვდა. ერთი კი დაუწრუპუნათავის ბეხრეკს და ჩაგვიარა. ერთხანს უხმოდ მივდევდით უკან. ჰა, ახლა გვეტყვის, დაჯექითო, ჰა, ახლაო, მაგრამ ვინაა უკან მომხედავი, ვინ გეპატიეება! ბოლოს, იმედის ყველა ძაფი რომ გაგვიწყდა, მამუკამ იფიქრა: ეს თოხი რალა მე ვათრიო, ცოტაზე ორთვალამ წაიღოსო. მამუკას გიამ მიბაძა, ორთავეს ლევანმა და ასე, ათამდე თოხი დააკიდეთ ორთვალას. მეტაქვე, თითქოს აქ არაფერიო. ყურადღებას არ გვაქცევდა. ზანტად თუ შეუძახებდა ხანდახან აღვირმიშვებულ ცხენს. ჩვენც ხმამალალი ყაყანი-თა და ერთმანეთის ძიძგილაობით მივეყვებოდით უკან.

უცებ ორთვალა ქარივით მოსწყდა ადგილს. გავარდა და მერე როგორ! ერთხანს ყველანი სახტად დავრჩით, ვერ მოგვეფიქრებინა, ასე უცებ რა ბზიკმა უკბინა ამ გალეულ ცხენსა და მის პატრონს. გარბის ორთვალა და ქვაფენილზე მიხრიალებენ ჩვენი თოხის ტარები.

— ბიძია კოჩო, ბიძია კოჩო! — მივდევთ აქლოშინებული ბიჭები, მაგრამ საქმე არა გაქვს, ვინაა ყურის დამგდები.

ასე კარგა ხანს ვდიეთ.

ის იყო ხელის ჩაქნევას ვაპირებდით, ეს კაცი ალბათ გადაირა ან დაყრუვდაო, რომ ორთვალა გაჩერდა.

კოჩომ თოხები შარავზაზე პანტაპუნტით გადმოყარა, მათრახით რალაცას დაგვექადნა და მოსახვევს მიეფარა.

მივხვდით, ეს მისი მორიგი ხუმრობა იყო.

კოჩო ბიძია წინათ, თურმე, კარგა შეძლებული ვაჭარი ყოფილა. საკუთარი დუქანი ჰქონია. ახლაც ხშირად იტყვის ხოლმე: როცა ვაჭარი ვიყავი, ყველა ბატონი კოჩის მეძახდა. მერე — ამხანაგო კოჩის, ახლა კი ყველა ძალლი და მამაძალი კოჩოიას მეძახისო.

ცოდვა გატეხილი სჯობია, კოჩიას ძველი დროის გახსენებაზე ტანში ნეტარების ჟრუანტელი უვლის. ახლაც ისე არ დადგება, ორ კვირაში ერთხელ ძველებურად განავარდება არ მოეხუმტუროს. სოფელ-სოფელ დატორლიალობს. ჩალის ფასად ყიდულობს ყველს. კვერცხებს, ქათმებს და თბილისში „დებერტირის“ ბაზარზე მამასისხლად ყიდის. მისი ერთადერთი გამცილებელი მე ვარ. აბა, მეზობელს უარი როგორ ეთქმის. სადგურამდე მისი ორთვალათი მივდივართ, მერე მატარებელში ბარგის ატანაში ვშველი. სამაგიეროდ, ერთ ფოჩიან კამფეტს, რომელიც ჩემთვის ჩამოაქვს და რატომღაც „ფეშკაშს“ ეძახის, მე და ბებია ჩაის ვატანთ...

უფროსკლასელები ის-ის იყო მისულიყვნენ. გამიკვირდა, მათ შორის ბონდოს რომ მოვეკარი თვალი. იდგა ურმის ხელნაზე ხელმოხვეული და ეკას ელაპარაკებოდა. ვიცოდო, მისვლისთანავე დამინახა, მაგრამ არ შეიმჩნია.

მეორე ურმიდან პატიკო და გუჯუ ცარიელ გოდრებს სცლიდნენ.

— აბა, ბავშვებო, შევეუდგეთ მუშაობას! — გვეუბნება ფიზკულტურის მასწავლებელი, — ბონდო და პატიკო ურმებით სიმიინდს წაიღებენ, დანარჩენები ყანაში!

— პატივცემულო მასწ... — წელში გაიმართა პატიკო, — სიმიინდის გადმოცლაში თუ ვინმე არ მომეხმარა, მარტო მე გამიჭირდება. ბარემ გუჯუ ჩემთან დარჩეს.

— კარგი! — დაეთანხმა მასწავლებელი. — შენ არ გჭირდება დამხმარე? — ახლა ბონდოს მიუბრუნდა.

ბონდომ თვალებით უმაღლეს მომძებნა.

— ჩემთან დათო იქნება!

— სად იყავი წუხელ? — ვკითხვ ბონდოს, როცა მარტონი დავრჩით.

— რა იყო, მოხდა რამე?

— მზია დაგეძებდა, წუხელ სახლში არ მოსულაო.

— მერე შენ რა უთხარი?

— რა უნდა მეთქვა, არ მინახავს-მეთქი.

— სადგურში რომ მნახე?

— რაა? უნდა მეთქვა?

ბონდომ მხრები აიჩეჩა.

— იცოდე, არაფერი წამოგცდეს!

— მაინც სად იყავი?

— არ არის შენი ჭკუის საქმე! გესმის! — შემომიტირა ბონდომ.

გავჩუმდი. აბა, მასთან საშარო თავი სად მქონდა! ბონდომ, თითქოს შიშს მიმიხვდაო, დამიყვავა:

— კარგი, ნუ გეწყინება, სხვა დროს გეტყვი!

მალე ყანიდან სიმინდით სავსე გოდრები მოიტანეს. ჩვენც პირდაპირ ჩელტით მოღობილი ურმის ძარაზე ვყრით.

მიმღებ პუნქტამდე კილომეტრ-ნახევარი თუ იქნება. გვიანი შემოდგომის წვიმისაგან ატალახებულ საურმე გზაზე უჭირთ ხარებს. საცოდავებს შიმშილისაგან ფერდი ფერდზე აქვთ მიკრული, ყოველი ნაბიჯის გადადგმაზე ფეხის ძარღვები ზამბარასავით ეჭიმებათ. ხვნეშიან მძიმე უღლის ქვეშ. მე მეცოდება. საბრალო პირუტყვები. ურემს წინ მივუძღვი. პატიკოსა და გუჯუს ურემი თითქმის ფეხდაფეხ მოგვყვება.

მოსახვევთან, ერთ-ერთი მოსახლის კარებთან, ბონდომ ურემი გააჩერა, წავალ, წყალს დავლეეო.

კარგა ხანია მზე საშუადღეოს გადაცდა. საგრძნობლად აგრილდა. მოსარკულ ცაზე თანდათან ჩამოზვავდნენ შავი ღრუბლები. ეჭვი არ იყო, ისევ წვიმას აპირებდა.

ბონდო მალე დაბრუნდა და ღრიქოდ დარჩენილი ჭიმკარი ფართოდ გააღო.

— შემოიყვანე ურემი!— მიბრძანა გაბზარული ხმით.

შევყოყმანდი. ამ ეზოში ურემი რად უნდა შევიყვანო-მეთქი.

— შენ გეუბნებიან, ჩქარა, რას გაშტერებულხარ?!

ვიდრე რაიმეს თქმას მოვახერხებდი, ბონდომ ხელის კვრით განზე მიმაგლო და ურემს ეზოში შეუძღვა.

— გზა ხომ იცი? — მეკითხება ბონდო, როცა უკან ნახევრად დაცლილი ურმით გამოვედით, — თუმცა, დაიცა, აგერ პატიკო და გუჯუია მოდიან, ერთად წახვალთ!

— ეს... ეს... ხომ ქურდობაა... — ხმა ამიკანკალდა მე-

— ენა ჩაიგდე, გესმის! — შემომიღრინა ბონდოიამ.—  
კრინტი არსად დაძრა, თორემ... აქ ბიძაჩემი ცხოვრობს.  
წვრილშვილის პატრონია, უჭირს. რა მოხდა, ქვეყანა  
დაიქცევა, კაცმა კაცს ორი ტარო სიმიწლი რომ მის-  
ცეს?!

— რა იყო, რას გაჩერებულხართ? — გვეკითხება ძოან-  
ლოვებული პატიკო.

— არაფერი, ისე დაგელოდეთ! — ბონდომ თვალი ჩა-  
უკრა ბიჭებს, — მე აქ, ბიძაჩემთან უნდა დავრჩე, ურემს  
თქვენ წაიყვანთ, უკან კი ისევ ამ გზაზე გამოიარეთ!

იმ ღამით გაღეშილი ბონდოია კოჩია მეტაჭკემ ძლივს  
მიათრია სახლში.

## წერილი მამას

„იმედია, კარგად იქნები, ჩვენც კარგად ვართ. მხო-  
ლოდ შენი წერილი რომ არ მოგვდის, ეს გვაწუხებს. ბე-  
ბიამ თქვა: ომიანობის დროს ყველაფერი შესაძლებელი-  
აო, იქნებ გზაში იკარგებაო. ალბათ მართალია! ის ხომ ახ-  
ლა ფოსტალიონია, მიხაკო ფოსტალიონი შენი წასვლის  
მეორე დღეს გაიწვიეს ჯარში.

დედა ბებია და ბაბუასთან წავიდა სოფელში, მშობ-  
ლებს მივხედავ და იქიდან უფრო შეგიწყობთო ხელს.

ჩვენ სკოლაში ახლა სამხედრო ჰოსპიტალია, ჩვენ-  
კი საბავშვო ბაღის შენობაში ვართ... ზოგჯერ კოლმეურ-  
ნებობას ვეხმარებით მოსავლის აღებაში და როგორც  
დიდებს, შრომადღეებს გვიწერენ.



საყვარელო მამა! ვიცი, ძალიან, ძალიან რომ გეწყინება. მაგრამ უთქმელობაც არ იქნება. კაკო ბიძია დაიღუპა. შავი ქალაღდი თვითონ ბებიაშ მოიტანა სახლში. საწყალი კაკო ბიძია! მისი სანადირო თოფი, ვარდენმა რომ იყიდა, ისევ უკან დაგვიბრუნა. ვინ იცის, იქნებ ის ბიჭი ცოცხალია, ისევ მის პატრონს მოახმაროსო.

ბებიაშ გთხოვა, იქ შენთან გაიკითხ-გამოიკითხო, იქნებ ვინმემ დანამდვილებით იცოდეს კაკოს ამბავიო.

ეკას მამა დიღი ხანია ჯარშია, მგონი, სადღაც, შორეულ აღმოსავლეთში მუშაობს სამხედრო ექიმად. წერილებს იშვიათად, მაგრამ იმედიანად იწერება: სტამბოლის კაჟივით ვარო. ეკას დედა ჩამოვიდა. მერე გუდა-ნაბადი აიკრა და ეს საპყარი ბერიკაცი (ე. ი. ბაბუა ივანე) თითის სიგრძე ბავშვის ანაბარად დატოვა.

ბაბუა ივანეს ახლა სკოლაში აღარ მიეჩქარება. მთელი დღეები თავის ეზოში ტრიალებს და ყვავილების ნაცვლად კარტოფილის ნარგავებს უვლის. ხანდახან მეჯღანე ესტატესთან თუ გადავა, როგორც თვითონ იტყვის, ენის მოსაფხანად.

მამუკასაც როდი სცხელა ჩვენთვის. ქალაქის პურსაცხოშში, სადაც ომამდე მამამისი მუშაობდა, ცეცხლფარეშს ეხმარება- ვერც გიას ნახავ მოცლილს. ეკაც სულ გამოიცივალა, ძველებურად აღარ ატარტალებს ენას.

ახალი სკოლის შშენებლობა ომის დაწყებისთანავე შეწყდა, სწორედ იმ დილით, როცა ჩვენ გვირაბში ვიყავით. საშენი მასალა უცებ სადღაც გაქრა. დარჩა მხოლოდ ვეება, საზარლად პირდაღებული ორმო.

ბატონი პლატონი, ჩვენი ისტორიის მასწავლებელი,

ისევ დაუბრუნდა სკოლას. თითქოს უფრო ყოჩაღად გამოიყურება, მაგრამ ახლა როდი დაეძებს ციხისგორას ნანგრევებში უძველესი ხანის მონეტებს, ოქროსა და სპილენძის ბალთებს.

ვარდენას ბიჭი მოკოდი მთელი დღეები უნაბის ხის ძირას ზის ჩეროში და მამამისს ნარდის თამაშს ასწავლის. ავადაა, ენაცვალოს დედა, წელს დაისვენოს, დამიკლექა შვილი ამდენმა სწავლამო, -- ოხრავს მეზობლებში დედამისი.

უკვე კარგა ხანია, სკოლის ზართან ერთად ხმა ჩაუწყდა სახანძრო რაზმის ზარსაც. ძველებურად აღარ დაშლივინებს წითელი მანქანა ციხისგორას ფერდობებზე.

ქალაქი თითქოს დაცარიელდა, ცაც დადაბლდა. ხალხიც წელში მოხრილი დადის.

კოლექტივში მუშახელი ცოტაა, საქმე და საზრუნავი — ბევრი. ბონდოიას იშვიათად ვხვდები, ბოლო დროს მისი ასავალ-დასავალი არავინ იცის. ეს კია, მის სახლში ახლა არ შიმშილობენ. სუფრაზე თანდათან გაჩნდა შაქარი, პური და ზოგჯერ შემწვარი ქათამიც კი. ახლა კოჩია მეტაჰკის ორთვალას აღარ კადრულობს. ერთი-ორჯერ თავის ამფსონებთან ერთად ბიკიას ეტლით მობრძანდა.

დუბუნას ამბავს თუ იკითხავ, წერილი მოიწერა, კარგად-ვარ, გიორგის მისამართი გამაგებინეთო.

სამეზობლოში ყველანი კარგად არიან. ფარნა ბიძიას ცოლი კიდევ ელოდება ბავშვს.

მამიკო, სურათი თუ გადაიღო, ორი ცალი გამოგზავ-

ნე, ერთი ფარნა ბიძიამ მთხოვა. ბებიასთვის უთქვამს, თუ ბიჭი შემეძინა, გიორგი უნდა დავარქვაო“.

## მქიმი აღამოვსკი

დადგა ზამთარი, ცივი, ნესტიანი ზამთარი...

რაც დასაწვავი იყო დაიწვა, შეშას კი ბაზარში ცეცხლი ეკიდება.

ლამლამობით ყინავს.

მე ბებიასთან თავშექცევით ვწვები, სიცივისაგან აკანკალებულნი ერთმანეთს ფეხებს ვუთბობთ.

დილიდან გვიან საღამომდე ჰოსპიტალის ეზოში თუხ-თუხებენ შუქჩამქრალი სანიტარული მანქანები. მოჰყავთ და მოჰყავთ დაჭრილები, მათ შორის იშვიათად თუ გამოერევა ქართველი.

ექიმი აღამოვსკი ღამეს თითქმის არ ათევს სახლში. გამთენიისას შემოიბრუნეს, ცოტას თვალს მოატყუებს და ისევ ჰოსპიტალში გარბის.

ისე არ დაღამდება, ქალაქის რომელიმე კუთხეში კივილი არ ატყდეს.

მეჯღანე ესტატე უკვე აღარ უყრის ცხელ ნაცარს სკოლისა და მისი ეზოს საზღვარზე აღმართულ ალვის ხეს გასახმობად, ესაოდა, ცოტა მიწას შემოვიმატებო. ამ ზამთარს ძალიან დაუძლურდა. არაფრის თავი აღარა აქვს. მისი ერთადერთი, უკანასკნელი იმედი ღვთისმშობლის ხატია, რომელიც საწოლთან, კუთხეში უკიდია. წინათ, ვინ ღცის, დღეში რამდენჯერ ლოცულობდა. ხატის წინ. ახლა,

ღმერთს დაწოლილი როგორ ველაპარაკო, ოხრავს ლოგინად ჩავარდნილი. ერთი ძალი ჰყავდა, ისიც სადღაც გადაიკარგა. მომპარეს ვიღაც უსინდისობემაო. მე კი უფრო მეზობლებისა მჯერა, თავს უშველა იმ უბედურმაო.

რატომღაც ის ზაფხული მაგონდება, ომი რომ დაიწყო. სკოლის ეზოში უამრავი მობილიზებული მოიყვანეს, უმეტესად ხანშიშესულები, შიგადაშიგ ახალგაზრდებიც არაა. დადლილ-დაქანცულები თითქმის ჩურჩულთ ელაპარაკებოდნენ ერთმანეთს. შემოვიდნენ ჯგუფ-ჯგუფად და ხეების ძირას, ჩეროში, დაუდევრად მიჰყარ-მოჰყარეს თავიანთი ბარგი-ბარხანა. ზოგიერთები პირდაპირ მზის გულზე დასხდნენ და მტვრიანი, ათასი გზის ტალახშემხმარი ფეხსაცმელები დაიხადეს. მთელი ჩვენი უბანი მოაწყდა სკოლის ეზოს. დიანოზა მჭედელმა ხელი უშვა საბერველს. გრდემლთან მიაგდო ვეება ურო გივიმ. კოჩია მეტაჰქემ ჭიშკართან მიაბა თავისი ბედაური და სკოლის ეზოში შეცუხცუხდა. მოვიდა კუნტაც.

— ვინა ხართ, სადაურები? — შეეკითხა პირველსავე შემხვედრს კოჩო.

— ვინ უნდა ვიყოთ, შე კაცო, ქართველები ვართ! — იწყინა ახალმოსულმა.

— რაო, ვინა ვართო? — შემოეხვივნენ მეზობლები კოჩოს.

— ჩვენებურები არიან, წითელარმიელები!

— ვაი, თქვენს დედას უბედურს! — ცრემლები გადმოჰყარა ბებიამ.

— ფორმა რომ არ აცვიათ? — პირი დაალო ფარნამ.

— მისცემენ, სულის მოთქმას არ აცლით?

—მერე ფრონტზე წაიყვანენ? — დაინტერესდა დანოზა.

— არა, ქორწილში! — ხეიხვინით კბილები გადმოჰყარა კუნტამ.

— რა აცინებს ნეტავი ამ უბედურს? — გაწყრა ვარდენი.

შეკრებილთ ვილაც ახალგაზრდა მიუახლოვდა, წყალი საღ არისო, იკითხა.

წყალიო, — დაფაცურდა ყველა.

მალე დიანოზა მქედლის ეზოში ჰასთან რიგი გაჩნდა.

სვამდნენ, ზოგი ხელ-პირს იბანდა. ხორხოცობდნენ, საღლაც სიმღერაც კი წამოიწყეს. კრიმანჭულმა ტოროლასავით დაიწკრიალა ცაში.

ეკამ თუნგით ღვინო მოარბენინა.

— ჰეი, ბიჭიკო, მოდი აქ! — ხელს მიქნევს ვილაც უცნობი. იგი განმარტოებით ზის თუთის ხესთან. ჰაღარაშერეული თმა თითქმის წარბებს უფარავს. — რომელ კლასში ხარ?

— მეშვიდეში.

— ყოჩაღ! კარგი ბიჭი ყოფილხარ!

— წყალი ხომ არ გინდა, ბიძია?

— არა! — თითქოს ბოღიშით მეუბნება უცნობი. — წერილი მინდა დამიწერო სახლში, ჩემიანებთან...

მე უხმოდ ვართმევ ქიმიურ ფანქარსა და ქაღალდს. ველოდები. ის კი ხმას არ იღებს, დიდრონი, ნაღვლიანი თვალებით ცას მისჩერებია...

სადა ხარ ახლა შენ. ქართველო გუთნისდედავ. ვინ იცის, იქნებ მშვიდობიანად დაუბრუნდი მშობლიურ ქერას, შენს კავს და სახნისს. ვინ იცის, ვინ იცის!

ჯარში გაწვეულები ქალაქში ორ კვირას დარჩნენ. მიიღეს სამხედრო ტანსაცმელი. დილიდან გვიან საღამომდე ისმოდა მათი „ბათინკების“ ბრაზაბრუხი, მეთაურთა ხრინწიანი ბრძანებები, სასულე ორკესტრის შეუწყვეტელი ცამპა-რამპა.

უმრავლესობას მნახველები ჩამოუვიდნენ ახლომახლო სოფლებიდან და ქალაქებიდან. პოდიოდნენ, მოჰქონდათ უკანასკნელი ლუკმა, რომ ერთმანეთისათვის გაეყოთ, უკანასკნელად დამტკბარყვნენ ერთმანეთის მზერით, სიყვარულით.

ჩვენი პატარა ციხისგორა, ლამისაა, ყაზარმას დაემსგავსოს, მარტო ჩვენს სახლში ათამდე კაცი ათევს ღამეს.

საკლასო ოთახებიდან კარგა ხანია გამოყარეს მერხები, ნაწილი სადღაც წაიღეს, ნაწილიც ხორა-ხორად ყრია სკოლის ეზოში...

თანდათან გაძვირდა ცხოვრება, ბაზარში სიმინდის ფასმა აიწია. გაჩაღდა გაცვლა-გამოცვლა. სოროებიდან გამოძვრნენ ძველი ვაჭრუკანები, სპეკულიანტები, სადგურებში ქურდობა გახშირდა. კოლმეურნეობას მუშახელი ღოაკლდა. იკლო მოსავალმაც... წისქვილებში დაწესდა მინდი. მე უკვე სკოლაში კალოშებით დავდივარ. ზოგს ისიც არა აქვს. უთენია ტალონებით ხელში პურის რიგში ვდგები.

მამაჩემის აზიურ ჩექმებს, კოსტუმსა და პალტოს ბოლოს მისი საათიც მიჰყვა. ჭირს ცხოვრება, ძალიან ჭირს...

იაშა კარგა ხანია წავიდა, პროხორიჩიცი. პაშას რა-

ტომლაც თვალს ვერ ვუსწორებ. ამბობენ, ის გემი, სადაც იაშა მსახურობდა, ქერჩთან ჩაძირესო.

გარეთ თოვს. დილიდანვე ხვავრიელად ბარდნის.

— ამაღამაც თუ ასე ითოვია, — ამბობს შეწუხებული ბებია, — სახლი თავზე დაგვენგრევა.

— ავალ, ჩამოვთოვლავ! — ვამბობ მე.

უარის ნიშნად ბებია ხელებს ასავესავებს.

— აბა, აქ ხომ არ გამოვიჭეჭეყებით?

— დაიცა, ბიჭო, კბილებში ნუ გაქვს სული. ხვალ დილით ფარნას შევეხვეწები... ამაღამ კიდევ რომ ითოვოს, არა უჭირს.

უცებ სასტუმრო ოთახში რაღაცამ გაიხრიგინა. ხმაურს ექიმის ყვირილი მოჰყვა.

— მე შენ გასწავლი, შე ძაღლის შვილო, როგორ ელაპარაკო მამას!

— მეტი აღარ შემიძლია! — მოისმა იგორის აკანკალებული ხმა, — ქუჩაში ვერ გავსულვარ!

-- მერე და, ვინ გიკრძალავს?

— სინდისი, მოვალეობა!

— განა სინდისი იმას გეუბნება, მოხუცებული მამა მიატოვეო? განა შვილის მოვალეობა არ არის, მიხედოს მშობელს, რომელსაც მის მეტი არავინ დარჩენია სიბერეში?

— ახლა სხვა დროა, მამაჩემო. არ მინდა დეზერტირი მერქვას!

— დეზერტირი რატომ? იმუშავე ჩვენთან, დღესვე გააფორმებ სანიტრად!

— ჩემი ადგილი იქაა, სადაც ჩემი ტოლები არიან,

სადაც ჩემი ძმა ვადიშია, სერგეი, ტოლია... ხალხისთვის თვალში ვერ შემიხედია... იმ დღეს ჩვენი მეზობელი მოხუცი ქალი, იცო, როგორ მიყურებდა? მერჩივნა, მიწა გამსკდომოდა... იმ ქალს სამი ვაჟკაცი დაელუპა ფრონტზე, მამა!

— აქაც ფრონტია, ხალხი აქაც გვეჭირდება!

— უჩემოდაც იოლად გახვალთ, ნუ გავიწყდებათ, მე კომკავშირელი ვარ!

— ჩემთვის დღე და ღამე ერთია, ვწვალობ, რომ იტყვიან, ტყავში ვძვრები. არავის არა აქვს უფლება, უკანასკნელი იმედი წამართვას!

— სხვებსაც უყვართ თავიანთი შვილები. მე მხდალი არა ვარ, მამა!

— მოიგონე დედაშენი, შენი და... იქნებ... — აქ ხმა ჩაუწყდა ექიმს, ალუღლუღდა.

— სწორედ ამიტომ უნდა წავიდე, მამა!

— გაჩუმდი!

სილის ტკაცუნთან ერთად ოთახში ისევ რაღაც წაიქცა. მერე კარები ჯახუნით მიიხურა. ფანჯრიდან გავიხედე. ახლად გაკვალულ ბილიკზე მხრებში თავჩარგული ექიმი მიდიოდა.

## ახალი წლის ღამეს

რატომღაც, მგონია, დღეს ჩვეულებრივზე ადრე დაღამდა. თუმცა ცას დილიდანვე არ უჩანდა კარგი პირობა. საავდრო ღრუბლები ქალაქს სულთამხუთავივით დასდგომოდა თავზე. ქვემოთ, მუხისგორას ფერდობებზე, გამ-



ჭვირვალე ბურუსში დაცურავდნენ ერთი შეხედვით უხერხულად აჩოჩხილი ხეთა შიშველი ტოტები.

გარეთ მუხლებამდე თოვლი დევს. თეთრად გადაპენტოილ მიდამოს შავი ცის ფონზე რაღაცნაირი მოყვითალო ფერი გადაჰკრავს.

ცივა. რა ხანია დაღამდა. აქა-იქ, გულდაგულ დაგმანულ სარკმლებიდან მაინც ჭიატებს სინათლის მკრთალი შუქი.

უთენია ფიჩხისათვის ტყეში წასული ბიჭები ეს-ეს არის დავბრუნდით. ორად ორი კონა სველი ფიჩხი ბუხართან გდია. ცეცხლისპირ ქოთანში ლობიო თუხთუხებს. ბუხართან ბებია ზის, მხრებზე თბილი თავშალი მოუსხამს და დაეინებით დასცქერის მოგუზგუზზე ნაკვერჩხლებს.

დაიღალა საბრალო! ვხედავ. არაფრის თავი არა აქვს. ჯერ იყო და, ტყეში აღმა-დაღმა ხეტიალით კინაღამ მამაზეციერს ჩააბარა სული. დარღმა გაათავა, საღძვე ზომ არ გადაიჩეხენო. ის რომ იქ გვეძებდა, ჩვენ უკვე აქ ვიყავით: კოჩოიამ მოგვიყვანა ორთვალათი. ააშენა ღმართმა მისი ოჯახიო! — გაიხარა ბებიაჲ.

ხვალ ახალი წელია!

უნებურად შარშანდელი ახალი წელი მაგონდება. მაშინ ყველანი შინ ვიყავით. სოფლიდან კაკო ბიძია გვეწვია თავისი ცოლ-შვილით. მახსოვს, დუხუნა აი, აქ, სარკმელთან იჯდა და გიტარას უკრავდა. მე თითქოს ახლაც მესმის მისი ტკბილი, ხავერდოვანი ხმა:

ბახმაროს მთებზე დაუთოვია, ვარალო...

საახალწლო მაგიდის მახლობლად, კუთხეში, ნაძვის ხე

იდგა. ღუხუნა ბიძიამ მოჰიტანა: აბა, დაეტოლე, შენზე მაღალე თუ არისო.

ღუხუნა ახლა კარპატების მთებშია. მამა საუღაც ჩრდილოეთში იბრძვის... კაკო ბიძიას კი, ვოროშილოვ-გრაღის მახლობლად, საძმო საფლავში სძინავს.

შარშან ამ დროს კი ყველანი საახალწლო სუფრას ვუსხედით.

ერთი წელი! ნუთუ ასე ხანგრძლივია ერთი წელი? აი, თუნდაც ჩვენი სამხედროს მასწავლებელი. ვინ იყო ერთი წლის წინათ? ჯანსაღი, სიცოცხლით აღსავსე ვაჟკაცი. ახლა? ხეიბარი, ცალფეხა ნაფრონტალი კაცია, რომელიც ჩვენისთანა ცხვირმოუხოცავ ბიჭებს (როგორც თვითონ იტყვის ხოლმე) სამხედრო მეცნიერებას ასწავლის.

გარეთ კვლავ თოვა დაიწყო. ყინვა ისევ და ისევ უჭერს.

— დღესაც არ ჩამოვიდა დედაშენი, — წუხს ბებია, — რამე უბედურება ხომ არაა ჩვენს თავს?

— ვერა ხედავ, რა ამინდია?! ახლა ძაღლს არ გააგ-დებენ გარეთ.

— კი, კი, მართალი ხარ, — მეთანხმება ბებია, — ძნელია ახლა მგზავრობა, ისიც იმ სიშორიდან...

ოთახში თანდათან დათბა. ვგრძნობ, როგორ ნელი-ნელ მივლის ტანში საამო ჟრუანტელი. თვალები მებლი-ტება.

— ბებია, გვეჭამა რამე!

— უი, დამიდგეს თვალები! ასე რამ გამომაჩერჩეტა, ბეჩა! — თითქოს ხელი წაჰკრესო, გამოერკვა ბებია. —

თავს არ ვუჭერებ, ბებია, თორემ დავბერდი, ნამდვილად დავბერდი!

მართლაც, ამ ერთ წელიწადში საოცრად შეიცვალა. მოტყდა, აქამდე თმებში ბინდბუნდად შეპარული ჭალა-რა თეთრად დაეფიფქა. ოდესღაც სხვიან თვალებთან ნაოჭები მარაოსავით გაეშალა. წელშიც მოიხარა ოდნავ.

მითვლემილ ცეცხლს ვაღვიძებ. სველი შეშა ერთ-სანს შიშინებს, სიმხურვალეს ებრძვის, ხრჩოლავს, მერე მხიარულ ტკიცინს იწყებს. ბებია ბუხრის თავიდან ლამპას იღებს, ანთებს და მაგიდაზე დგამს. ოთახში სინათლის შუქი იწყებს ფარფატს.

— ესაა ახალი წელი? ღმერთმა დასწყევლოს ასეთი ახალი წელი! — თავისთვის ჩიფჩიფებს ბებია და ერთი კუთხიდან მეორეში ფლასტაფლუსტით დაჩაჩუნობს, — ღმერთო დიდებულო, კაცს ჭადის ნატეხი უნდა ენატრებოდეს? ვაი, თქვენს დედას უბედურს, სადა ხართ, შვილებო, სად?!

— კარგი, ბებია, მოდი ახლა და ჭამე! — ვეუბნები მე და მაგიდასთან ვჯდები.

— მიწა უნდა ჭამოს ჩემმა პირმა, მიწა!

— ბებია!

— მე ნუ მიყურებ, შვილო, მოვალ, აბა, რას ვიზამ?! — ბებია ხალმიდან ყველს იღებს, კრის, მერე თეფშზე ლობიოს მისხამს.

გარეთ ისევ თოვს. ხელისგულის სიფართო ფანტელე-ბი პეპლებივით ფარფატებენ ჰაერში.

უცებ კარებზე კაკუნის გაისმო.

— მგონი, ვიღაცაა! — ბებია მარცხენა ყურთან თავსაფარი გადაიწია და მიაყურადა.

კაკუნი განმეორდა.

— მიდი, ბიჭო, კარი გაუღე, მგონი, დედაშენია!

ზღურბლზე ლურჯ ხალათწამოსხმული ერონისი იდგა.

— მრავალ ახალ წელს! — იღიმება სტუმარი.

— გაიხარე, შვილო! — მიეგება ბებია, — შემოდი, შემოდი, თორემ ოთახი გაცივდა.

— მარტო არა ვარ, ამხანაგიც მახლავს!

— მერე და რაღას უცდით. შემოდით!

ერონისს მაღალი ტანის უცნობი მამაკაცი შემოჰყვა. ვაკვირდები. ჰოსპიტალში თითქმის ყველა დაჭრილს ვიცნობ. ეს კი... ერონისი თითქოს ფიქრებს მიმიხვდაო, იცინის.

— დათო! ჯერ შენ არ იცნობ ვანიას, გუშინწინ ჩამოვიდა, მკლავშია დაჭრილი.

ახალმოსული გულდია, მხიარული სტუმარი გამოდგა.

— როგორ არის საქმე, დედილო?! — როხროხით იკითხა და მაგიდაზე პურის ნაჭრები და კონსერვის კოლოფები დაყარა.

ერონისი ბუხართან ჯდება, იგი კარგა ხანია ჩვენს ოჯახში შინაურ კაცად ითვლება.

— აბა, რა ისმის ახალი? ბიჭები როგორ არიან? — მეკითხება.

კარგადა ვართ-მეთქი, — მივუგე.

— ეკა სადღაა, რაღაც ამ ბოლო დროს ვერ ვხედავ-

— სახლშია, დედა ჩამოუვიდა, ბაბუა ივანეა ავად!

— დედაშენი არ ჩამოსულა?

— ალბათ ვერ მოახერხა, შეილო! — შეკითხვას ბებიამ მოჰკრა ყური, — ჩამოვა, აბა, რას იზამს!

ერონისი ბუხარში ფიჩხს უკეთებს. მერე ხალათის ჯიბიდან სათუთუნეს იღებს და ტკაცანით ხსნის.

— წელს მართლაც დიდი ზამთარი დაგვიდგა!

— ასეთი დიდთოვლობა ჩემი ქალიშვილობის მერე არ მახსოვს. ესლა გვაკლდა ყველა სიკეთესთან ერთად! — ხვნეშის ბებია.

— ეს სიცივეა? — ამბობს აქამდე უხმოდ მდგარი ვანია, — ყინვა ჩვენში უნდა ნახო, ციმბირში. ხეებიდან გათოშილი ფრინველები რომ ცვივიან. რა სჯობია მაშინ ტაიგაში გავლას! მიდიხარ შენთვის, მხარზე თოფით და... უცებ დათვის ბუნაგს გადაეყრები.

— ე-ე, დაიწყო ისევ მისებურად! — ეშმაკურად თვალს მიკრავს ერონისი.

— არ გჯერა? — ჯავრობს ვანია, — შეიდი დათვი მყავს მოკლული. პირველი თორმეტი წლისამ მოვკალი...

— გვჯერა, გვჯერა, ბატონო, ნუ დაგვახრჩვე! — ხარხარებს ერონისი.

— ჰოდა, ასე! — კმაყოფილია ციმბირელი, — ეჰ, ახლა ერთი ასი გრამი „ჩაჩა“ პირდაპირ გვაცხონებდა.

— რას ამბობს, ბიჭო, ეს რუსი? — მეკითხება სუფრასთან მოფუსფუსე ბებია.

— არაყი ხომ არ გექნებათო...

— დაჭრილს არაყი რად უნდა? — უკვირს ბებია-ჩემს, — მაგათმა უფროსებმა რომ გამიგონ, ხომ გადამასახლეს აქედან!

— თუ გაქვს, ას-ასი გრამი არას გვიზამს, რაც არ

უნდა იყოს, ახალი წელი მოდის! — ელიმება ერონისს.

ბებია ერთხანს ყოყმანობს, რაღაცის თქმაც კი დააპირა, მაგრამ, ეტყობა, გადაიფიქრა, უხმოდ შეტრიალდა და მაგიდაზე ბოთლით არაყი ჩამოვსოდა.

— ღვინოზე ბოლიშს ვიხდი, არა მაქვს. დალიეთ, ღმერთმა შეგარგოთ, მხოლოდ ნამეტანს ნუ იზამთ!

ვანია ბოთლს წაეტანა, საცობი მოხსნა, დასუნა და რაღაცნაირი ოხვრა აღმოხდა:

— აი, ეს მესმის!

სტუმრები სუფრას შემოუსხდნენ.

— ექიმი სახლში ხომ არ არის? — იკითხა ერონისმა.

— ასე ადრე რა მოიყვანს, შვილო, ზოგჯერ ღამესაც იქ ათევს.

— სამაგიეროდ, მისი ბიჭია სახლში, — გამბობ მე, — დავუძახო?

ბებიამ თანაგრძნობით შემომხედა.

— უთხარი მოვიდეს, თორემ სულ გამოაჩურჩუტებს ამდენი წერა და კითხვა. წინათ ხანდახან მაინც გამოდიოდა გარეთ, ახლა სულ სახლშია ჩაკეტილი. იმ დღეს შევედი და რას ვხედავ, იატაკზე ეგდო, ძლივს ჩავაწვინეთ ლოჯინში.

— სვამს?

— ცოტ-ცოტას, მაგრამ მამამისივით არა. ჯარში უნდა წასვლა, დარდობს.

— რაო, მამა არ უშვებს?

— ასე გამოდის!

— ისიც ადგეს და წავიდეს!

— რა ვიცი შვილო, თავიანთი საქმე თვითონ უკეთ იციან. რაღაცნაირი საწყალი ბიჭია. ღმერთო, შენ უშველე ყველა გაჭირვებულს!

იგორის დასაპატიებლად შორს წასვლა როდი მჭირდება. სასტუმრო ოთახის კარებზე ვაკაკუნებ. ტახტის კრიალთან ერთად მისი გაბზარული ხმა მოისმა. ეტყობა, ეძინა.

— ოო, სტუმრები გყოლიათ? — კარები მოაღლია იგორმა და რაღაცნაირად დაიმორცხვა.

— მოდი, მოდი, ძველო, დაგვეწვიე! — შეეპატივა ვანია.

იგორს სახე გაუბრწყინდა, ახლავე დაგვეწვევითო და ოთახში შებრუნდა. მალე ყველანი ჩვენს ღარიბულ სუფრას ეუსხედით.

## სიმაართლის მოხვარული ბებია

ვარდენის ჩამოსვლის ამბავი, ჩვეულებრივ, ყველაზე უწინ ბებიაჩემმა გაიგო.

ვარდენი ჩვენი მეზობელია. წელიწადში სამჯერ თუ გამოჩნდება სახლში. ამბობენ, რუსეთშია და ფულს ხვეტავსო.

გამთენიის ხანს უამრავი ბარგი-ბარხანით დატვირთული იმავე საღამოს ან მეორე დილას ქრება. ჩამოტანილ ნივთებს მერე მისი ცოლი ღიანა დააწინწილებს

ეზო-ეზო. ასე, ჯახირ-ჯახირით, გააქვს ოჯახს თავი. ვარდენის მეორე ჩამოსვლამდე თვითონ ლიანა რუსულ ოთხწლედში რუსულ ენას ასწავლის თხუთმეტიოდე გაჩეგრელებულ რუსის ბავშვს.

ქალაქში ნელ-ნელა გამოჩნდნენ დაქრილები, შვებულებით ჩამოსული წითელარმიელები. ჩვენი მეზობლის, დომენტი გვენეტაძის უმცროსი ბიჭი გივი მძიმედ დაქრილი სანიტრებმა მოიყვანეს სახლში. ატყდა ერთი ვაი-ვიში. მოცვივდნენ მასთან ერთად ფრონტზე წასულთა მშობლები და ნათესავები. არ ვიცი, ზოგს გზაზე დავშორდი, ზოგიც იქ დავტოვეო. დაღუპულებს არ ახსენებს. ბევრი შენატრის დომენტი გვენეტაძეს, ნეტა ჩემი შვილიც, თუნდაც, უფეხო დამიბრუნდესო სახლში.

ამჯერად ვარდენი კარგა ხანს დარჩა ოჯახში. გამხდარიყო, სახე გაფითრებოდა. ჯოხით ხელში, ბანცალ-ბანცალით გამოჩნდა სამეზობლოში. თურმე ტიფით ყოფილიყო ავად. მაგრამ ხალხში რას არ გაიგონებ: სპეკულანტობაზე დაიჭირეს და ციხიდან ავადმყოფობის გამო გაათავისუფლესო. არ ვიცი, რამდენად მართალია, მაგრამ კარგი დღე რომ არ ჰქონდა გამოვლილი, აშკარად ეტყობოდა. სახლშიც კაპიკის საფასური არაფერი ჩამოუტანია. მისი შვილი, ლევანი უკვე მეორე თვე მიდიოდა, არ ჩანდა. დედამისი ცხრა ხატზე იფიცებოდა, თბილისშია, გამოცდებს აბარებსო. მაგრამ დომენტი გვენეტაძემ თქვა, გასულ პარასკევს ლენინაკანში შემხვდაო.

საოცარი ქალია ლიანა, შიმშილით კუჭი რომ უხმებოდეს, კვნესას ვერ დააცდენინებ. ტყუილი კი, მოგე-



ცა ლხენა, იცის, მაგრამ ტყუილიცაა და ტყუილიც, მისი ტყუილი უბოროტოა. „რა ექნა! — იტყვის ხოლმე, როცა უნებურ ტყუილში გამოიჭერენ, — აბა, მწარე სიმართლე მეთქვა, ბეჩა? კეთილი ტყუილი ჯოჯოხეთს სამოთხედ მოგაჩვენებს, ცოტა ხანს ხომ ასე იქნება, იქნება! მერე კი არ შეიძლება რაიმე საშველი არ გამოიჩინდესო“.

ცოტა ბებიაჩემი ვერ ურიგდება ლიანას. მზაკვარია, ეშმაკსაც კი შეაცდენსო. ფრთხილობს. ყველაზე მეტად ლიანას სიმღერას ვერ იტანს. მის ხმადაბალ სიმღერას გაიგონებს თუ არა, მაშინვე შეიცხადებს: „ე, მოდის ახლა სასესხებლად, სამათხოვროდ“. მართლაც, ლიანა დაბარებულ იყო გამოჩნდა ეზოში. მხრებზე თავშალ-მოხურული ნელა მოჰყვებოდა ბილიკს.

— არა, არაფერს არ მოგცემ, არა მაქვს! — ხელის ქნევით მიეგება ბებია.

ლიანა შეცბა. სიმღერა შეწყვიტა.

— რა იყო, შე ქალო?.. ჯერ არაფერი მითქვამს და რავა აბრაგით დამეცი თავზე?.. სასესხებლად არ მოვსულვარ, ისე გამოვიარე...

— მაგას ნუ მასწავლი მე... ვიცი, რაზედაც ხარ მოსული!

— ღმერთო ჩემო, ამას ვის გადავეკიდე! ისე გამოვიარე, შე ქალო, მეზობლებთან არ უნდა მივიღეს კაცი?!

— აბა, რა გამღერებდა ახლა?

— ქერჩი აულიათ თურმე ჩვენებს, ჩემო ქეთე!

— ეგ ამბავი გუშინ თქვა რადიომ! — ეღიმება ბებიას.

საერთოდ, ბებიაჩემი პოლიტიკის დიდი მოყვარულია. სახლში შავი, გობისხელა რადიო დღედაღამ ჩართული გვაქვს და ყური ზედა აქვს მიღებული. რამდენჯერ ვთხოვე, ბებია, შენ გენაცვალე, გამოთიშე ეგ რადიო, გაკვეთილები მაქვს სასწავლი-მეთქი, მაგრამ შენც არ მომიკვდე. რადიო იმიტომაა, რომ ილაპარაკოს, თანაც მე ამ ლაპარაკში ფულს ვიხდი, ფულს კი მეეტლე ბიკია ეტლით არ არიგებსო.

ამჯერად ლიანას კოვზი ნაცარში ჩაუვარდა, მაგრამ იბტიბარს მაინც არ იტეხს.

— ეს კი არ გექნება გაგებული, რომ ჩვენები ასი კილომეტრით წაწეულან წინ... ამდენი და ამდენი თვითმფრინავი ჩამოუგდიათ... უთვალავი „პლენი“ წამოუყვანიათ...

— ვორთშილოვგრადი ხომ არ აუღიათ? — ოდნავ გამოცოცხლდა ბებია.

— არა, ეს არ გამიგია, ისე კი თქვეს, იმასაც მალე აიღებენო, შეიძლება, ახლა ჩვენიც იყოს.

— იქ გამწარდა ჩემი სიბერე, ისე გამწარდეს ჩემი და ჩემი ობლად დარჩენილი შვილიშვილების ცოდვით ჰიტლერის დედ-მამა! — საცოდავად აწრიალდა ბებია და დამპკნარ, ნაოჭებით დაღარულ ლოყებზე ცრემლები გადმოუგორდა.

— კაი, შე ქალო, რავა აღრე კლავ იმ შენს საბრალო ბიჭს, რა იცი, იქნებ, ცოცხალია...

— მეტი არაა ჩემი მტერი. ის რომ ცოცხალი იყოს, აქამდე ხმას არ მომაწვდენდა?

— რა იცი, რა დღეშია, ახლა ჩვენი ჯარი წინ მიდის,

ადვილი შესაძლებელია, წერილების საწერად არც ეცა-  
ლოს...

— რავა? დავიჭერო?

— კი, კი, ქეთეს ვენაცვალე, აგერ გაიანე ჩოჩიას უფ-  
როსი ბიჭი ნიკანდრო ხომ ჩამოვიდა... არ გახსოვს, იმი-  
სი ჩამოსვლის ერთი კვირის თავზე შავი ქალაღლი რომ  
მოვიდა, გმირულად დაიღუპაო. ამაზე რაღას იტყვი?

ბეზიას გული მოუღბა.

— კარგი ქალი ხარ, ჩემო ლიანა, კარგი, ტყუილები  
რომ არ იცოდე.

— რა ვთქვი ახლა ტყუილი მე? — ეწყინა ლიანას.

— კარგი, კარგი, გული ნუ მოგივა. ვარდენი როგორ  
არის? — უცებ სხვა ამბავზე გადავიდა ბეზია.

— ისე შენი და ჩემი ოჯახის დამაწყევარი იყოს, ის  
როა. ამ დილას შემეხვეწა, ერთი ღომი გამიკეთეო. უარს  
როგორ ვეტყობდი, გავუკეთე. მაგრამ ცოტა თხელი შემე-  
ქნა... აგერ მთელი საათია ველოდები ჩემს გოგოს, წის-  
ქვილშია, ჰა, საცაა მოვა და მეშველება-მეთქი, მაგრამ  
სადაა ის არდასაცალებელი... რა ვქნა ახლა, რა მეშველე-  
ბა...

ბეზიამ ექვის თვალით გადახედა ლიანას, მიხვდა,  
თვალსა და ხელს შუა რომ ატყუებდა. ამან უფრო გა-  
აბრაზა.

— ეს ამბავი გუშინწინაც მითხარი და კი წაიღე ერთი  
საინი ფქვილი!

— მერე რა მოხდა, შე ქალო?

— როგორ თუ რა? მე აქ ზაქარეას დუქანი კი არა  
მაქვს? ანდა იმ თავგასიებულ ჯოდორია მეწისქვილეს

შენი ჯინი ხომ არ ჭირს, სამი დღეა სამ მუჭა სიმინდს რომ არ გიფქვავს? თუ მე მატყუებ ჭკუაში?

ამდენი საუბრის შემდეგ ბებიას ასე მედგრად დახვედრას არ ელოდა ლიანა და წელათრევეით წამოდგა.

— კარგი, წავალ აბა მე...

— დაიცა! — კალთაში ჩააფრინდა ბებია, — ახლა მოგცემ რაცა მაქვს, მაგრამ ხვალისათვის უნდა დამიბრუნო, რაცხა ერთი იჯრა დამრჩა, ბალანას ხომ არ ვაშიმშილებ?

— ო, შენი ჭირიბე, ქეთე, ხვალ ამასაც და იმ ძველსაც ერთად მოგცემი — გაიხარა ლიანამ და აქამდე თავშლის ქვეშ დამალული თეფში გამოაცურა.

## კომპაპოზირის რაიკოზში

ზარი დაირეკა.

საკლასო ოთახიდან პირველი გამოვედი.

მინდა, ცოტა ხანს დავრჩე მარტო, ჩემს ფიქრებთან.

საფიქრალი კი ბევრი მაქვს, ძალიან ბევრი.

ერთი თვის წინათ მამას წერილი მოვიდა, დაქრილი ვარ და კიევის მახლობლად ჰოსპიტალში ვწევარ. ეს არის და ეს. მას მერე ჩამი-ჩუმი არ ისმის.

დღეაჩემი რა ხანია ჩამოვიდა სოფლიდან. დღე-დღეზე უკან გაბრუნებას აპირებს. რა ვქნა, ჩემი საბრალო მოხუცები ძალიან დაუძლურდნენ, აქეთ რომ მოვდიოდი, ბავშვებივით უკან გამომეტირნენ, უშენოდ რაღა გვეშველებო.

მე ვხედავ, ძალიან კარგად ვხედავ ყოველ დილით დედის აწითლებულ თვალებს, ვიცი, დამ-დამობით ჩუმად ტირის. ბებია, ეს ერთი კვირაა, შეუძლოდაა, წევს. დედა მის გამოკეთებას ელოდება.

ეჰ, საფიქრალი ბევრია, ძალიან ბევრი!

ეზოში უმცროსკლასელებს ლახტი გაუჩაღებიათ. ნეტავი მათ, ცა ქუდად უჩანთ და დედამიწა ქალამნად. მათთვის ცხოვრება წიგნი და სათამაშო მოედანია. ოღონდ საჭმელი ჰქონდეთ, სხვას არაფერს დაგიდევენ. არ მისცემ საჭმელს და საქვეყნოდ მოგჭრიან თავს. გადმოდგებიან აივანზე და მორთავენ ყვირილს: „მშია, მშია! შიმშილით მკლავენო!“ კარგი ბიჭი ხარ და ნუ გაუჩენ გაუჩენელს.

ეჰ, მამა, მამა! სადა ხარ ნეტავი ახლა? ვინ იცის, გიჭირს იქნებ. მე უკვე დიდი ბიჭი ვარ, გავიზარდე. ბებია ამბობს, სიმაღლეში მამამისს დაემსგავსაო. გუშინ შენი შარვალი ჩამაცვეს. არ მინდოდა, მაგრამ ძალით ჩამაცვეს, ჩემი უკვე სახმარად აღარ ვარგა...

პატარა ხეივანს ჩავყევი. მყუდროებას დავეძებ, მაგრამ ხელისგულისოდენა ეზოში ამაზე ფიქრიც ზედმეტია. დავარჯულ ხის ძირას ჩამოვჯექი.

დღეს პირველი გაკვეთილი მათემატიკა გვქონდა. ის იყო, ზარი დაირეკა, რომ მასწავლებელს ჩვენი კლასის დამრიგებელი შემოჰყვა. მათ უკან ქერათმიანი, მაღალი ბიჭი იდგა. ვიცანი, ჰოსპიტლის უფროსის შვილი იყო, საშა. მასთან ერთად ბევრჯერ ვყოფილვარ საბანაოდ. საკითხავი წიგნი მუდამ ქამარში ჰქონდა გაჩრდილი. მივიდოდით, მდინარეში ცოტა ხანს იტყუებულავებდა, მერე

გაიშოტებოდა მზის გულზე, გაშლიდა წიგნს და მოჩაჩა!  
ამქვეყნიური აღარაფერი ესმოდა, რამდენიც არ უნდა  
გეძახა.

გამიკვირდა, აქ რა უნდა-მეთქი.

— საშა! — დაუძახა ვიამ.

— იცნობთ? — გაუხარდა მასწავლებელს.

— ეს ხომ სამხედრო ექიმის შვილია!

— მაგას ვინ არ იცნობს, ღელეში ბაყაყები არ დას-  
ტოვა, ყველას ბღღვირი აღინა, დაჭრილებს აწუხებენო!—  
აკისკისდა ეკა.

მასწავლებელმა უკმაყოფილოდ გადაიქნია თავი.

— აი რა, ბავშვებო, თქვენი ახალი ამხანაგი, ალექ-  
სანდრე კრავცოვი რუსია. ვინაიდან ქალაქში მხოლოდ  
რუსული ოთხწლედია, დღეიდან თქვენთან ერთად ისწავ-  
ლის. ალექსანდრემ ქართული არ იცის, თუმცა არც თქვენ  
გისკდებათ დიდი ცოდნით თავი.

— ქართული თუ არ იცის, როგორღა ისწავლის,  
მასწ... — პირი დააღო მომეციამ.

— მათემატიკის გაგებას ისედაც შეძლებს! — მოკ-  
ლედ მოუჭრა დამრიგებელმა.

— სხვა საგნები: გეოგრაფია, ისტორია, ბოტანიკა...—  
სხაპასხუპით მიაყარეს აქეთ-იქიდან.

— რუსულ ენასა და ლიტერატურას ხომ სწავლობთ?  
ეს ორი!

— იფ, რა კარგია, ამისთანა სწავლაზე არც მე ვიტ-  
ყოდი უარს! — გაიხარა მამუკამ.

— უცხო ენა ხომ იცის? — იკითხა ეკამ..

— სწორია, ესეც სამი.

— ფიზიკა, ქიმია, გეომეტრია...

— ცეკვა-სიმღერა — შვიდი!

— ფიზკულტურა — რვა! — ახარხარდნენ ბიჭები.

ახალმოსული მიხვდა, რაშიც იყო საქმე, მაგრამ ხმა არ ამოუღია, თავიჩაქინდრული იატაკს დაშტერებოდა.

— ზოგიერთ საგანს სახლში ისწავლის, დედამისი მასწავლებელია! — თქვა დამრიგებელმა.

— მეც მინდა სახლში სწავლა, ბაბუაჩემიც მასწავლებელია! — ახითხითდა ბაბუცა.

— ჩუმად! — გაწყრა მასწავლებელი, მერე კლასის დამრიგებელს მიუბრუნდა: — ყველაფერი გასაგებია, პარტიკულარული გიორგი!

დამრიგებელმა, აბა, თქვენ იცითო, დაგვიბარა და გავიდა. ახალი მოსწავლე ეკას გვერდით დასვეს, აქაოდა თბილისელი გოგოა, რუსული თქვენზე უკეთ იცისო. მე უხმოდ წამოვდექი მერხიდან...

— აი, თურმე სად ყოფილხარ? — უცრად თავზე წამომადგა ეკა. — მე კი შენს ძებნაში მთელი ეზო ცხრაჯერ შემოვირბინე.

— რა იყო, მოხდა რამე?

— დღეს სალამოს რაიკომში მივდივართ დასამტკიცებლად.

— ვიცი, თუ გინდა, გამოგივლი და ერთად წავიდეთ, ბიჭებსაც ვეტყვი!

ეკა რაღაცნაირად შემოშაყქერდა თვალებში.

— ერთი ეს მითხარი, გეწყინა, ჩემი მერხიდან რომ გადაგსვეს?

— რატომ უნდა მწყენოდა, მერხი — მერხია.

— მაშ, სულ არ გწყენია?

ჩათრევას ჩაყოლა ვამჯობინე. კი, მეწყინა-მეთქი.  
ეკას თვალები გაუბრწყინდა.

— მაშინვე შეგატყვე, რომ გეწყინა. იცი, რა? გინდა  
ისევ უნთან გადმოვჯდები.

— არა, არ შეიძლება, უხერხულია.

— აი, ნახავ, ზარი რომ დაირეკება, ისევ გვერდით  
დაგისკუპდები! — წამოენთო ეკა და გაიქცა.

იმ საღამოს ყველანი კომკავშირის რაიკომში ვიყავით.  
ახლომახლო სოფლების სკოლებიდანაც ჩამოსულიყვნენ.  
დერეფანში ტევა არ იყო. მე, ეკა, მამუკა და გია ერთად  
ვიდექით.

— ჯერ სოფლიდან ჩამოსულებს გამოვიძახებთ! —  
გამოგვიცხადა ახალგაზრდა, ქერათმიანმა გოგონამ.

დერეფანი სკასავით აზუზუნდა.

— ვაითუ, არ მიგვიღონ?

— მაშ რისთვის ჩამოგვიყვანეს ამ სიშორიდან?

— სიშორეს რა ჰკუა აქვს, წესდება თუ იცი?

— ნეტა თუ ეკითხებიან რამეს?

— ამას წინათ ჩემი მეზობელი მიიღეს კომკავშირში,  
მითხრა, არაფერი არ უეითხავთო.

— ნეტავ ასე იყოს! — ინატრა ვიღაცამ.

დრო ნელა, ტაატიტ გადიოდა. ბოლოს, როგორც იქ-  
ნა, ხუთი ფერდაკარგული მოსწავლე გამოიძახეს.

— ჩვენ ერთად შევიდეთ! — მითხრა ეკამ.

— ვერ ხედავ, სიით იძახებენ.

ეკა საწვიმრად მოიღრუბლა. მაგრამ ეს იყო მხოლოდ  
წამით, უცებ ისევ სიხარულით აუციმციმდა თვალები.



— მერე რა, სიაშიც ხომ ერთად ვართ: კიკნაველიძე-კორინთელი.

— ეჰ, ყველაფერს ბედი უნდა! — აღუდღუნდა მამუკა.

— რა შეგეშინდა, ბიჭო, გკითხავენ რამეს? შენც ადე-ქი და უპასუხე! — გიამ მხარი გაჰკრა ამხანაგს.

— შეხედეთ, საშა მოვიდა! — გაიცინა ეკამ.

— გამარჯობა, საშა, — მიეგება მამუკა.

— ეტყობა, გულმა არ მოუთმინა!

— კაკ დელა? — იკითხა საშამ.

— ნიჩეო! — სუყველას დაგვასწრო მამუკამ.

— ვოლნუიტეს?

— რაო, რა თქვა?

— დელავთო? — გვითარგმნა ეკამ.

— და, და! — კვერი დაუკრა გიამ.

— ნუ დელავთ, ყველაფერი კარგად იქნება.

— ერთი ჰკითხე, თვითონ თუა კომკავშირელი?

— შარშან მიმიღეს, მოსკოვში, მე ხომ იქ ვსწავლო-

ბდი.

პირველად შესულები ხუთივე ერთად გამოვიდნენ. მის-

ცვიდნენ ბავშვები, ზოგი რას ეკითხებოდა, ზოგი — რას.

— გკითხეს რამე? — ვეკითხები მღელვარებისაგან ლოყებაწითლებულ ბიჭს.

— არა, არაფერი, სად სწავლობ, როგორ სწავლობო...

— მერე?

— მერე... კარგი ბიჭი ხარო, მითხრეს და გამომიშ-ვეს.

— სხვებს თუ ჰკითხეს?

— მგონი! ბორის ძნელაძე ვინ არისო?

— უთხრა?

— ბოჩის ძნელადე ვინ არ იცის! — იწყინა ბიჭმა.

— ბედნიერი! — თვალი გააყოლა მიმავალს მამუქამ.

— შემდეგი! — კარებში ისევ გამოჩნდა ქერათმიანი გოგონა, — პირველი სკოლა. კიკნაველიძე, ჯოჯუა, ინა-სარიძე, დოლიძე, ცხვარიაშვილი...

შევცბი.

— კიკნაველიძე? სახელი?

გოგონამ ეურნალში ჩაიხედა.

— კიკნაველიძე დავითი! შენა ხარ? აბა, ჩქარა, ბავ-შვებო, შემოდით!

— ასე როგორ შეიძლება! — აღშფოთდა ეკა.

— მიდი, მიდი! — მხარზე ხელი დამკრა საშამ.

საკმაოდ მოზრდილ ოთახში ვეება, მწვანე მაუდგა-დაფარებულ მაგიდას ათამდე ახალგაზრდა უჯდა.

— აბა, პირველი რომელია? — იკითხა რაიკომის მდი-ვანმა.

— კიკნაველიძე დავით გიორგის ძე. მოსწავლე. მე-შვიდე კლასი.

— ა, ეს შენ ხარ კიკნაველიძე, ლექსებს რომ წერ, სასკოლო კედლის გაზეთის რედაქტორი?

— დიახ, ეგ გახლავთ, პატივცემულო მერაბ! — დამას-წრო ქერათმიანმა გოგონამ.

— ძალიან კარგი. როგორ მიდის სწავლის საქმე? — მკითხა რაიკომის მდივანმა, მაგრამ ჩემს პასუხს არ დაე-ლოდა, ისევ იმ ქერათმიან გოგონას მიუბრუნდა: — ვინ აძლევს რეკომენდაციას?

— სკოლის კომკავშირის კომიტეტის მდივანი და ორი სხვა კომკავშირელი ამხანაგი. წავიკითხო?

— არ არის საჭირო! — თქვა რაიკომის მდივანმა და ბიუროს წევრებს გადახედა, — თუ მდივანი უქერს მხარს, რა გვეთქმის, ამხანაგებო, უნდა მივიღოთ!

თანხმობის ნიშნად ყველამ ხელი ასწია.

— მაშასადამე, ერთხმად!

არ მახსოვს, როგორ გამოვეარდი გარეთ. დერეფნის ბოლოს ეკას ძახილმა შემაჩერა.

— სად გარბიხარ, ბიჭო? მიგიღეს?

— რა თქმა უნდა! — ამაყად მივუგე მე.



„საყვარელო მამა!

აგერ ერთი წელია ერთმანეთი არ გვინახავს. მე უკვე კომკავშირელი ვარ.

დედა ისევ სოფელშია. ბაბუა ფილიპე იყო ავად. ახლა კარგად არის. იმ ბიჭის ჩამოსვლამდე ღმერთი როგორ გამწირავსო, უთქვამს.

ამას წინათ ერთი დაჭრილი შეხვედრია ბებიას. მეზობელი სოფლიდან ყოფილა. იმას უთქვამს: შენი კაკო ქერჩში შემხვდა, საღსალამათი დავტოვეო. განა ომში ყველანი იღუპებიან? ხომ ასეა, მამიკო?

ჩვენი მეზობლის, კალისას შვილის დაღუპვის ამბავი მოვიდა. გამოიტირეს. მაგრამ ორმოცი დღეც არ იყო გასული, კალისამ შავი არშია შემოაგლიჯა აივნის სვეტებს. სატირალი ჯერ არაფერი მაქვს. აი, დამთავრდება ომი, ვინც მოსასვლელია მოვა, ვინც არა და იმასაც მაშინ

ვნახავთო. ბეზიას იმედი მიეცა, ახლა ისე ხშირ-ხშირად აღარ ტირის.

აღბათ ჩვენი ქუჩის ამბავი გაინტერესებს. ყველანი კარგად არიან, მხოლოდ დიანოზა მჭედელი ვერაა ხასიათზე, სამუშაო აღარა მაქვს, რაც ქალაქში ცხენები იყო, პატრონებთან ერთად წაიყვანესო.

აღბათ გახსოვს, წინა წერილში გწერდი პაშასა და იაშას ამბავს. პაშა ისევ დაღონებული დადის, თურმე იაშას დაღუპვის ამბავი გაუგია. საბრალო იაშა! რა კარგი ვაჟკაცი იყო!

ექიმი ადამოვსკი ჩვეულებრივად სახლში იშვიათად ათევს ღამეს. მისი შვილი იგორი მთელი დღეები ოთახში ზის და წიგნების მოსატანად ბიბლიოთეკაში მე მგზავნის. ერონისს მკლავზე ჭრილობა გაუჩრთულდა, უნდა მოგჭრათო, ეუბნებიან, მაგრამ სასტიკ უარზეა. ახლა ცოტა უკეთაა, ასე რომ, შეიძლება ყველაფერმა მშვიდობიანად ჩაიაროს. ახლა, ამ წერილს რომ გწერ, ბეზია თავზე მადგას და მეუბნება: მისწერე, შეეხვეწოს უფროსებს, იქნებ ცოტა ხნით მაინც გამოუშვანო. მე განა არ ვიცი, წერილის საწერადაც ვერ იცლი, მაგრამ ერთი სიტყვა — „კარგად ვარ“ მაინც მოგვწერე. მეტი არაფერი არ გვინდა.

ჰო, ჩვენი გვირაბის შეკეთება დაიწყეს, ბატონმა პლატონმა თქვა, რესტავრაციას უკეთებენო.

რაც შეეხება გვირაბის საიდუმლო სეიფის ამბავს, ყველაფერი ისევ იდუმალეებით არის მოცული. ეს კია, ერთხელ შებინდებისას გვირაბის შესასვლელთან სან-

თლების ლაპლაპს მოვკარით თვალი. ეს იყო და ეს. გვირაბში შესვლა კი ჭერჭერობით ვერ გადაგვიწყვეტია.

მე, ალბათ, მალე სოფელში წავალ, კარტოფილი გვაქვს ამოსაღები.

მეტი რა მოგწერო, იყავი კარგად. მართლა, 'სულ დამავიწყდა, კუნტას გოგო შეეძინა'.

## საბრძოლო დავალება

გზის პირად, სამჭედლოს წინ, თხრილში ვზივართ. უბეში საგანგებოდ შერჩეული საშურდულე კენჭები გვიყვრია. წინათ რომ ბელურებს და შაშვებს ვესროდით, ახლა თვითოეული მამასისხლად გვიღირს.

რა ხანია, მზე საშუადღეოს გადასცდა.

ქუჩაში იშვიათად თუ გაივლის ვინმე, ჩერო-ჩერო. ეს უკვე მერამდენე ეტლმა ჩაიქროლა ხრიგინით.

რალა დღეს გაუწყრა ღმერთი მეეტლე ბიკიას? არ იქნა, მის გამოჩენას საშველი არ დაადგა.

ეტლი ჩვენს ქალაქში თითით საჩვენებელი როდია. ომაჰდე სადგურის უკან, ჭადრებთან, მატარებლების მოლოდინში ერთი აურზაური იდგა. ისმოდა ბოლმაჩაგუბებული „მიიწიე-გაიწიე!“ მეეტლეები ეტლების შეღებვა-შელამაზებაშიც მუშტრებივით ეცილებოდნენ ერთმანეთს.

სხვადასხვაფერად შეღებილ ეტლებს შორიდანვე სცნობდნენ ციხისგორელები.

წითლად შეღებილი და ასევე წითელი ხავერდით.

გაწყობილი ეტლი გიგო მიმინოშვილისა იყო; მწვანე — ნიკანდრო ჩოჩიასი; ცისფერი — ჩემი თანაკლასელი ბაბუცას მამისა. ყავისფერს მისი ძმები მელენტი და დათიკო დააგელვებდნენ რიგრიგობით.

ოდესღაც ლამაზად შეღებილ ეტლებს წინანდელი პეწი თანდათან დაეკარგათ. საკისრებზე მოწყრიალე ეუვნებს თითქოს ხმა დაებეჟათ. ძველებური უღრიალით არ მიაქვთ მტვრიანი ქუჩები. ქალაქში ეტლები მაინც საკმაოდ, მხოლოდ კოფოზე მოხუცები ან ცხვირმოუხოცავი ბიჭ-ბუჭები სხედან. ახლა ხშირად გაიგონებ: ამათ მიმნდობ კაცს ცხრა თავი უნდა ჰქონდესო.

ბიკია ჯარში არ წაუყვანიათ. ცოტა თვალს აკლია, ცოტა ყურს და კარგა გვარიანადაც მოიკოჭლებს.

დიდი აჯაჯა კაცი კია. მთელ ქალაქში, ალბათ, სანთლით რომ ეძებოთ, ერთ ბავშვსაც ვერ იპოვით, მისი ცხრაფად დაწნული მათრახის სიმწარე არ ეწვნისო. რასაკვირველია, არც ჩვენ გვაკლდა ეს „წყალობა.“

იმ დღეს საბანაოდ ვიყავით ნოღელაზე. მზის გადახრამდე ვიწექი მდინარის პირას, სილაზე. მერე ნელნელა, ზოზინ-ზოზინით გამოვყევით გზას. მოსახვევთან ბიკიას ეტლმა ჩაგვიქროლა. დავედევნეთ და უკან დავეკიდეთ. ჩამავალი მზის შუქზე ჩვენი ლანდებიც ეტლს გვერდი-გვერდ მისდევდა. თურმე მეეტლემ მაშინვე შეგვაძინა. ცოტა ხანს გვიცადა, თითქოს აქ არაფერი იყო, ფიცხლად მიერეკებოდა ცხენებს. უცებ... ერთი, ორი, სამი! ყურის ძირში დაიზუზუნა მათრახმა. პანტაპუნტით გადმოვცვივდით ეტლიდან, მტვერში ცხვირჩარგულთ კარგა ხანს გვესმოდა ბიკიას მხიარული როხროხი...

დრო, თითქოს ძალით ეზიდებიანო, ნელა, ტატიტ გადის. მეეტლე ბიკია ისევ არა ჩანს. ეიცოდით, ამ დროს, როგორც ყოველთვის, დაბარებულებით გამოჩნდებოდა ხოლმე ჩვენს ქუჩაზე. ეტლში ჩვენი მეზობელი, მეწადე ნიკო უზის. ნიკოს ბაზრის შესასვლელთან პატარა სახელოსნო ჯიხური უდგას. შიგ ორი ობოლი ძმისწული ჰყავს სამადლოდ — ხელობას ასწავლის. ნიკოს ნამდვილი ოქროს ხელი აქვს. უმეტესად ფეხსაცმელებს კერავს, მაგრამ შიგადაშიგ ჭრიჭინა აზიურებსაც გამოურევს. თვითონ მას ჩექმები არასოდეს არ სცმია, ჩემისთანა ტანმორჩილ კაცს სულ მაპატარავებსო. მე თუ მკითხავთ, სულ სხვაა მისი კუჭის ტკივილი... თავისთვის არ ემეტება.

ქალაქში თითქოს სიცოცხლე ჩაკვდა. სადღაა ძველებური საქორწილო ჭექა-ქუხილი. ზემო იპერლების წყალწყალა ღვინით მუცელდასიებული მეგრელები, რა ხანია, ბანცალ-ბანცალით აღარ მიჰყვებიან მთვარიანში ოკრობოკრო შუკებს. დავიწყებას მიეცა ერთადერთი გასართობი — მარულა. სადღაა მარულას ცხენები.

ვინ იცის, სად, რომელ აღმართს ებრძვის ახლა მათი წარჩადგმული მუხლები. მარუხთან? ბალყარეთის მთებში? თუ სიკვდილის ცელით გადათიბულ ყირიმის სტეპებში...

— დათო! — ანაზღად მომესმა ძახილი.

სათვარიდან ფრთხილად ვიხედები. ჰოსპიტლის ეზოში დაჭრილი მეზღვაური დგას. ის ახლა ერთადერთი ქართველი მეზღვაურია მთელ ჰოსპიტალში.

— მოდი აქ, საქმე მაქვს შენთან! — ხელს მიქნევს ერონისი.

ვიცი, რა საქმეც აქვს, ალბათ, თამბაქოს საშოვნელად უნდა გამგზავნოს.

წელათრევით ამოვდივარ საფარიდან.

— იცი, რა? — ცოტაოდენი ყოყმანის შემდეგ იწყებს მეზღვაური, — შენ უკვე დიდი ბიჭი ხარ და გამიგებ... მე ალბათ იმ კვირას მაინც გამწერენ, უკვე ქაზგად ზარო, მითხრეს. სახლში აგერ, ათი წერილი გავაგზავნე და პასუხი მაინც არა ჩანს. არ ვიცი, რა ვიფიქრო. მარტო-ხელა არიან მოხუცები, ჩემი უფროსი და თუმცა ახლო სოფელშია გათხოვილი, მაგრამ იმას მისი გაჭირვებაც ეყოფა. ქმარი ფრონტზეა, სამი ჩვილი ბავშვი და მოხუცები ყავს სახლში. რას იტყვი, როგორ მოვიქცე?

— უნდა წახვიდე, ძია ერონის, უსათუოდ უნდა წახვიდე და ინახულო...

— მეც ასე ვფიქრობდი, მეგონა, ერთი-ორი დღის შევებულებას მაინც მომცემენ-მეთქი, მაგრამ... არაფერი გამოდის...

„ეჰ, ძნელია, ძალიან ძნელი, აგერ, ყურისძირში, კაცს მშობლები გყავდეს და ვერ ნახო.“

— მაშ, რა უნდა ქნათ? — დამასწრო შეკითხვა გიამ.

— დათო, ისევ შენ უნდა მიშველო! — ერონისმა ხელი შემომხვია, დავიბენი.

— მე? მე რა შემიძლია?

— ჩემიანებთან უნდა წახვიდე! ჩემს ამბავს გააგებინებ და იმათ ამბავს ხომ მომიტან და მომიტან...

— მერე ბებია?



- ბებიას მე მოველაპარაკები.
- არა, არ გამიშვებს!
- ეგ აშბავი ჩემზე იყოს, თანახმა ხარ?
- ღათოზე თუ ეტყვი, ჩემზედაც უთხარით დედაჩემს, მეც მინდა წასვლა! — შეეხვეწა გია.
- არა, ერთიც საკმარისია, ხომ იცით, ახლა მატარებლით რა ძნელია მგზავრობა! — განაწყენებულ გიას თავზე ხელი გადაუსვა მეზღვაურმა და შერე ისევ ჰე მომიბრუნდა.
- ღათო, იცოდე, ეს ნამდვილი საბრძოლო დავალებაა!

## თეთრი ღამე

დიდი სამამულო ომის დროს ვისაც ერთხელ მაინც უმგზავრია მატარებლით, თუნდაც სადგურიდან სადგურამდე და რევიზორის განრისხებული სახისათვის შეუხედავს, როცა ჯიბეში რჩიოდე გროშიც არ უქყავის. მას არ შეიძლება არ ეფიქროს: ახლა ყველაზე კარგი გამოსავალი გაქანებული მატარებლიდან კისრისტეხით გადმოხტომა იქნებაო.

გადაწყდა, მივდივარ გურიაში. რასაკვირველია, ერონისის მოცემული ფულით ბილეთი არ მიყიდიო. პირველსავე შემხვედრ მატარებელს გავყევი სამტრედიამდე. ჯიბეში ერონისის წერილი, ხოლო გულში, გზაზე არ დამიჭირონ-მეთქი, იმის შიში მელო.

სამტრედიიდან ჩემმა მატარებელმა პირდაპირ გაუ-

ტია. მე კი ბათუმისაკენ მიმავალ მატარებელს დავეუწყე ლოდინი. რაღაც ხუთიოდე წუთში დაცარიელდა სადგურის ბაქანი. მოსაცდელ დარბაზში მგზავრებიც ცოტანი იყვნენ.

ჯიბიდან საგზლად გამოტანებული ჩაშიჩი ამოვიღე და ჭამა დავიწყე. ვინ იცის, როდის მოვა ეს დასამტკრევე მატარებელი-მეთქი.

— რას ჭამ? — ვხედავ, გვერდით ვიღაც უცნობი, ასე ჩემი ზნის ბიჭი ამომდგომია. ტანზე დახეული კიტელო აცვია, მეზღვაურის უკაქარღო ქუდი თვალებზე ჩამოუფხატავს. მიკვირს, ასე შეუშინევლად საიდან გამოტყვრა-იკრიჭება. ეტყობა, მაწანწალაა.

— რა გინდა?! — უკმაყოფილოდ ვფრუტუნებ მე.

— რას ჭამ-მეთქი? — ახლა უფრო გამომწვევად მეკითხება უცნობი.

— არაფერს!

— არაფერს განა ჭამენ? — ხეიხინით გადმოყარა ცხენის კბილები.

— წადი, შენი გზა ნახე!

— მაჭამე რა ცოტა?!

— არა მაქვს!

— სულ ცოტა, თუნდაც ერთი მარცვალი!

„ამას ვის გადავეკიდე! — ვფიქრობ მე; — კარგად ვიცნობ, რა ვაუბატონიც ბრძანდება, ასეთები აღვილად როლი მოგშორდებიან. ჯანდაბას მისი თავი!“

ჯიბიდან მუჭით ვიღებ ჩამიჩს და გაზინზლულ ხელზე ვუყრი.

— ცოტა კიდევ, ძუნწი ნუ ხარ!

— გეყოფა!

მოდლაღე ალბათ მიხვდა, მეტს რომ არ მივცემდი, თავი დაჰანება და იქვე ჩაუტყდა.

— საით გაგიწევია, ჰა? — მკითხა, როცა უკანასკნელი მარცვალ გიდაყლაპა.

— არსად!

— მაშ, სადგურში რაღას უტდი?

— მინდა და ვარ! შენ ვინ გეკითხება?

— გინდა, ჩემი ქუდი მოგცე? შეხედე, რა კარგია, მხოლოდ ლენტი აკლია, ლენტსაც იშოვი და ნამდვილი მეზღვაური იქნები.

„გიჟია ეს ოხერი!“

— ჰა, გინდა? ტყუილად მოგცემ! ცოტაოდენი ჩამიჩი კიდევ დამიყარე და შენი იყოს!

არ მინდა-მეთქი, ვეუბნები, მაგრამ გაგიგონია, შეაყარე კედელს ცერცვი, არაფრის გაგონება არ უნდა.

ჩათრევას ისევ ჩაყოლა ვამჯობინე.

— ა, კიდევ, მეტი არ მომთხოვო, იცოდე, მეც არაფერი დამრჩა!

— საით გაგიწევია? ჰა! — ეს უკვე მერამდენედ გეკითხება.

ბათუმში მივდივარ-მეთქი.

— მაშ, თანამგზავრები ვყოფილვართ! — გაიხარა ძალად მაცხონე ბიჭმა, — მეც ბათუმში მივდივარ, გემზე უნდა მოვეწყო იუნგად, გერმანელებს უნდა დავცხო! უხ, მაგათი...

შევხედე, ბიჭს თვალები ანთებოდა, მეზღვაურის ქუდი ახლა კეფაზე მოეგდო, იღვაც რაღაცნაირად გაჯგიმული,

მივხვდი, არ ტყუოდა. შემშურდა კიდევ მისი. მეც რამდენჯერ მიფიქრია გემზე იუნგად წასვლა. თუნდაც იმ დღეს, როცა ბიძიას დალუპვის ამბავი მოვიდა. მერე იაშას მინდოდა წაეყოლოდი, მაგრამ ეკამ გამყიდა თხასავით. არავის უთხრა-მეთქი, დავანამუსე. მეორე დღეს კი მთელმა უბანმა იცოდა.

— მერე, მიგიღებენ გემზე? — იკვნეულად ვეკითხები მე.

— მიმიღებენ, ნამდვილად მიმიღებენ! ერთმა მეზღვაურმა მითხრა, შენისთანა უღედმამო ბიჭები გემზე ბარეოთხი გეყავსო.

— შენ რა, მშობლები არა გყავს?

— მამა ფრონტზეა, დედა გერმანელებმა დახვრიტეს, ჩვენს სოფელში მასწავლებელი იყო.

— მამაჩემიც ფრონტზეა, მხოლოდ დედა და ბებია მყავს! რას იტყვი, მე არ მიმიღებენ გემზე?

— რა თქმა უნდა, მიგიღებენ! თუ გკითხეს. შენც ადექი და უთხარი, ობოლი ვარ, არავინ მყავს-თქო.

უცნობი ბიჭის სიტყვებმა დამაფიქრა. მტრისას, ჩვენს სახლში ამბავი დატრიალდებოდა, ჩემს დაქარგვას რომ გაიგებდნენ! მერე რა მოხდა? გემზე მოვეწყობი თუ არა, წერილს მივწერ, ნუ გეშინიათ, ცოცხალი ვარ, მამაჩემთან მივდივარ ფრონტზე-მეთქი. ცოტას ივიშვიშებენ, ცრემლებს ვადმოღვრიან, მერე დაწყენარდებიან. მორჩა და გათავდა!

მაგრამ ერონისი? წერილი? მისი მოხუცებული მშობლები? ეს ხომ სულმდაბლობაა! არა, ასე არ ივარგებს, ჯერ საქმე, მერე? მერე ვნახოთ!

ჩემმა ასეთმა გადაწყვეტილებამ მევე გამახარა.

— მატარებელი საცაა ჩამოდგება! — ფიქრებიდან გამოვყევიარ მომავალი იუნგას ხმას, — აი, იქეთ უნდა გადავიდეთ. დაიძვრება თუ არა, პოპლა! ზედ სახურავზე გავჩნდებით.

რამდენიმე წუთის შემდეგ მატარებელი ორთავეს შავი ზღვის სანაპიროსაკენ მიგვაქროლებდა.

საჯავახოსთან მატარებელი კარგა ხნით დააკავეს: სამხედრო ეშელონს უნდა გაეელო. ზაფხულის მცხუნვარე მზით გავარვარებულ თუნუქზე წოლამ ერთიანად მოგვილო ბოლო, მოგვთენთა, მოგვაწყურა. ვანო (ასე ერქვა ჩემს ახლად გაცნობილ თანამგზავრს) წყალსაქაჩისაკენ გაიქცა, მეც ავედევნე და მოხდა წარმოუდგენელი რამ... დამიჭირეს. იმ ეშმაკის ფეხმა კი როგორღაც თავს უშველა.

და აი, მე მილიციის სამორიგეოში ვზივარ. მატარებელი კარგა ხანია წავიდა.

დამის პირველი საათია.

კედელთან მიდგმულ ვიწრო ნარზე ვიღაც უცნობი ხვრინავს. მთვრალია. იგი ჩემს შემდეგ მოიყვანეს. ერთხანს იყვირა, იშფოთა, მერე ძილად მიეგდო: დამაცათ, სეირს ზვალ დილით გაჩვენებთო.

მაგიდასთან მორიგე მილიციელი ყვინთავს, ხანდახან ტელეფონის წკრილზე თუ ასწევს თავს. დაღლილი და ნალვლიანი სახე აქვს. თავპირი ჩამოსტირის.

„ბედნიერი, — ვფიქრობ მთვრალ უცნობზე, — არხეინად ხვრინავს. იქნებ ზვალ დილით გააპანდურონ აქე-

დან... მე კი... ვინ იცის, რამდენ ხანს მომიწევს ყურ-  
ყუტი.

მაინც როგორ ნელა გადის დრო. ასე მგონია, მთელი  
საუკუნე გავიდა მას შემდეგ, რაც კედლის საათმა პირ-  
ველი ღარეკა და ისევ პირველი საათია... ამ მთვრალმაც  
რომ ჩემს ჭიბრზე უმატა ხვრინვას!

მორიგესაც ეძინება! ვინმე მაინც შემოვიდეს, ნუთუ  
ამაღამ გახდა ყველა პატიოსანი, არავის არ იჭერენ?

ჩუმად, ჩემთვის ვუსტვენ. ასე ვიცი ხოლმე, როცა  
მარტო ვარ და ვნერვიულობ, ან რაღაცაზე ვფიქრობ. მაგ-  
რამ მე ახლა არაფერზე ვფიქრობ, მხოლოდ ვუსტვენ  
და ვერა და ვერ მომიგონია, საიდან მახსოვს ეს მელო-  
დია. გონებას ვძაბავ. არაფერი გამოდის. იქნებ მილი-  
ციელმა იცოდეს. რა მოხდება, რომ ვკითხო?

— შენ რა, ტყეში ხომ არა ხარ? — უძილობისაგან  
დამძიმებულ თავს სწევს მორიგე.

— ამხანაგო კაპიტანო!

— დაიძინე, დაიძინე!

მორიგე, მგონი, ზემდეგია, მაგრამ მე კაპიტანს ვე-  
ძახი, ვიცი, სიამოვნებს.

— ამხანაგო კაპიტანო!

— რა მოგივიდა, ბიჭო?

— თქვენ ბებია გყავთ?

მორიგეს თითქოს ცივი წყალი გადაასხესო, ბურანი-  
დან ერკვევა.

კითხვას ვუშეორებ.

მორიგეს ბებია არა ჰყავს.

— მე კი მყავს, ამხანაგო კაპიტანო!

— კარგი, გეყოფა, დაიძინე ახლა!

ხმაზე ვაჭყობ, მილიციელს ვეცოდები.

— მე ბებიამ გაშხარდა... იცი, რა კარგი ბებია მყავს, რამდენჯერ ამიყვანია ხელში, ბუმბულივით მჩატეა, ცალი ხელითაც ავწევდი, მაგრამ არ მიშვებს...

მილიციელი ღება და ჩემთან მოდის.

— ხომ არ გცივა, ბიჭო?

— არა!

— აი, თუ გინდა ჩემი მაზარა შოისხი...

— გმადლობთ, არ მინდა... ცხელა!

— მაშ, ლანჩხუთში მიღიხარ, არა?

— ჰო!

— ვისთან?

— ხომ გითხარით, მისამართიც მაქვს და წერილიც...

— ჰო, ჰო, კარგი, დაიძინე ახლა!

დილით ჩემმა კაპიტანმა სამორიგეოს უკან, გზაჯვარედინზე გამომიყვანა და ლანჩხუთისაკენ მიმავალი დანჯარეული მანქანის შოფერს ჩამაბარა.

მანქანა ნელა, ჭაყჭაყით მიუყვებოდა ოკრობოკრო, მტვრიან გზას და ყოველი კილომეტრის გავლის შემდეგ ჩერდებოდა. მძლოლი კაბინიდან გაღმოდრიოდა, სადღაც გარბოდა, ცოტა ხნის შემდეგ ძარაზე მანქანის რომელიმე ნაწილს აგდებდა და ისევ მიუყვებოდით შარას.

— ეს რა მანქანაა? — იცინოდა შოფერი, — ძარაში ადგილი არაა, იმდენი ნაწილი ყრია, ეს ოხერი კი შაინც მიდის. ან მე არაფერი მესმის, ან ამ მანქანის გამკეთებლებს არა აქვთ ჭკუა, ამდენ ზედმეტ ნაწილს რომ უკეთებენ...

ლაშისღელესთან მანქანამ უკანასკნელად ჩაიფრუტუნა და გაჩერდა. ამჯერად, მგონი საბოლოოდ. შოფერმა ხელი ჩაიქნია.

— აქედან სადამომდე თუ გავალწიე, სასწაული იქნება.

— მოგეხმარები, ბიძია! — ვუთხარი მე.

— არა, არა, წადი, შენს საქმეს მიხედე, აქედან იმ სოფლამდე ახლოა. პირდაპირ ამ გზას გაჰყევი. გზაზე ვინმე მადლიანი შეგხვდება, მერე ის მიგასწავლია.

შოფერს გამოვემშვიდობე და წელათრევიტ გავუღეჭი გზას.

\* \*

შარაგზაზე მთათა ვეება ჩრდილი აფენია.

გზა მთებისაკენ მიდის და თითქოს დასასრული არ უჩანს.

მაინც რა შორს ყოფილა ერონისის სოფელი!

აგერ, გზის პირად, წყარო მოწანწკარებს.

ახლა ცივი წყალი ნამდვილად სულზე მისწრებაა.

ანაზღად წყაროს თავზე მაყვლის ბუჩქი შეირხა. ბუჩქიდან პატარა, ფეხშიშველი ბიჭუნა გამოხტა და ქურციკივით აჰყვა ფერდობს, მერე უცებ შედგა, აღმაცერად გადმომხედა და ისევ გაიქცა. ზემოთ, ჯუჯა ხის ჩეროდან, შესახვედრად გოგონა გამოვიდა.

— რა მოხდა, გოჩა?

აქლოშინებული ბიჭი სულს ძლივს ითქვამს და ჩემსკენ იშვერს ხელს. მე წყაროსთან ვდგავარ და ვილიმები. ნუთუ ასეთი საფრთხობელა ვარ.



— ვინა ხარ? რა გინდა?—მეძახის ზემოდან გაბრაზებული გოგო.

— ვინ უნდა ვიყო? ადამიანი ვარ! — მიკვირს მე.

— ბავშვს რატომ აშინებ?

ეტყობა, დიდი კოკობზიკა ვინმეა.

— არავისაც არ ვაშინებ, ჩემს გზაზე მივდივარ!

— ჰოდა, წადი, შენს გზას ეწიე!

— რა, აქ დგომა არ შეიძლება?

— არა!

— მაშინ არ წავეალ!

გოგონამ მიიხედ-მოიხედა, ქვას თუ ეძებს.

— გოჩა, წადი, ბებიას დაუძახე, მგონი, ვილაც შერეკილია!

— დაიცათ, რაღაც მაქვს სათქმელი! — მუდარით ვეძახი მე.

— თქვი, რა გინდა! — გოგონა ოდნავ მოლბა.

— ერონის ჭანტურიას სახლი ხომ არ იცი?

— ვისი?

— ერონის ჭანტურიასი!

— ერონისი ჯარშია!

— ვიცი, რომ ჯარშია, მე მისი სახლი მინდა. გესმის!

— შენ ვინა ხარ?

ჭირის დღესავით მეზარება ამისთანა ყრუანჩალებთან ლაპარაკი, მაგრამ სხვა გამოსავალი არ არის.

— ქალაქელი ვარ, ერონისის მშობლებთან მაქვს საქმე!

— რა საქმე?

მივხვდი, მასთან ლაპარაკი წყლის ნაყვა იყო, შევეტ-

რიალდი და წასვლა დაეპირე. ან სად მქონდა მასთან წილადობილობის თავი.

— დაიცა! — შეფუცხუნდა გოგონა, — აქვე, ზემოთ ცხოვრობენ! — მერე პატარა ბიჭს მიუბრუნდა: — გოჩა, გაიქეცი და ბებიას დაუძახე, უთხარი, შენთან სტუმარი-ათქო.

ბიჭი გაიქცა. გოგონა ნელა-ნელა ჩამოჰყვა საცალფეხო ბილიკს. ახლალა შეენიშნე, რომ გზიდან ფერდობს პატარა ბილიკი მიუყვებოდა. გოგონა შუა გზაზე შეჩერდა.

— ამოდი, რაღას უცდი?

მე წყაროს წყალი ისევ შევსვი და აღმართს აეყევი.

მალე მაღალი აკაციებით შემორაგეულ ეზოში წითელი კრამიტით დახურული პატარა ოლა გამოჩნდა. ქიშკართან მოხუცი ქალი გველოდა. მისვლისთანავე მასპინძელი გულისყურით დამაკვირდა.

— ვინა ხარ, შეილო? რა გაგჭირვებია?

— ერონისის ამბავი მოგიტანე, ბებია, — ქლოშინით მივუღე მე.

— ჩამე უბედურება ხომ არ არის ჩემს თავს?! — სასოწარკვეთით შეიცხადა ქალმა, — ცუდი არაუფერი მითხრა, შეილო, დედა ვარ!

— არა, ბები, ერონისის წერილი მოგიტანე. — უბის ჯიბიდან სამკუთხა ბარათი ამოვიღე. აქამდე უხმოდ მდგარი გოგონა სიხარულით აიტკიცა.

— მაშ, კარგად არის, არა?

— ძალიან კარგად!

— შენ კი გენაცვალოს ჩემი თავი! იაგორ, იაგორ! — დაფაცურდა მოხუცი, — ჩვენი ოქროიას წერილი მოვი-

და, იაგორ! — უცებ ბარათი ხელიდან გამოშვლიჯა და ოდისაკენ ცუხცუხით გაიქცა.

— წამოდი! — სახელოზე დამქაჩა გოგონამ, როცა მოხუცე ქალი ოდის კარებში მიიმალა.

ჩემს სიცოცხლეში პირველად ახლა ვიგრძენი ჩემთვის უცნობი საამო დადლილობა, რომლის ფასი მხოლოდ ვალმოხდილმა ადამიანებმა იციან.

## ხუთი მანეთი

დიდრონი, მწვანე მთებთან შემოზღუდული პატარა სოფელი თითქოს ქარიშხლის მოლოდინში გარინდულა. ვეება მზის სხივებს დაულამბავს აქა-იქ მთის კალთებზე დაუღვევრად მიყრილ-მოყრილი თეთრი ღრუბლის ბალიშები.

გზის პირად აკაციისა და ჭადრის ხეთა კენწეროებს სუნთქვა შეჰკვრიათ. გულისგამაწვრილებლად კრიჭინებენ კრიჭინობელეზი. საოცარია, ამდენი კრიჭინით თავი რომ არ უსკდებათ!

ცხელა... ცა თითქოს გახურებული თონეა, აიღეს და თავზე დაამხეს დედამიწას.

მზის ცხელ გულზე, მტვერში წვეს შარა-გზა. ბროწეულებს გაღმა-გამოღმა ლობეებიდან გადმოუყრიათ წითელი კბილები.

ჩვენს წინ პატარა პერანგისამარა ბიჭი მიტანტალებს. ფეხებს მტვერში განგებ მიითრევს და მტვრის ბუქს პირდაპირ სახეში გვაყრის.

— რას შვრები? — შევუძახე ერთი-ორჯერ, მაგრამ ყურიც არ შეიბერტყა. გავბრაზდი და მერე როგორ! მოგეცათ ლხენა, იკადრა გაქცევა. სულ დედა, დედას ძახილით გადაეველო ალაგეს და თუთის ხეების ჩრდილში მიიმალა.

— თბოლია საწყალი! გასულ კვირას მამამისის დაღუპვის ქაღალდი მოვიდა! — მეუბნება ერონისის დედა, — ჩემი ბიჭის კბილა იყო, ჯარში ერთად წაიყვანეს. ვაი, მის დედას, უბედურს!

— რა ვიცოდი! — დამნაშავესავეთ მოვეყევი თავის მართლებას, — განა ვცემდი, ისე, შეშინება მინდოდა..

— არაფერია, შვილო! — შევეცოდე მოხუცს, — ძალიანაც კარგი ჰქენ, ჯერ უჭკუოა, მეორედ არ იზამს...

ღელეზე გადებულ ფიცრის ბოგირს გამოვცდით. მარცხნივ, ოდნავ ზემოთ, ბეჭაობზე ჯარგვალა წისქვილია. ტანლატანა ტირიფებს თმებივით ჩამოშლილი ტოტები წყალში ჩაუყრიათ. წისქვილის წინ ხარებგამოხსნილი უკემი ღვას. ზედ შვიდიოდღე წლის ბიჭი ზის, საფქვავს თუ ღარაჯობს.

— ეჰ! — ხენეშის ბებია მარგალიტა, — სადამდე მივია ჩვენი საქმე! მთელი სოფლის საფქვავი ერთ ურემზე ეტევა. ამდენი მარტო ჩვენი ოჯახიდან მოგვქონდა ერთ გზობაზე. იმ ჩემმა ბერიკაცმაც რაღა ახლა მიღლატა? ერთი წუთით მისი დატოვება არ შემიძლია, თორემ სახლში რა გამაჩერებდა! წავიდოდი ჩემს ბიჭთან, ენაცვალოს დედა! მოვეუვლიდი. ვითომ ჩემზე უკეთესად უვლიან იქ? — რაღაცნაირი დაეჭვებით შემომხედა, აბა, რას იტყვისო, მაგრამ როცა არაფერი ვუპასუხე, თავისი-

ვე ნათქვამის დასადასტურებლად ოდნავ ხმამაღლა დას-  
ძინა: — არა, ნამდვილად არა! დედაზე უკეთ ვინ მიხე-  
დავს შეილს? მისი ცქერით მაინც გავძლებოდი.

— იქ ყველას კარგად უვლიან, ბებია, სულ თეთრ  
პურსა და მაკარონს აჭმევენ, მამას გეფიცები!

— მამა ხომ გყავს, შეილო?

— კი, ფრონტზეა.

— ღმერთმა მშვიდობით ჩამოიყვანოს თავის სახლში!  
დედა?

— დედაც!

— კარგი დაგემაართოს. ის ბიჭი რომ მწერს, დაჭრილი  
ვიყავიო, მართლა მძიმედ იყო დაჭრილი?

— ცოტა რაღაც გაკაწრული მაქვსო, მითხრა, ახლა  
კარგადაა, მალე გაეწერება ჰოსპიტლიდან.

— იმ შენს კარვ დედ-მამას გაფიცებ, მართალს მე-  
უბნები?

— კი, ბებია, სტამბოლის კაჟივითაა!

— შენ გაიხარე, შეილო, კარგი მახარობელი შენა ხარ-  
ნეტა, ცოტა ხნით სახლში არ გამოუშვებენ?

— არ ვიცი, უფროსებს კი სთხოვა, შეიძლება...

— დედა, დედა, ერთი ჩემი ოქროია დამანახა და მერე  
თუ გინდა მოვკვდე, არ ვჩივი! — ავიშვიშდა მოხუცი,  
მაგრამ წუხილს მალე მორჩა. — რაო, რას ამბობენ ქა-  
ლაქში, კიდევ დიდხანს იქნებაო რი?

— რა ვიცი, ზოგი რას ამბობს და ზოგი რას.

— მაინც?

— ჭკვიან ხალხს თუ დაუუჭერებთ, მალე უნდა გათავ-  
დესო!

— ღმერთმა კეთილად გისმინოს, შვილო!

სამანქანო გზაზე გავედით. აქედან უკვე მოჩანდა რკინიგზის ყვითლად შეღებილი სადგურის შენობა.

მზე ისევ გულდაგულ აცხუნებდა ისედაც გადახურებულ მიწას. გზის ორივე მხარეს ახლად ტანაყრილ სიმინდის ყანებს ხვატი ყელში უჭერდა, გასაქანს არ აძლევდა... ჩაყვითლებული ფურცლები დაჭრილი ფრინველის ფრთებივით ჩამოსცვენოდათ. ყანის პირებზე კახამბლისა და კაკლის ხის მწვანე ვარჯები გარინდებულნი შესცქეროდნენ ბუნების ამ უსამართლობას.

წყალი, წყალი, წყალი! თითქოს ამ უხმო დუმბულში ისმოდა მათი სასოწარკვეთილი მუდარა.

მართლაცდა, რა მადლია ახლა წვიმა, დალოცვილი უხაბუნა!

— ბებია მარგალიტა!

— რა იყო, შვილო! — უცებ გამოერკვა ფიქრებში წასული მოზუცი.

— დაბრუნდით, აწი თვითონაც გავიკვლევ გზას, აი, სადგურიც გამოჩნდა.

— ეს არ მითხრა, ნენა, ჩემი ხელით უნდა ჩაგსვა მატარებელში!

— ჯობია იაგორა ბაბუას მიხედოთ, ვინ იცის, რა უჭირს.

— ასე მთლად ხელდაბანილი კი არაა მისი საქმე, რა უნდა მოუვიდეს, — ვერ მელევა ბებია მარგალიტა, — ცოტა ჩქარა გადმოადგი ფეხი, მატარებელმა არ გაგვასწროს!

მართლაც, ჩვენი მისვლა და მატარებლის ჩამოდგომა

ერთი იყო. შენ აქ დამიცადეო, მითხრა ბებია მარგალიტამ და სადღაც გაქრა. მალე მობრუნდა და მატარებლის ბილეთთან ერთად ხუთმანეთიანიც მომაჩეჩა: რომ ჩახვალ, ამით ჩემს სახელზე კამფეტი იყიდეო.

თითქოს ეზარებაო წასვლა, მატარებელი ნელა-ნელა დაიძრა. მე სარკმელთან ვიდექი და დიღხანს, დიღხანს გავცქეროდი დაცარიელებულ ბაქანზე მარტოდმარტო დარჩენილ მოხუცს, რომელსაც თავი ხელებში ჩაერგო და ალბათ უხმოდ ტიროდა.

\* \*

— დათო! — მომესმა ანაზღად.

„ბონდო? საიდან? როგორ?“ — გამიელვა თავში. მის ოღნავ ჩახრინწულ, ნაძალადევ ბარიტონს მთელი სკოლის მოსწავლეების ხმაში ვარჩევდი ხოლმე. მგზავრებით სავსე ვაგონს თვალი მოვავლე და მხარმარცხნავ. ფანჯარასთან, მართლაც ბონდოს მოვკარი თვალი, აქეთ მოდიო, ხელით მანიშნებდა. გვერდით პატიკო და გუჯუია ეჭდა.

— სად იყავი, ბიჭო? — მისვლისთანავე მკითხა ბონდომ და ადგილი შემომთავაზა.

— მანდ არა! აი, აქ დაჯექი! — ადგილზე გაშაქკავა უცებ ვილაციის მბრძანებლურმა ხმამ და ვიდრე გონს მოვეგებოდი, ბონდოს პირდაპირ თითქმის ძალით დამსვა.

— რა გინდა, რას ერჩი ბავშვს?! — გამომწვევად შეულრინა ბონდომ.

— ასეა საჭირო!

აწლალა მივიხედე მისკენ. ჯემალი იყო, ჩვენი უბნის

რწმუნებული. როგორც ყოველთვის, მილიციელის ფორ-  
მა ახლაც არ ეცვა, მაგრამ თვალებში ისევ ისე, ჩვეუ-  
ლებრივად, ედგა ჩემთვის კარგად ნაცნობი მრისხანება.

— აქეთ სად ყოფილხარ?

— ლანჩხუთში ვიყავი. ჩვენთან, პოსპიტალში ერთი  
მეზღვაური წევს, წერილი გამატანა მშობლებთან.

— მერე?

— მერე რა? მივუტანე და აი, უკან ვბრუნდები.

— ხომ არ მატყუებ, ბიჭო? — თვალებში შემომაცქერ-  
და ჭემალი.

— არა, მამას გეფიცები!

— იცოდე, ყველაფერს გავიგებ! ბებიაშენმა იცის?

— კი, იმან გამომიშვა. თუ არ გჯერა, ჰკითხე!

— ამასაც გავიგებ!

— ჭემალა, თავი დაანებე ბავშვს, გეყოფა, გეს-  
მის?! — ახლა პატიკომ შეუბღვირა უბნის რწმუნებულს.

— ჩუმად იყავით, თორემ ლაპარაკის უფლებასაც არ  
მოგცემთ! — მკაცრად გადახედა ბიჭებს ჭემალის გვერ-  
დით მჯდარმა ხანში შესულმა კაცმა. ეტყობა, უფროსი  
იყო.

ბიჭებმა საწყალობლად გადახედეს ერთმანეთს, მე-  
რე — მე, ხედავ რა დღეში ვართო, და ცელქობისათვის  
დასჯილი ბავშვებივით მიიყუყუნენ კუთხეში.

— ყმაწვილო! — ცოტა ხნის ღუმილის შემდეგ მკითხა  
უფროსმა, — კარგად იცნობ ამ ვაჟბატონებს?

ბიჭებმა ყურები ცქვიტეს, აბა რას იტყვისო.

— ამათ ვინ არ იცნობს! — ოღნავ იმედი მომეცა მე, —  
ჩემი მეზობლები არიან!



--- კარგი მეზობლები კი გყოლია, მეტი რა ვუთხრა ამათ უცხვირპირო თავს!

--- ცოტა წესიერად, უფროსო! -- თვალები გადმოქაჩა გუჯუიამ, — ჩვენ ასე ლაპარაკს მიჩვეული არა ვართ!

— ქურდობაზე რაღას იტყვით? — ჩაიციხა უფროსმა, — იქნებ არც ამასა ხართ მიჩვეული?!

— ვინ არის ქურდი? ჩვენ? — ზეზე წამოიჭრა ღირსების საკითხებში მეტისმეტად მგრძნობიარე პატიკო.

— დაჯექი! — მკლავში წაეტანა ჯემალი და ძალით დასვა.

— რით დაგვიმტკიცებთ, რომ ქურდები ვართ, გვიპოვეთ რამე? გვიპოვეთ?! — მხარი აუბა ამხანაგს გუჯუიამ.

— ახლა აქ ამისი დრო არ არის, ყველაფერს გავარკვევთ.

— ხახვი არ დაგვაჭრათ ყურებზე! — მწარედ ჩაეღიმა აქამდე გაჩუმებულ ბონდოს, — საბუთი, საბუთია საჭირო! დათო! — ახლა მე მომიბრუნდა, — ამათ არ დაუჯერო, დათო, არაფერი არ დაუჯერო, ჩვენ ქურდები არა ვართ! ამხანაგოს სანახავად ვიყავით, მივდიოდით ქუჩაში ჩვენთვის და აი... ქურდები ხართო...

სადგურში ბებია მარგალიტას ნაჩუქარი ფული ბონდოს უჩუმრად მივაჩიჩხე ხელში.

სახლში მისულს კიდევ უფრო უსიამოვნო ამბავი დამხვდა. ექიმ ადამოვსკის შვილს თავი მოეკლა, ხოლო ექიმი ჩვენი ბინიდან სხვაგან გადასულიყო.

## ზღაპარი მოთხინებაზე

იმ ღამეს დიდხანს, ძალიან დიდხანს თვალი არ მოგვიხუჭავს მე და ბებია. მოუსვენრად ვტრიალებდი ლოჯინში. თვალწინ მედგა იგორის სანთელივით გაფითრებული სახე, თითქოს ვხედავდი, როგორ მიიკვლევდა თოვლში ვზას მხრებში თავჩარგული ექიმის ადამოვსკი. ვხედავდი მის ნაფეხურებს გაუკვალავ თოვლზე, როგორც ფარატინა ფურცელზე დასმულ მწუხარების მრავალწერტილებს. მაგონდებოდა, ბონდოიასა და პატიკოს სიმწრისაგან ნახევრად შეშლილი სახეებიც, ბებია მარგალიტას ცრემლიანი თვალები, ერონისი...

იგორი აღარ არის! რატომ? ფიქრები ჭიანჭველებივით ფუსფუსებდნენ გონებაში. წასულიყო, ებრძოლა მისი თანატოლების მხარდამხარ, თავის ძმებთან, მეგობრებთან ერთად.

აკი მეც ვაპირებდი ფრონტზე წასვლას, მაგრამ არ წავედი? რატომ? შემებრალა დედა, მოხუცი ბებია... მაგრამ თავის მოკვლა არ მიფიქრია. რატომ უნდა მოიკლას თავი ანგეშივით ძლიერმა ადამიანმა?

არ ვიცი, არ ვიცი, არ ვიცი!

-- რა იყო, არ გეძინება, შვილო? — სიბნელეში მესმის ბებიას ძილგატეხილი ხმა.

— ბებია, რატომ მოიკლა იგორმა თავი?

ბებია ერთხანს ჩაფიქრდა, გავიგონე, როგორ შეტრიალდა საწოლში, მერე ყელი ჩაიწმინდა, მაგრამ ხველება აუტყდა. მივხვდი, გამოსავალს ეძებდა. ბოლოს ვერაფერს რომ ვერ გახდა, ისევ იოლი ფონი არჩია.

— ჯერ შენ პატარა ხარ, ამას ვერ გაიგებ, შვილო!

— მითხარი, ბებია!

— აბა, როგორ გითხრა, — შეყოყმანდა ბებია, — აი, გაიზრდები და ყველაფერს მაშინ მიხვდები!

— არა, მე ახლა არც ისე პატარა ვარ, მე მინდა ყველაფერი ვიცოდე!

— ფრონტზე წასვლა უნდოდა და მამამ არ გაუშვა!

— ეგ მეც ხომ ვიცი... რამდენჯერ მომისმენია მათი კამათისათვის. განა ამისათვის შეიძლება დაიღუპოს თავი ადამიანმა?

— აბა, სხვა რა უნდა იფიქროს კაცმა?!

— იგორი მხდალი იყო! — უცებ ხმამაღლა ვამბობ მე, ვამბობ თუ ვყვირი — ჩემსავე ხმას ვერ ვცნობ, — მხდალი და მშიშარაა ბონდო, პატიკო, გუჯუია. დიახ, ასეა! ვაჟკაცია ერონისი, ერთხელ დაიჭრა და ისევე ფრონტზე წავიდა, როცა იქ, სოფელში, დაუძღურებულნი, მოხუცი მშობლები ეგულებოდა. ვაჟკაცია დომენტი გვენეტაძის ბიჭი, მას თავი არ მოუკლავს, არც მეზობლის თხა მოუპარავს, წავიდა ფრონტზე და მარჯვენა ფეხი იქ დატოვა. განა კაკო ბიძიას უნდოდა სიკვდილი? ვაჟკაცია მამაჩემი, ეკას, გიას, მამუკას მამები, ბაბუა ივანე, ესტატე, დიანოზა მჭედელი, კალია, კოჩიაც კი... — გავყვიროდი მე და ყელში მომდგარი ბოღმა მახრჩობდა, თვალებში მოწოლილი ცრემლები გასაქანს ეძებდა.

— კარგი, შვილო, დამშვიდდი, გენაცვალოს ბებია, ასე როგორ შეიძლება!.. გეყოფა! მოდი, ჩემთან დაწექი! მე ზღუქუნ-ზღუქუნით წამოვდექი საწოლიდან.

— გინდა ზღაპარი გიამბო? — მეკითხება ბებია, როცა

მის გაყინულ, გამხდარ ფეხებს ჩავეხუტე. მე უკვე სიბნელეშიც გარკვევით ვხედავ მის დამკვანარ, ნაოჭებით დაღარულ, საყვარელ სახეს, მწუხარებით სავსე თვალებს, რომლებიც მისი თქმით, როცა იქნებოდა, მე უნდა დამეჩუქა მისთვის.



იყო და არა იყო რა, ღვთის უკეთესი რა იქნებოდა. იყო ერთი ღარიბი, ახალგაზრდა ცოლ-ქმარი. ჰყავდათ ერთი პატარა ვაჟი. ცოლ-ქმარს დღედაღამ შრომასა და ჯაფაში ამოსდიოდათ სული, მაგრამ დედამიწის ზურგზე მაინც არაფერი ებადათ.

— სანამ უნდა ვიყოთ ასე? წავალ სადმე, იქნება ბედს ვეწიოო... — უთხრა ერთხელ ქმარმა ცოლს.

ბევრი ემუდარა ცოლი: დარჩი, ნუ წახვალ, უშენოდ რაღა გვეშველებათ, მაგრამ ამაოდ. ქმრის გადაწყვეტილება ურყევი იყო. სინანულით გამოემშვიდობა ოჯახს, აიღო ხელში ჯოხი და გაუდგა გზას. ბევრი იარა თუ ცოტა იარა, მიაღვა ერთი მდიდარი კაცის ოჯახს და ჰკითხა: მოჯამაგირე ხომ არ გინდათო.

— როგორ არ მინდაო! — გაუხარდა ბატონს, — სწორედ ერთი მწყემსი მაკლია. გასამრჯელოს რას ითხოვო?

— რამდენსაც გაიმეტებ, ბატონო! — მიუგო გლეხმა.

— მაშ, აი, რას გეტყვი: სამ წელიწადს, სამ თვესა და სამ დღეს უნდა მემსახურო. გასამრჯელოდ ერთ მუჭა ვერცხლის ფულს მოგცემ. ან არა, და ისეთ სიტყვას გეტყვი, მთელს შენს ცხოვრებაში რომ გამოგადგესო. რომელიც გინდა აირჩიეო.

გლები ჩაფიქრდა.

— ერთი მუჟა ვერცხლის ფულს ერთი ბრძნული სიტყვა მირჩევნიაო!

მართლაც, იმ დღიდან გლები ერთგულად ემსახურებოდა ბატონს. ცხვრის ფარამ იმრავლა, მაგრამ რა იმრავლა. ბატონი სიხარულით ცას სწვდებოდა.

გავიდა სამი წელი, სამი თვე და სამი დღე და აი, მწყემსიც მორჩილად მიადგა ბატონის კარს დაპირების მოსასმენად.

— მითხარი, ბატონო, რა სიტყვაა, ვერცხლზე მეტად რომ ფასობსო.

— მოთმინება! — მოკლედ მოუჭრა ბატონმა.

შეწუხდა გლები, ეს რა ბედენა არისო, უიმედოდ ჩაიქნია ხელი და წასვლა დააპირა.

— დაიცა, სად მიხვალ! — წინ გადაუდგა ბატონი.

— წავალ, ჩემს გზას ვეწევიო.

— შენისთანა კარგი მწყემსის დაკარგვა საწყენია, იქნებ კიდევ დარჩენილიყავი ჩემთან?

„რა ვქნა, ახალი ბატონის ძებნას ისევ ძველი მირჩევნიაო“, — გაიფიქრა გლებმა და დათანხმდა.

— რახან ასეა, — სიხარულით გაუბრწყინდა ბატონს სახე. — ჩემი პირობა იცი, ორიდან ერთი აირჩიე: ბრძნული სიტყვა გინდა თუ ფული?

გლებმა ფულს ისევ ბრძნული სიტყვა არჩია.

მწყემსი კვლავ ერთგულად ემსახურებოდა ბატონს. ცხვრის ფარამ ისე იმრავლა, რომ სათვალავი დაეკარგათ.

გავიდა სამი წელი, სამი თვე და სამი დღე.

მწყემსი ისევ მიადგა ბატონს დაპირების მოსასმენად.

— მიტხარი, ის მეორე ბრძნული სიტყვა რომელიდაა?

— ისევ მოთმინება, — კვლავ მოკლედ მოუჭრა ბატონმა.

შეწუხდა გლეხი, ეს რა ღვთის წყრომაა ჩემს თავსო, მაგრამ არაფერი უთქვამს, მხოლოდ უიმედოდ ჩაიქნია ხელი და ახლა კი ნამდვილად დააპირა, გასცლოდა იქაურობას. მაგრამ ბატონმა ისევ, ამჯერად უკანასკნელად, დაიყოლია შრომისმოყვარე, ერთგული მსახური.

კიდევ გავიდა სამი წელი, სამი თვე და სამი დღე.

უკვე ცხრა წელი, ცხრა თვე და ცხრა დღე იყო გასული მისი აქ მოსვლის დღიდან. გამდიდრდა ბატონი და მერე როგორ, მისი ბადალი მეორე არ მოიძებნებოდა მთელ დუნიაზე.

ისევ მორჩილად მიადგა გლეხი ბატონს მესამე ბრძნული სიტყვის მოსასმენად.

— ჩემი მესამე სიტყვაც მოთმინება არისო! — მოუჭრა ისევ ბატონმა.

აქ კი აევსო მოთმინების ფიალა გლეხს, უნდოდა ეყვირა, გაელანძლა მატყუარა, მაგრამ უცებ გაახსენდა მოთმინება და უხმოდ გაცლა არჩია.

— დაიცა, სად მიხვალო?! — წინ გადაუდგა ბატონი.

— უკვე დიდი ხანია გემსახურები, ბატონო, წავალ, ჩემს გზას ვეწევი, ვინ იცის, იქნებ სადმე ბედმა გამიღიმოსო.

— რახან შენსას არ იშლი, — დაუყვავა ბატონმა, — არ დაგაკავებ. შენ ამ ცხოვრებისა უკვე ბევრი რამ იცი...

წელან რომ ჩემთვის გეყვირა და მოთმინება არ გამოგე-  
ჩინა, ნამდვილად ბევრს წააგებდი. ახლა კი ამ პირველი  
მოთმინებისათვის ჩემი ცხვრის ფარის ნახევარი შენთვის  
მიბოძებია, ღმერთმა სიკეთეში მოგახმაროსო.

მწყეშმა დიდი მადლობა გადაუხადა და გახარებული  
გაუდგა თავის გზას.

ცხოვრებამ კიდევ დიდხანს ატარა ბედის მაძიებელი-  
სად არ იყო, თითქმის მთელი ქვეყნიერება შემოიარა. ბო-  
ლოს შინ დაბრუნება გადაწყვიტა. უკვე მდიდარი კაცი  
იყო.

ბევრი იარა. თუ ცოტა იარა, მივიდა თავის სოფელში  
და რას ხედავს: ძველი მიწური ქოხის ნაცვლად მის ეზო-  
ში დიდებული ოდა-სახლი დგას. ალბათ, ჩემი ცოლ-შვი-  
ლი შიმშილით დაიხოცა და ჩვენს ნასახლარზე სხვა ვი-  
ლაც დასახლებულაო. ამიერიდან ჩემს სიცოცხლეს რაღა  
ფასი აქვსო, გაიფიქრა და თავის მოკვლა განიზრახა. მაგ-  
რამ უცებ გაახსენდა მეორე ბრძნული სიტყვა — „ისევ  
მოთმინება“ და სანამ ამბავს კარგად არ გაიგებდა, მოთმი-  
ნება არჩია.

ღარიბულად ჩაცმული, ჩამოძენძილი, თითქოს მოწყა-  
ლების სათხოვნელად შევიდა ეზოში. ხედავს, საქორწი-  
ლო სუფრაა გაშლილი და უთვალავი ხალხი ირევა. ას-  
წლოვანი კაკლის ხეს ძირას კი წრე შეუკრავთ და ცეკვა  
გაჩაღებული. ქალში თავისი მეუღლე იცნო. მიღალატა ამ  
უნაპუსო დედაკაცმაო, — გაიფიქრა და ცოლის მოსაკლა-  
ვად გაიწია, მაგრამ ამ დროს მესამე ბრძნული სიტყვა გა-  
ახსენდა. თავი შეიკავა და იქვე მდგომ კაცს გამოელა-  
პარაქა.

— ერთი, თქვენი ჭირიშე. გამაგებინეთ, აქ რა ამბავი ზღებო.

— როგორ თუ რა? — გაიოცა სტუმარმა, — ამ ოჯახის ვაჟიშვილი დაქორწინდა და აგერ, ერთად რომ ცეკვავენ, დედა და შვილიაო.

— მამა? მამა სადღა არის?

— მამა ოცი წელია სადღაც გადაიკარგა. მისი ასა-  
ვალ-დასაველი არავინ იცის. საწყალმა ქალმა ოჯახი არ  
დაანგრია, შვილი გამოზარდა და ახლა შენც ხედავ, რა  
ბედნიერი არისო.

მონხუს თვალეებზე სიხარულის ცრემლები მოადგა.

— ამ ბიჭის მამა შე ვარო! — თქვა.

ატყდა ერთი აურზაური, ხვევნა-კოცნა.

ცხრა დღე და ღამეს გაგრძელდა ლხინი. მეც იქ ვიყა-  
ვი, კარგა გვარიანად გეახელი ყველაფერს და ეს არის,  
ახლა იქიდან მოვედი. დაიმახსოვრე, შვილო, ვინც მოით-  
შენს, ის მოიგებს!

ელასა, მელასა,  
ქიქა მეკიდა ყელასა,  
მთქმელსა და გამგონებელსა  
ძილი გაამოთ ყველასა.

ღილით ბებია მჩემი ერთადერთი შარვალი გარეცხა,  
ჭუჭყიანიო. მეტი რა გზა მქონდა, საღამომდე ვიწექი  
ლოგინში. არ გაჰქრა მუდარამ, შარვალი გაშრა, ავდგები-  
მეთქი. ბებია ჭიჭობდა: დაიცა, ბიჭო, ეკიდოს ეზოში  
ცოტა ხანს ეგ შარვალი, დაინახოს ხალხმა, კიკნაველიძე-  
ების ოჯახში მამაკაცი კიდევ არისო.



## წერილი მამას

„მივიღეთ შენი წერილი. შეიძლება ცოტა ხნით ჩამოვიდეთ, რომ იწერები, ბებია სიხარულისაგან ცას ეწია. დღე და ღამე სულ შენს მოლოდინშია.

ღამდამობით წვიმისა რომ გვეშინოდა და საბანს ზემოთ მაგიდის მუშამბა ვიხურავდით, ახლა აღარ გვჭირდება. სახლის სახურავი, როგორც ფრონტელის ოჯახს, უსასყიდლოდ შეგვიკეთეს. წელს მოსავალიც კარგია. ამინდებიც კარგი დაიჭირა. ბაბუა ივანე ამბობს: ორიოდე კვირა თუ კიდევ ასე გასტანა, წელს იმდენ ღვინოს მოვიწევთ, შვილიშვილების ქორწილამდე გაგვყვებაო.

მამიკო, ალბათ, გახსოვს ჩვენი მეზობლის ბიჭი, ბონდო, დაიჭირეს და სამი წელი მიუტანეს ქურდობისათვის. ფრონტზე წასვლა ითხოვა, მაგრამ უარი უთხრეს. გულღვიძლი დამეწვა მისი საცოდობით. ბოინზე წასაყვანი ხარივით ბლადოდა. გაიქაჩნენ დაზარალებულ-მომჩივანები, გაუშვით, ცოდვია, ჩვენ არაფერს ვუჩივით, ვინ იცის, იქნებ მისგან კაცი დადგესო, მაგრამ კანონი რისი კანონია, თუ ქურდი და ყველა ძალდი-მაჰაძალდი გაუშვ-გამოუშვა.

არა, ისე გულზე ხელი რომ დაიდვას კაცმა, არც მე ვარ წმინდა წყლის, არც გია, არც მამუკა, თუ გინდა ბაბუა ივანეც. მახსოვს, ერთხელ ბებიაჩემს უთხრა: რა მოხდა, შე ქალო, ბავშვობაში ერთი-ორჯერ მეზობლის ბაღში მეც გადავპარულვარო.

მაშ, ყველა დესაჭერი ვყოფილვართ.

რა ლედვის ქურდი და რა თხისა.

მე ლეღვი მოციპარე, ბონდომ — თხა.

განა ნემსის ქურდი და აქლეშის ქურდი ორივე ქურდი არ არის?

სამი წელი!

სამი წელი ხუმრობა როდია!

სამი წლისაა ახლა ჩვენი კუნტას უმცროსი ბიჭი ვახო, დადის, ლაპარაკობს, ავსა და კარგს არჩევს.

სასამართლოდან დაბრუნებული ლევანი, ვარდენას ბიჭი, მთელი დღე იფხრიწებოდა სიცილით, ეს რა მოხერ-ჩებული მეზობელი გვეყოლია, ღმერთმა ააშენა მისი ოჯახი, დაგვეყვიტა ხალხი სიცილითო. თურმე, ერთხელ. ბონდო და მისი ამხანაგები ერთ მეგობარს დაუპატრუნა მახლობელ სოფელში საქეიფოდ. უსვამთ და ულხენიათ გემოზე. შუალამისას აყრილან სუფრიდან. არყით გამო-ბრუებული ბიჭები თუთარჩელა ღამეში ბანცალ-ბანცალით გამოჰყოლიან ქალაქისაკენ გზას. მოსახვევში თხის პეტელი გაუგონიათ. იქვე, გზის პირას, ოდის ლაფაროში თხა შეუნიშნავთ. შესცოდებიან, წავიყვანოთ ქალაქში, აქ რა უნდა გააკეთოსო. დაუვლიათ რქებში ხელი და სულ ჩიქჩიქით გამოუყვანიათ შარაგზაზე. პატიკოს თურმე იქვე დაკიდული ჭყინტი ყველით სავსე ხალამი დაუთრევიან.

საცოდავ თხას დაუწყია პეტელი, პეეე!.. პეეე!

ვარივარალეეე! — აჰყოლიან ბიჭები. ასე: პეეე-ვარი-ვარალეს ძახილით და ჭყინტი ყველის ჭამით ჩამოსულან ქალაქში.

ეს იყო და ეს, მდინარე მიუშვი და კალაპოტს თვითონ იპოვნისო. არა, რა არის მაინც აქ სასაცილო?!

ო, როგორ ტიროდა ბონდოს და მზია, მისი ცრემლების დანახვა ალბათ ქვასაც მოუღობდა გულს...

მამიკო, ციხისგორას გვირაბის საიდუმლოსაც იმ დღეს აეხადა ფარდა. თურმე საიდუმლო სეიფს პირველად ბონდომ და მისმა ამხანაგებმა მიაგნეს და ნაქურდალს იქ ინახავდნენ, ხოლო პაპიროსის კოლოფი და ასანთი მათი პაროლი ყოფილა“.

### ჩვენ ოთხნი ვართ

როგორც იქნა, თებერვლის უძლურმა მშემ ზამთარს წელი მოსწყვიტა, მუხისგორას ფერდობები ლილო-ქრილოებმა დაფარა.

მიიწურა მარტის უმიზეზოდ მტირალა, ნაღვლიანი დღეებიც. აპრილში აფეთქებულ კვირტებს ვარდობის თვემ თვალეში ნათელი ჩაუყენა და სამწუხარე დაანახვა ქვეყანას.

გაზეთებს ყოველდღე აბალ-ახალი სასიხარულო ამბები მოაქვს: ჩვენი ჯარები ყველა ფრონტზე წარმატებას წარმატებაზე აღწევენო. რადიოს თითქოს მეტი რიხი და ხმა მიეცა, გადახალისდა. ციხისგორელები ფერზე მოვიდნენ, გამოცოცხლდნენ. მზეც თითქოს სხვანაირად იცინის, სხვანაირად კამკამებს ცის ლაქვარდი.

ბიჭები ახლა ყოველდღე ვხვდებით ერთმანეთს. რა თქმა უნდა, ეკაც ჩვენთან არის. უფრო ხშირად ჩვენი გვირაბის შესასვლელთან ვიკრიბებით.

დღეს მამუკა რატომღაც ჩვეულებრივზე ადრე მოვიდა, თან ერთი თონის პური მოიტანა, ჭამეთო.

— სად იყო ბიჭო, ეს? — ჰკითხა გაოცებულმა გიამ.

— ჩვენი საცხოობის გამგეს ფრონტიდან შვილის წერილი მოუვიდა... სიხარულისაგან კინაღამ გაგიჟდა კაცი. აგერ, სამი თვეა, მისი არაფერი ისმოდა, დაკარგული ეგონა. ჰოდა, „სამაღარიჩოდ“ ცოტაოდენი გადაჰკრა. მეორე თონის პური მომცა და გამომიშვა, დღეს დაიხვეწეო. მეც წამოვედი, ერთი პური სახლში დავტოვე, ეს კი თქვენ წამოგიღეთ, ბიჭებს ეშიებათ-მეთქი.

— აი, ეს მესმის!

— ბიჭოს, თბილი ყოფილა! — მაღიანად ილუკმება გია. მამუკას ეღიმება, ცოტა ეკასაც შეუნახეთო.

— მართლა! სად დაიკარგა ეკა? — ვთქვი მე.

— ამდენ ხანს უნდა მოსულიყო!

— მოვა, აბა რას იზამს!

— ეე! — უცებ ჩაბეირდა მამუკა, — აგერ, ისიც! აღმართზე ეკა ამორბოდა.

„რაღაც ამბავია ჩვენს თავს!“ — გავიფიქრე მე.

— ბიჭებო! ბიჭებო! — აქლოშინებული ეკა სულს ძლივს ითქვამს. ქერა, დაბურღული თმები დაუდევრად ჩამოშლია სახეზე, მარცხენა ხელში ცალი ფეხსაცმელი უჭირავს, სირბილის დროს თუ გასძვრა. მარჯვენათი კი ფარატინა ფურცელს მოაფრიალებს.

„ღმერთო ჩემო, ნამდვილი აღქაჯია!“

— რა იყო, რა მოხდა? — ნაძალადევი სიმშვიდით ეკითხება გია.

— აბა, თუ მიხვდებით?

— მამაშენის წერილია?

— არა!

— ალბათ, დედაშენმა მოიწერა!

— არა!

— აღარ იტყვი?! — გაბრაზდა მამუკა და ფურცელს წაეთანა, მაგრამ ეკა გაუსხლტა და მიწაყრილზე შეხტა.

— თავი დაანებეთ, ვნახოთ, სანამდე იხტუნებს! — ვთქვი მე.

ეკას სახე მოელრუბლა. მიწაყრილიდან ფრთხილად დაცურდა. განაწყენებულმა ქალალდი ხელში მომაჩეჩა და სრუტუნით განზე გადაგა.

— ბონდოჲს წერილია, ბებია ქეთემ მომცა, ბიჭებს მიუტანეო.

გაოცებულნი ერთმანეთს მივაჩერდით. ბონდო თითქმის დავიწყებული გვყავდა. ხანდახან თუ გავიხსენებდით, მაგრამ მოსაგონარიც კარგი არაფერი გვქონდა. ახლა კი ამდენი ხნის შემდეგ მისი წერილი, ისიც ციხიდან, მოწმენდილ ცაზე მეხის გავარდნას ჰგავდა.

\* \*

„გამარჯობათ, ბიჭებო!

უკვე ერთი წელი გავიდა, რაც ჩვენი ქალაქი დაეტოვე. თავი შევირცხვინე, ძმებო, და სირცხვილი გაჭამეთ ყველას. ვგრძნობდი, ჩემს უღირს საქციელს კარგი არაფერი მოჰყვებოდა. ასეც მოხდა! ახლა, გონების თვალით გადავცქერი განვლილ ცხოვრებას და მრცხვენია. მაგრამ დანაშაულს გამოსყიდვა უნდა!

ამას წინათ ჩვენს სანახავად ჩემი და მზია იყო. ასე რომ, მთელი ციხისგორას ამბავი დაწვრილებით მიაგზო.

გამიხარდა, რომ ყველანი კარგად ყოფილხართ, კომკავ-  
შირშიც მიუღიხართ, სულით და გულით გილოცავთ.

წუხელ გვიან ღამემდე ვისხედით ბიჭები, ვიგონებ-  
დით ჩვენს მშობლიურ ქალაქს, საყვარელ სკოლას. ეპ,  
რას იზამ, ურემი გადაბრუნდა და გზა მერე გამოჩნდა.

ეს მერამდენედ ვგზავნი თხოვნას, ფრონტზე გამიშ-  
ვან, მაგრამ ჭერჯერობით პასუხი არ ჩანს. მე უკვე  
თვრამეტი წლისა ვარ, პატიკოც ჩემი ხნისაა. მხოლოდ  
გუჯუს მოუწევს კიდევ ცოტა ხანს ლოდინი.

გჯეროდეთ, ამჯერად თავს არ შევირცხვენ. მოგიკი-  
თხათ გუჯუმ და პატიკომ. ნახვამდის!

თქვენ ი ბონდო“.

## ზ ი ნ ა ა რ ს ი

### ნაწილი პირველი

სათევზაოდ	3
მამა და დაუპატიჟებელი სტუმარი	12
ბონდო	20
ისტორიის მასწავლებელი	31
ბურთი დაიკარგა	33
გვირაბში	38
ომია! ომი დაიწყო!	49
ცოცხლად დამარხულები	53

### ნაწილი მეორე

კუნტა	64
შავი ქალაქი	71
სიმინდის სატეხად	76
წერილი მამას	84
ექიმი ადამოვსკი	87
ახალი წლის ღამეს	92
სიმართლის მოყვარული ბებია	99
კომკავშირის რაიკომში	104
საბრძოლო დაკვლება	113
თეთრი ღამე	117
ხუთი მანეთი	127
წლაპარი მოთმინებაზე	134
წერილი მამას	141
ჩვენ ოთხნი ვართ	143

**Никабадзе Джансуг Ноевич**

**Тайна Цихисгоры**

(На грузинском языке)

Детюниздат Грузинской ССР

«Накадули»

Тбилиси

1970

რედაქტორი მ. სოხაძე

მხატვარი ჯ. ყაველაშვილი

მხატვრ. რედაქტორი შ. დოლიძე

ტექნიკური რედაქტორი ნ. შველიძე

კონტროლიორ-კორექტორი ლ. სულთანაშვილი

კორექტორი თ. ინჯია

გამომშვები ზ. ნიშნიანიძე

ბელმოწერილია დასაბეჭდად 7/IX-70 წ.

ქილაღლის ზონა 70×108<sup>1</sup>/<sub>32</sub>

ნაბეჭდი თაბახი 9,25

სააღრიცხვო-საგამომცემლო თაბახი 5,3

უე 01746 ტირაჟი 10.000 ფახი 20 კაპ. ში.ივ. № 2899

გამომცემლობა „ნაკადული“, მარჯანიშვილის ქ. № 5  
Изд. «Накадули», ул. Марджанишвили № 5  
საქართველოს სსრ მინისტრთა საბჭოს ბეჭდვითი სიტყ-  
ვის სახელმწიფო კომიტეტის მთავარბოლიგრაფმრეწვე-  
ლობის სტამბა № 2 „ნაკადული“, ფურცელაძის ქ., 5  
Типография № 2, «Накадули», Главполиграфпрома  
Государственного Комитета Совета Министров  
Грузинской ССР по печати, Тбилиси, Пурцеладзе, 5